

# WANTOK

NIUSPEPA BILONG YUMI OL PAPUA NIUGINI STRETI

32 pes

Namba 1,399

Wik i stat long Fonde Epril 19, 2001

70t

**Peipul askim kot long sori long em**

**BP bai peim kompens-esen long ol bagarap lain**

pes 3

**Tok pilai pes 22**

wantaim

**Kanage**



**Klinim gut!** • Tiku Pupi (pusim wilbaro) na Tepsin Mimet i wok long kilim geit bilong Hotel Cloudlands long Tabubil. Tupela em ol rait long long mekim hotel i luk nais long ol pipel i kam stap. Foto: JOE KANEKANE.

## Sampela helt woka i wokim blekmaket long ol marasin

**GEOFFREY APAKALI i raitim**

I GAT wari olsem sampela wok lain long haus sik i wokim blekmaket long stilim ol marasin bilong ol pablik haus sik na salim i go long ol praivet klinik long kisim kwik mani long en.

Helt Minista Ludger Mond i autim dispela taim em i mekim wokabaut i go long Mambisanda Haus sik klostu long Wapenamanda long Enga long dispela wik Tunde.

Mista Mond i tok olgeta haus sik long kantri i no inap sot long ol marasin sapos ol i no stilim namel long medikol stoa na ol haus sik.

Em bin tok em i wari bikos ol haus sik i wok long tok ol i sot long marasin klostu klostu tumas long wanem ol wan wan haus sik i wok long wokim baset long kisim inap marasin saplai long olgeta sikman.

Mista Mond i bin tok gavman i wok long tromoim inap mani insait long olgeta wan wan yia bilong baim ol marasin long ol haus sik insait long kantri tasol tasol ol marasin i wok long lus

namel long medikol saplai stoa na ol haus sik.

Em bin tok Nesenel Gavman i save givim inap mani long baim ol marasin insait long olgeta haus sik na ol bai ino inap bungim hevi long marasin i sot na olsem em i save baim moa long mak we em sapos long baim tasol long rot namel long medikol stoa na ol haus sik na ol sikman, marasin i wok long lus.

Mista Mond i tok em i wari tru long dispela samting i wok long kamap.

Long bekim askim we em i ting olsem marasin i go we, Mista Mond i tok bisnis long salim ol marasin namel long sampela helt woklain na ol praivet haus sik i stap nau long sampela yia taim sampela wok lain bilong haus sik i wokim pasin i no stret na hait salim ol pablik marasin i go long ol praivet klinik long kisim kwik mani long en.

Em bin tok helt kea sevis wantaim ol praivet opereta i kamap strong na pe bilong ol i no isi na ol i save stronmgim wok biklong ol taim ol gavman stoa i sot long ol medikol saplai.

Em i tok i moabeta long ol lain i wok long ol medikol stoa

long was gut taim ol i kisim ol marasin i go long ol wan wan haus sik.

"Hevi long marasin i sot we ol haus sik long kantri i bungim i kamap bikos sampela lain i salim ol marasin namel long medikol stoa na ol sikman. Ol i salim ol marasin i go long ol praivet haus sik lain na i no tilim ol i go long ol haus sik," Mista Mond i tok.

Pastaim tu Ekting Siaman bilong Wabag Hau sik bod Bob Augoun i bin autim wankain wari taim em i kisim ol done-sen marasin we pe bilong ol inap long K5,000 i kam long Dae Won hotel kampani. Long 1999, Dae Won i bin givim wankain marasin donesen we prais bilong ol inap long K8,000.

Mista Angoun i bin tok long pepa, em i save olsem i gat inap saplai i go long haus sik tasol tru tru em ol i save sot long planti marasin.

Em bin tok i luk olsem ol helt woka o ol sampela visita i wok long stilim ol marasin bilong ol haus sik.

Em i tok kikbek i save pundaun long ol sik manmeri na pikinini taim blek maket long ol pablik marasin i kamap strong.

## POSF bos inap long kisim moa long K18 milien bihain long tripela yia kontrak

**WINIS MAP i raitim**

••• sapos DPM i tok oraitim kontrak

MANESING Dairekta bilong Pablik Opisa Supa Anuesen Fan (POSF) Ces lewago inap long kisim K18 milien bihain long tripela yia kontrak sapos Dipatmen ov Pesenel Manesmen i bin tok oraitim orijinel wok kontrak bilong em.

Mista lewago i bin askim long kisim 10 pesen bilong ol POSF profit o winmani olsem wanpela long ol samting em i mas kisim aninit long kondisen bilong em taim POSF i kisim em long wok olsem bosman.

Ol ripot i kam long wanpela wokman long Fan i tok supafan bilong ol pablik sevan i bin wokim K60 milien beis profit long ol arapela yia na long las yia profit i kamap long K65 milien mak.

Ripot i tok bihainim dispela infomesen, manesing dairekta inap long kisim K6.5 milien long ol

profit bilong las yia na em inap long kisim moa sapos fan i pulim moa win mani.

Wantok i kisim ol ripot olsem ol foma manesing dairekta bilong Fan i no save kisim dispela kain mani mak na tu ol i no save wokim ol kain askim long kontrak bilong ol.

Dipatmen bilong Pesenel Manesmen (DPM) i no tok oraitim yet ol kontrak pepa bilong Mista lewago bikos em i askim long bikpela mani mak tumas.

Ol bin putim kontrak na ol kondisen bilong em i go long POSF long lukim na glasim na skelim ol aninit long ol kondisen na mak bilong DPM.


Ol bin makim Mista lewago olsem manesing dairekta long Septemba las yia tasol nogat tok orait yet i kamap long ol kontrak pepa bilong em. Salaris na

Monitoring Komisn Komiti (SCMCC) i no kisim yet ol kontrak pepa bilong Mista lewago long glasim na tok oraitim. SMCC bai givim tok orait long kontrak bilong em bihain long DPM i lukim pinis na givim tingting bilong em tasol i kam inap nau, DPM i no wokim dispela bikos ol samting we em i askim long en i abrusim mak bilong DPM i save putim long en.

Wanpela ausait lo kampani i bin redim namab wan kontrak pepa na i no Koporet Seketeri bilong POSF.

Ol senis bilong ol kontrak bilong manesing dairekta em POSF Bod yet bai glasim na tok oraitim tasol long dispela taim, bod i no balens long wanem ol lain i makim stet tasol i stap na nogat ol lain i makim ol woklain.


Peter Tsiamalii husat i wanpela bod memba em i seketeri bilong



• Peter Tsiamalii, Bod memba bilong POSF Na seketeri bilong DPM.

DPM.

Wantok i no bin nap long kisim ol toktok long Mista Tsiamalii long



• Manesing Dairekta bilong POSF, Ces lewago.

bikos ol i no hariap long tok oraitim ol kontrak pepa bilong Mista lewago.

### Memba bilong Midel Flai no lukluk long pipel gut

OLGETA wokman bilong Ok Tedi Main tok olsem toktok bilong Midel Flai Memba Bitan Kuok husat i tok Ok Tedi i no stap klostu long wanpela setelmen long ol papagraun i kamap long kot i no tru.

Ol papagrauni tok gutpela toktok i kamap namel long ol wokman na ol papagraun bihain long ol hetman bilong 19 viles insait long Midel Flai i sainim wanpela toktok orait bilong sindaun wantaim na lukluk long dispela hevi.

"Dispela saining bilong pepa i wanpela gutpela sain namel long kampani na ol pipel bilong Midel Flai long wok bung wantaim gavman na kampani," wanpela wokman i tok.

Wanpela wokman i tok Mista Kuok i no stap klostu wantaim ol pipel bilong em.

Em i tok Mista Kuok i slip long hotel rum bilong em long Mosbi o Melbourne na i no kisim tingting bilong ol pipel bilong em bipo long em mekim ol toktok.

Dispela wokman i tok Mista Kuok i no save soim olsem em i gat laik long ol pipel long taim em i go long palamen tasol nau tasol luk olsem em mas kam daun long klaut na mekim ol dispela toktok long amamasim ol pipel bilong Midel Flai bikos taim bilong ileksen i kamap klostu pinis.

Olgeta wokman i askim Mista Kuok long soim ol wanem developmen na senis i kamap long eria bilong em taim em i stap memba.

Oi i tok olsem planti developmen i kamap long OTML na Nesenel Gavman inait long teks kredit Skim na ol narapela developmen.

Oi i tok long putim rekot stret, las wik tasol Midel Flai Rijen i bin sainim wanpela pepa taim ol i bung wantaim Deputi Seketeri bilong Dipatmen bilong Maining Mista Steve Nion, Siaman bilong Ok Tedi Bod Mista Murray Hohnen na Menesing Darekta bilong OTML Dokta Roger Higgins. ol lain bilong Midel Flai em olpela Westen Provins Primia Isidore Kaseng, Raymond Pivini, Peter Lucas, Mista Richard Zumoi, Steven Wembut, Stanley Papoa, Max Giawale na Jope Lucas.

Mista Sale taim em bungim ol lida bilong Nesenel Gavman na OTML i tok em i bilip olsem dispela em wanpela gutpela rot bilong ol i ken wok bung wantaim.

### NPF no bihainim lo long klsim ol autsait lo kampani

#### WINIS MAP i raitim

OLGETA lo sevis Nesenel Providen Fan (NPF) i kisim bipo long Novemba 1999 i no bin kamap aninit long tok orait bilong NPF Bod na tu i no bihainim gut gutpela rot bilong gavman long putim aut tenda bai planti lo kampani i ken traिम winim.

Dispela toktok i kamap ples klia long wok painim aut bilong wok bilong NPF.

Bikman husat i go pas long wok painim aut John Reeves i tok NPF i no bihainim gutpela rot bilong gimv wok long ol kankain lo kampani taim NPF i laik kisim edvais na sevis

bilong lo.

Mista Reeves i tok olsem bikpela mani tru i bin lus long sait bilong baim loya bipo long 1998 na 1999.

Em i tok dispela samting i kamap taim Koporet Seketeri Herman Leahy i pinisim skul bilong em long Amerika na kam bek long mun Jun 1997.

Em i tok olsem olgeta wok bilong hairim lo sevis bilong NPF i save kisim tok orait long Mista Leahy.

Wok painim aut i harim olsem taim Robert Kaul i stap olsem Menesing Darekta bilong NPF, em bin kisim ol autsait loya long stretim olgeta wok bilong em. Em bin tokim Mista Leahy tu olsem taim em

i no stap, taim bilong hairim loya, em mas kisim tok orait long Deputi Menesing Darekta Mista Noel Wright na taim em gimv tok orait na ol i ken kisim loya bilong autsait i kam insait.

Tasol Mista Leahy i no bihainim ol dispela toktok na NPF i lusim bikpela mani long dispela as taim fi bilong ol loya i go antap.


Wok painim aut i harim olsem tupela samting i bin kamap. NPF i lusim bikpela mani long hairim loya we ol dispela wok inap long ol loya bilong NPF i ken mekim na narapela samting em long olgeta lo wok i go long Carter Newell loya, bihainim dispela i kam Fiocco Posman na Kua, na kam daun liklik long

Maladina loyas.

Wok painim aut i lukim olsem taim meri bilong Mista Leahy Ms Angeline Sariman i stat wok wantaim Carter Newell Loyas stat long Jun o Julai 1997, NPF i wok long gimv wok bilong loya i go long dispela kampani, bipo long dispela Carter Newell i no save kisim wok bilong NPF.

Long 1997 tasol, Ms Sariman i opim 50 fail olgeta long wok NPF i wok long mekim wantaim ol.

Wok painimaut i bilip olsem Mista Leahy i no tingting tumas long wok bilong em long NPF na em mekim bikpela wantok sistem stret long dispela wok.



Lower Ok Tedi papagraun na OTML sain HOA pepa. Dispela bai helpim main long go het. Foto: JOE KANEKANE.

### Kuk Kuli bai i no sanap long kot

MEMBA bilong Anglim Saut Waghi Kuk Kuli bai i no inap sanap long kot bilong ol lida bihain long sampela toktok olsem em i bin paulim K175,000 bilong Nesenel Goming Kontrol Bod na yusim em yet.

Sampela insait toktok i kam olsem long opis bilong Pablik Prosekjuta i tok olsem opis bilong Pablik Prosekjuta i lukim olsem i nogat wanpela asua i stap wantaim memba long memba i ken sanap long kot bilong ol lida.

Pablik Prosekjuta painim aut olsem dispela mani i kam long sek na i go insait stret long Ela Motors long Mosbi na em bin baim tripela ka na gimv long ol lain bilong em insait long Anglim Saut Waghi na em yet i no yusim dispela mani olsem ol man i ting.

Taim man i kam aut, man i no bin stap long nan bilong Mista Kuli long wanpela taim. Em i go insait stret long Ela Motors bilong ol dispela ka.

Opis bilong Prosekjuta i amamas olsem Mista Kuli i no bin brukim wanpela lo nap long em i sanap long kot bilong ol lida.

Memba Kuli i nogat inap sas bilong em i sanap long kot na dispela komplon bilong em Pablik Prosekjuta i rausim.

### Peipul askim kot long sori long em

Deputi oposisen lida Peter Peipul i askim Kot bilong ol Lida long noken rausim em olsem wanpela memba bilong palamen.

Kot bilong ol lida i painim aut olsem Mista Peipul i bin brukim lo bilong ol lida olsem faivpela olgeta long yusim posisen bilong em long lukim olsem brata bilong em i mas stap insait long Pablik Sevis Komisn.

Long las toktok bilong em, loya bilong em Levi Tilto i askim kot long gimv tok lukaut long memba na sasim em fain we i no winim mak bilong K1,000.

"Dispela kot i gat

wok long mekim fea na gutpela disisen na mas tingting long gimv narapela mekim save i go long memba na i mas noken rausim em olsem wanpela memba bilong palamen." Mista Tilto i tok.

Mista Tilto tokim kot olsem Mista Peipul i stap inap 26 yia olgeta olsem wanpela pablik sevan na olsem wanpela politisn na i gimv bikpela sevis i go long ol pipel bilong Papua Niugini na em i no wokim wanpela asua long ol dispela yia em i wok long en.

Mista Tilto i tok olsem wantok sistem em wanpela asua ol i sasim memba long

em na wanpela kot bipo i no putim wanpela eksampol bipo we ol inap bihain long gimv bikpela mekim save long Mista Peipul.

Em i tokim kot bilong lida olsem ol i mas noken tingting long ol narapela kot bilong ol lida bipo we i save lukim ol i paulim bikpela mani o narapela bikpela samting olsem braiberi.

Long bekim, Prosekjuta Francis Kuvu i tok olsem kot bai sindaun bung na skelim wanem kain mekimsave ol bai gimv long lida.

Mista Kuvu i tok olsem Mista Peipul i ken tok i nogat wan-

pela paul pasin i kamap tasol em bin mekim ol sampela paul pasin long lukim olsem brata bilog em i stap insait long Pablik Sevis Komisn.

Em i tok ol sas i kamap long dispela inap bringim bikpela mekim save long Mista Peipul.

Mista Peipul i kam long palamen long 1992 ileksen na bihain kam bek gen long 1997 ileksen. Em bin holim sampela kain ministri insait long Skate gavman na dispela asua we i painim em rong i bin kamap long 1998 taim em i stap olsem Minista bilong Pablik Sevis.

**WANTOK**

All departments. Phone: 325 2500 - Fax: 325 2579  
P. O. Box 1982, Boroko, NCD, Papua New Guinea

Publishing Weekly, Thursday, for  
Word Publishing Company Pty. Ltd.

Printed and published by Anna Solomon of Bittern Place, Gordons, at Allotment 2, Section 209, Spring Garden Road, Hohola, for Word Publishing Co. Pty. Ltd.

General Manager and Group Editor in Chief: Anna Solomon.  
Advertising Manager:

Papers distributed by air throughout PNG. Available by air mail subscription within Papua New Guinea and overseas.  
Email address: [word@global.net.pg](mailto:word@global.net.pg)


Editor of Wantok: Yakam Kelo.

Advertising deadlines. Display bookings: Tuesday midday. Camera ready copy: Wednesday midday. Classified Advertising: Wednesday 5pm.

Word Publishing Company Pty. Ltd. is owned by the four major churches of Papua New Guinea: Catholic 55%, Lutheran 25%, Anglican 10%, and United 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general terms acceptance are available at Word Publishing Company Pty. Ltd. and are set out in full on the reverse side of its official display Advertising Bookings form.







# NIUGINI AILAN NIUS



## Bakok pipel i sot long wara

MOA long 250-pela pipel bilong Bakok ples insait long Konoagil Lokol Level Gavman long Nu Ailan provins i nogat gutpela wara bilong dring inap foapela mun bihain long wanpela bikpela guria i bin kamap long Novemba las yia.

Ol pipel husat i stap long sikspela kea senta i wok long kisim wara long Yauh we ino gutpela bilong man long yusim bikos i gat planti tais i stap long em.

I gat bilip olsem i nogat ol malio, kindam na pis long wara Yauh bikos ol pipel i save kisim ol abus lna ol i save bagarapim wara ya tu.

I bin gat sikspela man husat i makim ol pipel bilong Bakok viles i go long Kavieng long lukim gavana bilong New Ireland, Paul Tohian bihain long gavana Tohian i mekim promis long saplain sikspela tu tausen galan wara teng i go long pipel.

Lokol wod memba bilong Bakok yet, Joel Tumundi i stap tu namel long toktok bilong kisim gutpela na klinpela wara i go long pipel bilong Bakok.

I gat bilip olsem grup ya i tromoim moa long K1,500 long go long Kavieng long dispela toktok.

## Global i kisim Nu Ailan Provinsal Gavman long kot ... bihain long em i brukim kontrak lo

WANPELA kampani bilong mekim ol rot, Gobal Limtet i kisim Nu Ailan Provinsal Gavman i go long kot bikos Provinsal Gavman i brukim lo bilong kontrak bilong kolta prosek insait long provins.

Menesing Dairekta bilong Global Ltd, Francis Awasa i tok em i bin kisim samon pepa long Waigani Nesenel Kot long givim i go long New Ireland provinsal gavman bikos ol i brukim lo bilong kontrak.

Redio Nu Ailan i ripot long Mas 5, 2001 olsem Provinsal

Gavman bai baim moa long K328,768 olsem kompensesen i go long Global Ltd long brukim dispela lo bilong kontrak.

Nu Ailan Provinsal Gavman i bin givim dispela kontrak i go long Global Ltd long putim kolta antap long 10 kilomita rot bilong Buluminski Haiwe, Namatanai taun na long Pire viles tasol Provinsal Gavman i rausim dispela kontrak long Global na givim i go long narapela kampani em Coecon Ltd.


Mista Awasa i tok olsem

kampani bilong em putim olgeta masin bilong em olsem greda, na ol narapela masin bilong kolta i go insait long Kavieng na wet long statim wok bihain Provinsal Gavman i rausim dispela kontrak long ol.

Provinsal Edministreta Moses Makis i tok em i no lukim dispela samon tasol em i tok dispela em hevi bilong gavman na ol yet bai gat sampela toktok bilong dispela hevi bihain long ol toktok wantaim ol loya bilong ol.

I bilip tu olsem ol sampela sinia memba bilong provinsal saplai na tenda bod i no bin stap long taim dispela Provinsal Gavman i tok orait long Coecon Ltd long tekova long dispela kontrak.

## Lambom i laikim nupela ples balus



Gavana bilong Niu Ailan, Paul Tohian.

OL PIPEL bilong Lambom Ailan long Nu Ailan i laik muv i go long narapela graun na tu ol i laikim nupela ples balus bihain long guria i bagarapim ples bilong ol long las yia.

Ol i bin mekim dispela toktok long Gavana Paul Tohian na deputi bilong em, Silas Sabagas long taim em i go lukluk raun long ailan i no long taim i go pinis.

Dispela em i laik bilong ol pipel bihain long wod memba bilong ol Abiuda Eron i holim sampela miting long luksave long sampela bikpela projek long helpim ol pipel bilong Lambom.

Em i tok ol pipel tu i laik muv i go long seif eria long abrusim taidel wev o bikpela solwara long taim bilong guria wankain olsem dispela dispela i bin kamap long Novemba 2000.

Mista Eron i tok olsem ol i laikimples balus long Lambom bikos dispela bai givim sans long pipel long Konoagil LLG eria long wokabout bilong ol namel long Matop long Kandas i go Rarh long Lak.

Presiden bilong Konoagil Lokol level gavman, Selman Amos i tok olsem dispela singaut bilong Lambom pipel em i bikpela na em i sapotim stret.

## Nogat lo bilong LLG

DEPUTI Gavana na Siaman bilong Lokol Level Gavman, Silas Sabagas i bin tokim ol presiden na menesa bilong nain-pela Lokol Level Gavman insait long Nu Ailan provins olsem i nogat gutpela lo i stap insait long Provinsal rifom sistem long taim em i bin kamap long 1995.

Mista Sabagas i bin tokaut olsem em i wanpela hevi we ol pablik sevan na ol ligel opis i mas lukluk insait long em.

Admisnistreta, Moses Makis i tok em i tru olsem LLG i nogat pawa long putim lo bilong kisim takis bikos i nogat wanpela lo long traim lukluk long dispela hevi.

Em i tok em i laik lukim ol wok bilong olgeta projek i



Edministreta bilong Niu Ailan, Moses Makis.

mas kamap insait long Ogenik Lo na dispela pro-

grek we i bin kamap mas i gat ripot we ol Provinsal Asembli i ken lukim tasol nau yet dispela lo i no save kamap.

Dairekta bilong LLG Ben Remeson i tok planti LLG wok insait long dispela Ogenik Lo i no stap na mas gat ejen luksave long dispela i kam long provinsal gavman.

Deputi gavana Silas Sabagas i tok i gat rong insait long Legislativ proses bilong Lokol Level Gavman insait long provins we i no pinisim yet.

Em i tok olsem em i laik lukim olgeta Lokol Level Gavman i mas wok long en na bihain bai tok orait long dispela lo.

## WANTOK

NIUSPEPA BILONG YUMI OL PAPUA NIUGINI STRET

P. O. Box 1982, Boroko  
Telepon namba: 325 2500  
Feks namba: 325 2579  
email: word@global.net.pg

### PE BILONG WANPELA YIA 52 NIUSPEPA

PLES	AIR
PNG	K 68.00
Ostrelia na Nu Silan	US\$46.00
Esia Pasifik na Japan	US\$55.00
Amerika na Yurop	US\$95.00

### Biabia



## Provinsal gavman i rausim etvaisa

NU Ailan Provinsal Gavman i rausim Provinsal Teknikel advaisa bilong en, Margaret Haverava

Provinsal Gavman i bin rausim Misis Haverava na man bilong em bihain long em i no bihainim lo bilong givim kontrak i go long kontrakta, Bene Enteprais long bildim wanpela opis bilong Kavieng distrik we kos bilong em i moa long K500,000.

Provinsal Edministreta Moses Makis i tok long mekim wanpela wok painaut insait long dispela kontrakt bihain em i bin painimaut olsem i nogat mani bilong wokim dispela pro-

jek.

Em i tok olsem Provinsal Eksekutiv Kaunsil i bin basetim sampela mani bilong dispela prosek las yia, tasol sampela wokman insait long provinsal edministresen i tok i nogat wok bung namel long ol narapela divisen long kamapim dispela projek bipo long ol i givim tok orait long karimaut.

I gat bilip olsem Menesing Dairekta bilong Bene Enteprais, Peter McEwan i laikim kompensesen bilong bagarapim kampani bilong em na tu sampela wok kampani i mekim pinis long projek ya.

## Ol NGI Developmen samit bai kamap long Kavieng

MOA long 200 bikman insait long Nugini Ailan rijen bai bung long Kavieng, biktaun bilong Nu Ailan provins.

Rijinel Developmen Forum bai kamap long Peter ToRot hal na bai stat long Epril 25 inap long 27.

Konsaltativ implimentesen na Monitoring Komiti (CIMC) Siaman


Moi Avei i go pas long dispela forum.

Het tok we ol bai toktok insait long dispela forum o bung em long Strongim ol Lokol Level Gavman."


Ol lain long Nesenel, Lokol level gavman, ol bisnis haus, ol sios na ol arapela grup na wan wan man i gat laik long stap insait long bung bai

i go, ol ripot i tok.

Provinsal Edministreta bilong Nu Ailan Provinsal Gavman Moses Makis i tok bikpela samting we forum ya i tingting long en em long kamap wantaim wankain luksave long sait bilong kamapim developmen long ol bikpela eria o ol samting insait long rijen.



# SEPIK NUIS



## Sevei wok long Karaite-Miwaute-Lumi Rot

TRIPLELA rot enjinia bilong wanpela konstraksen kampani bilong Indonesia i bin wokim wanpela rot sevei long Karaite long Aitape i go olsem long Fatima long Lumi insait long Sandaun provins.

Wokabaut long sevei wok i bin kamap long Trinde Mas 12.

Ripot i kam long Didacus Wilei husat i bin mekim tu dispela wokabaut i tok ol lain husat i bin stap insait long dispela wokabaut em Honorebol memba Eddie Saweni, tupela opisa bilong em en Henrick Werwei na Hank Yakai, Lumi sab distrik Etnimistreta, wanpela plisman na

17 plesman bilong Miwaute.

Dispela wokabaut i bin kisim wanpela wik na tripela de. Ol bin go kamap long ples Miwaute long Mas 19.

Mista Wilei i tok Mista Saweni i bin wokim sampela toktok long ol pipel we em bin tok dispela em bai namba wan taim bilong dispela kampani bilong Indonesia we bai i karimaut ol wok bilong stretim rot long kam insait long PNG.

Kampani i tok em bai traim bes bilong em long wokim dispela rot.

Wok long dispela rot bai kos K3 milien long en.

Mista Wilei i tok Mista Saweni i bin tokim ol pipel olsem em bai putim sampela antap long dispela K3 milien bilong dispela rot.

Em i tok enjinia bilong dispela kampani bilong Indonesia i tok bikpela hap mani bai i go long baim ol wokman long en.

Long Fonde moning Mas 20, sevei grup i bin surikim gen sevei wokabaut bilong ol i go long Miwaute na i go kamap long Lumi na bihain long Fatima.

Miwaute-Lumi-Fatima em i ring rot i stap insait long Karaite-Lumi rot projek fanding.

## Ali ailan sentineri selebresen

### JACKLEEN TILI i raitim

OL pipel bilong Ali, Sele na Angel ailan i bin selebretim 100 yia bilong ol miniseri i go long dispela tripela ailan long Jsta Sande.

Long dispela taim tu ol i tingim ol Katekis husat i bin stap na helpim ol misineri taim ol i bin kam.

Ol pipel bai putim wanpela nem-plet we i gat ol nem bilong ol Katekis we i bin helpim ol misineri long wok bilong ol.

Dispela nem-plet bai stap arere long matmat nau lukluk long haus lotu we ol manmeri i ken lukim na tingim gutpela wok ol i bin mekim. Peris

Pris bilong dispela tripela ailan, Pater Timothy Elliott, i tok ol lain i stap long ailan i bin wokim planti gutpela wok long rereim dispela de.

Pater Timothy i tok: "Sentineri bilong mipela i makim 100 yia bilong traim hat, i no olsem mipela i win, em olsem mipela i traim yet na mipela i noken givap."

Pater Timothy tok olsem mipela tu i onarim ol Katekis long dispela taim long givim laip bilong ol long ranim laip bilong mipela i go yet.

Long 1901 ol Pater bilong SVD i bin kamap long Ali ailan na kamapim wok misin long tripela ailan. Misin wok

long tripela ailan i liklik, tasol ol Katolik manmeri i bihainim tru ol tingting na toktok bilong sios.

Long taim bilong Wol Woa 2 ol Japan i bin kalabusim ol misineri tasol ol Katikis i bin sanap strong na i bin karimaut ol wok bilong sios long taim bilong woa. Bihain long woa, long 1952, ol Franciscan Paster i bin kisim ples bilong ol SVD na ol Franciscan i stap i kam inap nau.

Long Ali Ailan ol i bin holim wanpela lotu long makim dispela sentineri. Bipo long lotu i stat ol bin holim prosasio long nambis i go long haus lotu na long haus Pater. Ol i makim namba wan

taim ol misineri i bin kam putim lek long nambis. Insait long lotu ol lapun lain i bin kamapim ol gutpela Latin singsing, we i mekim lotu i pulim tingting i go bek long taim bipo.

Bihain long lotu i bin gat ol tumbuna singsing, drama na ol kainkain pilai nabaut long pinisim dispela de. Long taim bilong hamamas ol manmeri i bin bilas nogut tru na ol lain husat i bin stap long selebresen i no inap long tingting long dispela de.

Ol pipel bilong Sele na Angel ailan i bin kam insait long strong na amamasim dispela sentineri wantaim ol Ali.

## Ol PNG NGO manesa sindaun long kos long Australia

MANESA bilong Konsevesen progrem bilong Aitape Daiosis Cosmas Makamet i kam bek long tripela wik manesmen trening kos long Australia.

Australian Kaunsel bilong Ovasis Eid (ACFOA) i bin sponsaim Mista Makamet long dispela kos. ACFOA em i mama bilong ol Non Gavman Ogenaisesen long Australia.

Ol bin holim kos long Kenbra.

Dispela kos i bin sut long trenim ol NGO lida long PNG long kamap olsem ol gutpela manesa husat i lukautim ol wok gut.

Ileven pipel bilong ol NGO grup long PNG i bin sindaun long dispela kos.

Mista Makamet i tok ol bin kisim skul long manesmen sistem. plening. edministresen, fainensel

manesmen, etvokesi na netwok wantaim ol arapela ogenaisesen.

Em i bin tok long wik tu bilong ol, ol bin brukim ol i go long tupela grup na salim ol i go long Sidni na Melbon long kisim fil ekspirians.

Mista Makamet i bin wokim fil wok wantaim Australia Faundesen bilong Esia Pasifik long Sidni.

Long wik tri, em bin go bek long Kenbra na ol bin serim ol ekspirians bilong ol wantaim wanpela arapela.

Em i tok dispela em i wanpela gutpela kos stret na em i tok sapos sans i kamap i gutpela long ol arapela manesa long Aitape Daiosis i sindaun long en.

Em i tok i moabeta long ol manesa i kisim dispela kain trening long manesim ogenaisesen we i

karamapim ol woklain, ol mani na tu bai strongim ol woklain long karimaut gutpela wok long ol wan wan wokples na eria bilong ol.

Em bin tok bai gutpela moa sapos PNG i gat wanpela grup olsem ACFOA we bai olgeta NGO ogenaisesen long kantri i ken kam aninit long en na tu em i ken kamapim ol ol we olgeta i ken bihainim.

Em i tok ol lain husat i bin sindaun long kos ya i wok long laik kamapim wanpela grup olsem ACFOA.

Kos i bin stat long Mas 17 na pinis long Epril 4.

Long taim bilong greduesen, Foren Afeas Minista bilong Australia Alexander Downer i bin givim ol setifiket pepa long ol wan wan bilong ol lain i sindaun long kos.

## Leba Dipatmen kisim askim long sekim Vanimo Fores Prodak

### WINIS MAP i raitim

WANPELA komyniti lida bilong Bewani insait long Sandaun provins i singaut strong long Leba Dipatmen long salim ol opisa bilong em i go long Vanimo na karimaut ol wok painimaut long Vanimo Fores Prodak (VFP) na maski long askim VFP manesmen long go long Mosbi long stap insait ol wok painimaut olsem dispela i kamap insait long las tupela wik long en.

Ol samonim pinis tupela sinia manesa bilong VFP i kam long Mosbi tupela wik i go pinis.

Wanpela risos papa bilong Bewani em Bob Namah i tok Leba Dipatmen i ken kisim ol gutpela ripot sapos em yet i salim ol opisa bilong ol i go long Vanimo na mekim ol wok painimaut.

Mista Namah i tok gavman inap long painim planti samting i no stret sapos ol opisa bilong em i go long painimaut ol samting we samting olsem 600 ol ol foma wok-

lain i bin putim ol komplem long en.

Ol dispela foma woklain ya i bin putim komplem olsem kampani i no rausim ol long gutpela as na tu, ol i no bin givim gut pinis pe taim ol i rausim ol.

Leba Dipatmen i luksave pinis long komplem bilong ol na i wok long karimaut wok painimaut long en.

Mista Namah i tok stat yet long taim kampani i harim olsem ol foma woklain i putim ripot i go long Leba Dipatmen, ol i wok long pinisim planti ol woklain bilong ol long Esia, moa yet ol dispela bilong Indonesia na Malesia.

Em i tok ol bin kisim ol dispela woklain i kam insait long kantri wantaim nogat gutpela tok orait pepa.

Em i tok sapos gavman i bin hariap long mekim ol wok painim long dispela, em inap long painim ol dispela samting i no stret long ai bilong em yet.

Planti long ol dispela woklain i bin bihainim rot long Vanimo na ol

arapela i bin go olsem long Mosbi long go long wokples.

Mista Namah i tok Leba Dipatmen long pastaim tu i bin luksave long VFP na WTK Limitet olsem ol i gat asua long dispela eria bikos ol bin gat ol ausait lain i wok wantaim ol husat i nogat gutpela tok orait pepa wantaim ol.

Long Jun 19, 1995 Leba Dipatmen i bin salim wanpela pas i go long Jenerel Manesa bilong VFP na etvaisim em olsem kampani i gat ol ausait woklain husat i nogat gutpela tok orait pepa i wok long PNG.

Provinsel Leba opisa Bill Jackson i bin salim dispela pas long Me 21 na 28 1995 olsem 15 iligel pipel i wok long VFP na WTL Limitet.

Bihainim dispela kampani i bin rausim dispela 15 pipel. Mausman bilong VFP Robert Yong i tok em i nogat save long dispela pas we provinsel leba opisa i salim long kampani. na em bin les long toktok moa long dispela samting.




## OL NIUELA DELTA TRAK

### WOKIM STRONGPELA WANTAIM PAWA BILONG TOYOTA

Delta trak ol i wokim strongpela long kondisen bilong PNG wantaim pawa bilong Toyota disel engin. Delta trak ken kisim yu wantaim kago bilong yu long wanem kain hap yu laik go. Go long Ela Motors nau na lukim ol niupela Delta Trak. Em tu gutpela long yusim olsem PMV.

**Ela Motors**  
**DAIHATSU**

*Em nau... gutpela tru!*



## Sol Projek i kamapim paul tingting namel long Papa na Lealea

ALISON ANIS i raitim

IGAT paul tingting i wok long kamap namel long ol Papa na Lealea pipel insait long Sentrel provins olsem pasin we sol projek i no wok long stat hariap long en.

Dispela projek we i no bin nap long go het long ol yia go pinis bikos long ol hevi i kamap namel long ol papagraun na ol i kisim dispela samting tu i go long kot.

Minista bilong Tred na Indastri, John Tekwie i singautim ol papagraun long luk save long gutpela samting we bai projek i kamapim, na askim ol long stretim belhevi namel long ol yet na bai projek i ken go het.

Mr Tekwie i tok: "Toktok bilong mipela wantaim ol bisinisman bilong arapela hap, i orait tasol na ol i redi long stat. Wanpela hevi tasol em ol papagraun husat i kisim samting go long kot. I gat sampela kros long graun na mipela i laikim ol papagraun long kamaut long

dispela."

Mr Tekwie i tok moa olsem gavman i bin laik kirapim dispela projek tasol ol i bin no inap long mekim samting inap ol papagraun i stretim kros namel long ol yet.

Wok konstraksen i kamap pinis insait long sol projek long Konedobu. Dispela projek bai igat inap spes long kamapim 10,000 tan bilong aioidais sol.

Kantri Saina i sapatim dispela K25 million projek we Tred Koporeisen bilong Saina bai givim mani long kirapim projek.



• Minista Ebenosi i lukluk long wanpela ples man i kisim wara. Dispela wara i no gutpela, em i miks wantaim solwara.. Foto: POU TOIVITA.

## Eda Hisiu i lukluk long divelopim Papua rijen

WAN dei kibung bilong glasim divelopmen long Papua rijen i bin kamap insait long Pot Mosbi long dispela wik.

Dispela kibung em wanpela nupela wimens grup bilong Papua rijen i bin kamapim na ol i kolim long Eda Hisiu grup. Mining bilong Eda Hisiu i olsem; 'ol hevi bilong yumi.'

As tingting bilong dispela kibung i bilong pulim ol lain igat bikpela save na ekspiriens long kam wantaim na divelopim ol rijen bilong ol.

Ol samting ol i bin toktok long em i stat long kain sindaun bilong tude na integrol divelopmen na i go long wei bilong strongim ikononik na long kamapim gutpela gavman.

Presiden bilong Wimen Nesinol Kaunsil, em Susan Satae i bin openim dispela kibung.

Long toktok em givim, em i tok olsem i bin wanpela gutpela taim bilong kamapim dispela kain grup we i lukluk klostu long stap blong rijen long bipo i kam inap nau.

Mrs Satae i givim tok amamas bilong em i go long ol meri Papua

husat i holim kainkain wok, long soim interes bilong ol long kamapim Eda Hisiu. Em givim tok helpim long ol long kamap strong na go het insait long nupela milenium. Em i tok: "Ol dispela meri i bin kirap na luksave long trupela samting we dispela Papua rijen i no bin bisi long em na klostu i lus."

Em i tok moa olsem em i bin wanpela salens na ol meri i bin kirap na luk save olsem, ol bin asua na lus tingting long we ol kamap long em, ol bin lusim graun bilong ol na ol samting we i bilong ol stret.

"Nau, sapos yu lukluk, ol Papua i olsem ol lain bilong sanap arere tasol na lukluk, ol i olsem ol lain bilong narapela hap na ol wokman tasol antap long giraun bilong ol yet.

"Yumi antapim bus narapela, yumi pait long spes long ol maket na yumi pait long graun antap long graun biong yumi yet," Mrs Satae i bin tok. Charles Maino husat i bin sief ombudsmen pastaim, i bin pasim dispela kibung bihain long em givim pinis toktok bilong em.

## Ol Kiriwina/Gudinaf pipel i kisim ol nupela tengwara

OL PIPEL bilong ol liklik ailan long Kiriwina/Gudinaf ilektoret insait long Milen Be i kisim helpim long sait bilong helt, edukesen na rot sevis i kam long memba bilong ol William Ebenosi husat tu i Minista bilong Sosel Welfea Sevis.

Minista Ebenosi i bin mekim wanpela wokabout i go long ol ailan olsem Simsimla, Minuwata, Kuyawa, Kaisiga, Giva/Labola na Kudawaga na ol ples

insait long Kaileuna kaunsil eria.

Ol pipel long ol dispela ailan i no save kisim gut ol gavman sevis na nau memba bilong ol i wok long givim bikpela helpim long skruim ol sevis i go long ol ailan ya.

Dispela em insait long foapela krismas nau em i stap olsem nesenel memba bilong Kiriwina/Gudinaf.

Long wokabout bilong em i go long ol

ailan las wik, Mista Ebenosi i bin givim ol pleslain ol 4,500 lita, 9,000 lita na 1,000 lita tengwara i go long ol.

Dispela em i hap bilong namba wan wara saplai projek we em i bin kirapim long ol ailan las yia.

Ol ailan ya i save sot long gutpela wara bilong dringim bikos dispela we ol i save yusim i no gutpela long wanem em i miks wantaim solwara.

Pork Sausages per kg	K6.95	Australian Bush Biscuits 100gr	K0.50t
Brown Onions per kg	K2.83	Sunshine Milk Soft Pack 200gr	K2.85
Kelloggs Corn Flakes 150gr	K3.49	Weet Bix 750gr	K7.10
Heinz Baked Beans 420gr	K1.82	Max Beauty Soap 80gr	K0.59t
Close Up Toothpaste 40gr	K1.44	Bongos 25gr	K0.35t
Maggi Noodles 85gr	K0.50t	Suncrush Cordial 750lml	K1.99

*Hamamas na baim kaikai long Boroko Foodworld Gordons!*

Planti moa kaikai prais i go daun long en!  
Ph: 325 7566, 325 7310 Fax: 325 7096

**EXTENDED TRADING HOURS**  
 Monday to Wednesday - 8.00am to 7.30pm  
 Thursday / Friday - 8.00am to 8.00pm  
 Saturday / Sunday - 8.00am to 7.00pm



# HAILANS NIUS



## Distrik edukesen bod surikim miting

HELEN REI i raitim

ISTEN Hailans provins i bin kamapim wanpela insurens polisi bilong ol skul insait long provins tasol planti manmeri insait long komyuniti na skul i komplem na ol bikman bai sindaun gen bilong toktok moa na skelim wanem em gupela rot bilong stretim dispela insurens polisi toktok long Me 9.

Dispela miting inap kamap dispela wik tasol i gat wanpela miting bilong Provinsel Edukesen edvaise na siaman miting we bai kamap long Mt Hagen.

Dispela insurens polisi em ol i kamapim long dispela yia tasol planti komyunit na skul i gat belhevi liklik na ol atoriti bai sindaun toktok gut na stretim dispela hevi bipo long dispela insurens polisi i kamap gut na wok.

Ekting Edvaise bilong Edukesen John Kipot i tok Distrik Edukesen Bod miting em ol i surikim i go long

Me 9.

Mista Kipot i tok olsem em i harim olsem ol bod bilong olgeta praimer na elementri skul insait long provins i bin givim wanpela petisen long Gavana Peti Lafanama tasol em yet i no bung na toktok wantaim gavana yet.

Petisen ya i tok long ol mani bilong skul fi sabsidi bilong yia 1999 we sampela skul i no kisim yet i kam inap nau.

Em i tok em bai no inap toktok long dispela petisen bikos em i no sindaun na toktok wantaim gavana yet.

Mista Kipot i tok long sait bilong skul saplai bilong dispela yia olsem PNG Stationery na Office Supplies, husat bai saplain ol skul wantaim ol meteriel tasol em i no lukim yet wanpela meteriel. Tasol em i tok olsem em i kisim pinis wanpela toktok i kam long Seketeri bilong Edukesen Peter Baki husat tok em mas noken holim ol dispela saplai yet na givim aut long skul.

## Ol raskol sutim risev plisman long Enga

ENGA plis i wok hat tru nau long painim wanpela raskol grup husat i sutim na klostu tru kilim wanpela risev plisman bilong Wabag Risev Plis husat i flai igo pinis long Australia long kisim marasin.

Hailans Divisinal Plis Komanda Tony Wagambie i tok dispela risev plisman i stap wantaim ol narapela poroman bilong em long wok taim ol stil lain i bin sutim em.

Em i tok ol grup ya wok long sekim wanpela komplem we i tok ol sampela stilman i blokim rot na taim em i sekim raun, ol stilman ya i sutim em na ronawe.

Mista Wagambie i tok: "Plis i save pinis long sampela bilong ol dispela stilman na mipela bai holim pasim na kalabusim ol klostu."

Em i tok ol plisman i bin go long dispela ples bilong birua taim ol i harim olsem i gat wanpela rot blok long dispela hap na ol i stretim dispela rot blok. Tasol ol i harim gen olsem dispela sem stil grup i holim ap sampela ka na taim ol i kam bek gen long sekim, dispela birua i kamap.

Mista Wagambie i tok tu olsem

plis i wok long toktok wantaim siksipela man husat plis i bilip olsem ol i kilim i dai wanpela plisman bilong Kainantu.

Em i tok ol dispela siksipela i stap nau long han bilong Wini Henao husat i PPC bilong Isten Hailans tasol plis i no sasim yet ol dispela man.

"Long nau yet mipela i no sasim wanpela bilong ol dispeal man yet tasol taim mipela askim ol pastaim na bihain bai mipela sasim ol," Mista Wagambie i tok.

Long wankain taim em i tok amamas i go long olgeta hailans komyuniti bilong nogat wanpela lo na oda hevi i bin kamap long Ista Wiken insait long rijen.

Em i tok olsem olgeta sios long wanwan taun na komyuniti i pulap stret na long rot planti ka i wok long karim ol yangpela raun i go long bung na kemp nabaut long dispela longpela Isten wiken.

"Mi ting dispela kain pasin i moa gupela long stap long sios. I no gupela long ol i raun nating nating.

"Mi amamas long lukim olsem planti yangpela i tingting long sios nau," Mista Wagambie i tok.

## Gavman sevis long Kandep i bagarap

WANPISIN pait i mekim na planti gavman sevis insait long Kandep i bagarap.

Wanpela bilong tupela hauslain husat i pait nau i stap i papa bilong graun we Kandep stesin i stap long en na dispela mekim mekim na planti gavman sevis i kisim bagarap.

Bikpela bagarap long dispela pait i go long edukesen sevis bilong ol yangpela bihain long Kandep Top-up komyuniti skul, Andait Vokesenael Senta na ol skul i stap klostu long ples bilong pait tu i pas na planti sumatin i kisim taim.

Kandep Hai skul i wok long stap yet bikos olgeta tisa i bilong dispela eria yet na ol i promis olsem ol i laik givim save i go long ol pikinini.

Narapela pait insait long Wapenamanda namel long Iliogon n Waiminakuni wanpisin i kamap long wanpela meri tasol na moa long 100 man i dai pinis. Wanpela man klostu long dispela ples bilong pait i tok long wanpela meri tasol na ol planti man i longlong na lusim laip bilong ol.

Keateka Edministreta bilong Enga Kundapen Talyaga wantaim PPC bilong Enga John Anawe i go long eria long traim kisim tupela paitlain i kam wantaim tasol tupela lida bilong pait haus lain i no bin kamap long dispela bung.

Mista Talyaga i askim tupela sait wantaim long lusim ol samting bilong pait, givim kompensesen i go i kam na pinisim dispela pait tasol nogat wanpela man i hairm tok bilong em.

Ripot i tok olsem i gat ol man bilong narapela haus lain husat i pait long kisim pe tasol wanpela o tupela bilong ol dispela kain man i dai o sampela i kisim bagarap long ol dispela pait.

## Stretim pablik sevans long Enga

KEATEKA edministreta bilong Enga Kundapen Talyaga i tingting strong long klinim olgeta pablik sevans husat i no mekim wok bilong ol gut insait long Enga.

Em i mekim dispela toktok long olgeta manmeri na pablik sevans insait long Gutnius Lutheran Sios olsem i gat planti pablik sevans husat i no save mekim wok bilong ol gut na planti gavman bilong Enga i wok long pundaun na dispela ol pablik sevans i stap yet insait long sistem.

"I gat ol man husat i mekim na (Daniel) Tindiwi na (Jeffrey) Balakau i raus long opis olsem gavana i stap yet insait long dispela pablik sevis.

"Em ol dispela sem man husat i bagarapim nau gavman," Mista Kundapen i tok.

Mista Talyaga i tok olsem keateka edministreta bai mekim wankain wok olsem provinsel edministreta na saplai sampela man givim em ba moa pawa long em traim long kamapim wanpela grup we bai lukluik raun long olgeta hap kona

bilong provins na givim sevis long olgeta manmeri.

Em i tok em les long rausim ol pablik sevans tasol em askim ol long husat man i pilim olsem em i gat asua, em mas risain.

"Talyaga i no save rausim ol man. Husat yu save olsem yu stil, paulim mani na narapela asua i stap wantaim yu mas sutim toktok long yu yet na risain," em i tok.

Em i tok planti pablik sevans i no luksave olsem ol i wok bilong famili bilong ol tasol ol i no luksave olsem ol i kalapim ol dispela na go stil long sait.

Em i tok ol sapota i mas luksave olsem em na Gavana Ipatas i bilong wanpela Apulin hauslain na ol i mas noken traim long brukim dispela.

Em i tok Mekere gavman i makim em bilong stretim sampela wok na noken wanpela man i mas traim long bagarapim dispela.

Mista Talyaga i askim ol pablik sevans long noken sapotim wanpela o narapela. Ol i mas stap tasol bilong helpim ol manmeri.

Em i no inap paulim



Gavana Peter Ipatas bai go kot long Epril 26 long sas bilong paulim mani bilong provinsel gavman

ol manmeri bilong Enga, yumi wokboi bilong ol na yumi mas mekim olgeta samting yumi ken long helpim ol," em i tok.

Em i tok pablik sevans i mas noken tingting long kisim wanpela bekim long wanem wok ol i mekim.

Mista Talyaga i no tok klia wanem taim em bai stat klinim pablik sevans insait long provins tasol ating dispela bai stat bihain long disisen bilong kot long harim bilong Gavana Peter Ipatas long Epril 26.



Orogen

## ANUAL MITING

Toksave i go olsem Anual Miting bilong ol memba bilong Orogen Minerals Limited bai kamap long Pot Mosbi Parkroyal Hotel, Bolrums 2, 3 & 4, Hunter Street, Pot Mosby long Fraide, Mei 4, 2001 long 10:00 kilok long moning.

MICHAEL UIARI  
Company Secretary

# Madang News



## Raikos sumatin bai kisim helpim long memba Igam tok em i siaman bilong PNG Ridres

OLGETA sumatin bilong Raikos husat i stap nau long yunivesiti na narapela koles insait long kantri bai kisim sapot i kam long memba bilong ol Stahl Musa long dispela yia na long ol yia i kam.

Mista Musa i bin mekim dispela tok long opisal opening bilong Bambu Top-up praimerl skul long Teptep sabdistrik bilong Raikos distrik

Bambu praimerl skul i stap maunten eria bilong Teptep na Gorowan we bai kisim olsem 20 minit long flai long balus long Saidor we i hetkquata bilong Raikos distrik.

Wanpela bilong tupela klasrum bai ol gret 5 na 6 i yusim na narapela em ol gret 7 na 8 bai yusim.

Madang Provinsel Gavman i bin givim K6,000 na Mista Musa i givim K3,000 bilong sanapim wanpela bilong ol dispela klasrum na narapela klasrum em mista Musa yet i fandim wantaim K50,000 we bai lukim ol gret 7 na 8 i stap long en.

Dispela ol wok inap kisim moa mani tasol ol manmer bilong ples i wok nating na tu ol i bin katim

ol timba bilong klasrum long diwai bilong ol yet.

Mista Musa i tokim moa long 3,000 manmeri husat kamap long dispela bung olsem save i no stap long taun tasol, save i stap wantaim ol manmeri long bus, nambis na wanem hap ol p[ilpel i stap long en.

Em i tok edukesen em i olsem wanpela mani yu oputim i go insait long benk o wankain olsem yu planim kopi o kokoa na bihain bai pikinini inap helpim yu.

Mista Musa i tok edukesen em wanpela nam-bawan eria em i ting na long foapela yia i go pinis, em i givim aut oslem K100,000 pinis long helpim olgeta sumatin bilong Raikos husat i stap long ol yunivesiti na koles insait long PNG.

Em i tok i no hatwok bilong em tasol, ol papamama i mas helpimlong ol praimerl, hai skul na sekonderi na taim ol pikinini i winim ol dispela mak, dispela em wok bilong em long helpim ol.

Em i askim olgeta manmeri long lukautim ol samting insait long skul bikos em skul bilong ol na skul bai helpim ol tu.

PNG Ridres Asosiesen i gat bruk i kamap bikos Thomas Igam bilong Madang i tok em i siaman bilong asosiesen na ol i rausim pinis olpela siaman Gabriel Laku.

Mista Igam i tokim Wantok olsem em i gat olgeta pepa i soim olsem PNG Redres Asosiesen i rejista pinis wantaim IPA na ol eksekutyu bilong em i sanap pinis wantaim long

mekim wok.

Mista Igam i tok opis bilong Praim Minista i kisim ol pepa bilong em na tu olgeta Gavana i gat pepa bilong em we i singautim Japan Gavman long peim

kompensesen long ol lain i bin kisim bagarap long wol woa 2 insait long Papua Niugini.

Mista Igam i tok olgeta membas bilong PNG Ridres Asosiesen i mas save olsem em i siaman bikos ol i rejista pinis na Gavman i luksave long pepa bilong ol.

Em i tok long kotim Gabriel Laku long bagarapim nem bilong em.

Mista Igam i tok ol i lukluk long opim asosiesen i go bikpela long hap bilong Morobe na ol arapela provins. Long sait bilong Sepik na Madang em ol i gat ol membas na ol brens pinis.

Em i tok opis bilong Praim Minista i tokim em pinis long olgeta wok na ol samting we i sut long ol toktok bilong ol long kisim kompensesen i kam long Japan Gavman. Na em i amamas na wet isi tasol i stap.



• Ol pikinini na ol papamama bilong ol i stap insait long wanpela woksep we i bin kamap long Budua Risetelmen kea senta. Dispela i soim gutpela wokbung namel long ol pikinini na ol bikmanmeri.

## Skul saplai bagarap long rot

TRIPELA kontena bilong skul saplai bilong ol skul long Madang i kisim bagarap long rot taim ka i kapsait namel long Madang na Lae na ol stilman i rausim na bagarapim ol saplai.

Ol sampela saplai we i stap yet long dispela bagarap i stap nau long Lae.

Dispela ol saplai i bagarap tam ka i kapsait las mun na olgeta saplai we PNG Stationery na Office Supplies, kampani we i winim kontrak bilong saplaim skul meteriel long Momase, Hailans na Niugini Ailans i traim long kisim ol dispela skul saplai long Lae i go olsem long Madang.

Ray Thurecht, Menesing Dairekta bilong Hr Holdings i tok olsem ol meteriel bilong skul insait long tripela kontena olgeta i bagarap na wanem hap i stap yet long en i stap nau long Lae.

Insurens kampani i karamapim kos bilong traim na kisim ol dispela meteriel gen tasol sampela mani moa i no stap bilong karamapim olgeta kos bilong kamapim ol nupela saplai.

Edukesen Edvaisa bilong Madang Bill Sei i tok long dispela samting olsem Madang i no kisim yet wan-

pela bilong ol dispela saplai tasol em i bin kisim pinis wanpela toksave i kam long Edukesen Seketeri Peter Baki ong Mosbi olsem noken tasim ol skul saplai yet.

Mista Sei i tok em i harim olsem i bin gat tripela kontena i kam olsem long Lae tasol ol samting i bin bagarap taim ka i kapsaitim na sampela bilong ol dispela samting em ol i stil man i bagarapim.

Long wankain stori, i bin gat wanpela bung tupela wik i go pinis namel long ol papamama, tisa na edukesen atoriti husat i painim aut olsem dispela bung em ol i kamapim i wanpela politikal muv.

Long dispela miting, ol i painim aut olsem ol sampela tisa i no kisim pe bilong ol bikos edukesen opisa long Madang i no givim toksave i kam long Waigani.

Narapela toktok i olsem planti skul i no kisim yet skul fi subsidi bilong ol yet.

Mista Sei i tok olsem ol i salim pinis nem bilong ol tisa husat i stat long wok i kam long Mosbi bilong pe bilong ol tasol ol tisa husat i stat leit em pepa bilong ol i no redi yet.

Long sait bilong subsidi, i

gat tupela rot bilong givim dispela. Ol i ken baim stret saplai na givim long ol skul o ol wanwan skul i ken kisim mani na baim saplai bilong ol yet.

Mista Sei i tok planti skul i no bin givim ripot bilong mani bilong yia i go pinis olsem na planti skul i nogat ripot wantaim edukesen dipatmen yet.

Dispela ripot i mekim na ol dispela skul bai i no inap kisim mani stret tasol bai kisim helpim long sait bilong saplai.

Em i tok ol BOM na tisa i tingting long tromoi mani long laik bilong ol tasol dispela i no inap kamap.

"Wok bilong ol em long kisim fi long ol papamama na yusim dispela mani long wanem samting ol i laik baim bilong skul," Mista Sei i tok.

Em i tok mani i kam long provinsel na neseneel gavman em bilong ol sumatin stret na ol tisa ba BOM bai i no inap putim han bilong ol i kam insait long dispela.

Em i tok wanpela kampani i winim pinis kontrak bilong saplaim ol skul wantaim wanem saplai ol i laikim tasol em i no givim nem bilong kampani husat bai givim dispela ol saplai aut.

## Tisa noken painim eskus na raun nating

OL tisa i mas noken painim eskus long raun nating na kisim pe i stap na larim ol sumatin i kisim bagarap long dispela pasin.

Eking Edvaisa bilong Edukesen long Madang Bill Salbung i tokim moa long 300 manmer na tisa husat i kamap long opening bilong tupela nupela dabol klasrum long Bambu Praimerl Skul.

Em i bin sakim tu ol yangpela tisa husat i kam aut long ol kolis long tingting na traim aplai i go long ol bus skul long kisim eksperiens na tu skulim ol yet long mekim ol narapela samting.

Mista Sei askim ol tisa long lainim na traim kamapim narapela rot bilong skulim ol pikinini, sapos skul saplai i no kamap, ol gutpela tisa i no inap painim eskus long

pasim skul.

Em i tok sapos wanpela skul i nogat rula, ating i moa gutpela sapos ol tisa na sumatin i katim bambu, stretim na makim gut tru orait yusim olsem rula.

Em i kros long ol tisa husat i save stap nating na go kisim pe bilong ol long olgeta pe dei.

Em i tok taim em i pinisim skul long 1975 na stat skulim ol manki long Lumi Hai Skul, em bin yusim het bilong em long kamapim sampela samting long helpim ol sumatin taim ol sumatin i sot long wanpela samting na dispela wankain samting i mas kamap long dispela taim we i nogat saplai bilong skul.

Mista Sei i mekim dispela toktok bihainim wanpela protes mas bilong ol papamama na tisa tupela wik i

go pinis we ol i kirap na tok olsem olgeta saplai bilong skul insait long provins i pinis.

Em i tok sampela skul em i raun na lukim i gat sampela saplai i stap yet na ol tisa i noken painim eskus long raun nating na toktok saplai i sot tru.

Em i tok olsem sapos wanpela tisa i bikhet olsem bai em i no inap givim tok orait bilong em i ken kisim pe.

Olgeta i mas tingting gut na traim mekim wok bilong ol na em bai luksave olsem ol i go bek long wok pinis.

Mista Sei i tok ol tisa i tingting long sait bilong ol yet na ol pikinini i save kisim taim nating na long ol yia i go pinis, planti bod bilong ol skul i save komplem olsem ol tisa i wok long bikhet i tru na dispela i mas stap nau.

**trukai. RICE**

**HARIAP! Las Dro long 30th April!**

**Loki PAC\***

**SAPOS NAMBA BILONG YU ISTAP LONG HIA. YU WINIM K200**

F01400423	F01734600	C01177105	A01645609
D01144805	B01667912	B01569324	
C00783005	A01363369	F01837900	

LONG KISIM PRAIS BILONG YU. GO LONG TRUKAI DISTRIBUTION CENTRE.

HRD Savi 3901



# Lae Nius

## Lae pipel i mas luk-save long lo, Sete i tok

### YAKAM KELO i raitim

BOS bilong Lae plis Awan Sete i askim ol manmeri bilong Lae siti long luk-save long lo na bihainim. Mista Sete i mekim dispela toktok bihain long tupela bikpela pait i bin kamap we ol lain i no bin go lukim plis, tasol ol yet i kisim ol lain bilong ol na go bek kirapim moa birua long ol lain ol i gat kros-pait wantaim ol.

Mista Sete i tokaut long wanpela hevi we i bin kamap long Tent Siti we sampela man nogut i bin hensapim ka bilong Bilas Bakeri na sutim draiva bilong dispela ka. Draiva i dai na ol i kisim ka na ronawe i go long hap bilong PTC na lusim long hap na ronawe. Mista Sest i tok dispela draiva em bilong Simbu na ol lain bilong em i kam bek na long dispela hap birua i kamap long en long Tent Siti na brukim wanpela stua na mekim trabel long ol.

Mista Sete i tok sapos ol lain bilong dispela man i bungim birua i kamap long plis pastaim na tok-tok long ol bai planti samting i no inap go

bagarap o nogut bikos plis inap go pas long karimaut wok bilong ol long holim lo na oda. I tru ol plisman i kam insait na stapim dispela hevi i go daun liklik tasol bikpela samting em bikpela hevi na bagarap i kamap pinis long stua na ol lain long hap.

Narapela hevi em Mista Sete i tok wanpela man i bin sanap long dua bilong PMV bas na boskru i rausim em tasol man ya i bin strong. Olsem na boskru i pusim em i go ausait na pundaun long kolta. Liklik sikirap long skin tasol em i go bungim ol lain bilong em na ol i go kamapim bikpela pait na trabel long ol lain bilong dispela PMV bas.

Mista Sete i tok ripot i bin kamap long plis stesin bihain long ol bikpela bagarap na trabel i kamap pinis long laip na sindaun bilong ol manmeri long komyuniti.

Mista Sete i tok sapos dispela man husat i bin pundaun long bas i go putim ripot long plis stesin, inap long ol plisman bilong em i ken go na traim holim dispela bas na stretim dispela

hevi hariap tasol long gut-pela rot.

Mista Sete i tok ol manmeri i mas save olsem i gat lo i stap long olgeta manmeri i bihainim na i gat ol plisman i stap long karimaut wok bilong

strongim ol. Wanem hevi i kamap em wok bilong ol plisman.

Ol manmeri i mas save olsem i gat lo bilong stretim ol hevi na trabel long han bilong ol manmeri, Mista Sete i tok.

## Angau Haus sik bin sevim pipel gut long Ista wiken

ANGAU Memorial Haus sik i bin op long pablik tasol sampela operesen bilong em i bin pas long dispela longpela Ista wiken.

Siep Eksekutiv Opisa bilong haus sik, Margareth Samei i tok dentel sejikel, TB/Leprosi na ai klinik i bin pas long wiken.

Na long arapela sevis long

eksiden imejensi riferel aut-pesins bilong ol bikpela manmeri na pikinini i bin op wantaim autpesen seksen i bin stap op.

Long imejensi yunit, Ms Samei i tok ol tu bin kisim ol eksiden lain na husat em sik nogut tru tasol em as tingting bilong wok namel long dispela longpela holidie.



• Taim bilong selebret! Ol Boana lain i karim traipela mama bilong pik long mumuim. File piksa.

## Morobe Edukesen Divisen kamapim nupela ripot

NUPELA Provinsel Progrem Edukesen Murika Bihoro i tok em kamapim wanpela ripot long wok bilong edukesen insait long Morobe Provins.

Mista Bihoro i tok Ekting Edministreta Manasupe Zurenuoc i bin askim em long kamapim dispela ripot long save gut long hevi bilong edukesen divisen.

Dispela ripot bai luk-luk moa long hevi bilong tisa, skul, na metrirel na glasim wantaim wok Lokol Level Gavman Kaunsel i ken mekim long helpim divisen bilong edukesen.

Nau yet Mista Bihoro i tok em i lainim samting bilong wok insait long opis provinsel edministresen bihain tasol em lusim Bugandi Hai skul olsem prinsipol long las wik tasol.

## Angau Haus sik sot long blut

CHIEF Eksekutiv opisa bilong Angau Memorial Haus sik Margareth Samei i askim pablik long kam givim blut i go long blut beng.

Em toksave haus sik i sot yet long olgeta grup na i gat planti manmeri nidim blut.

Ms Samei tok tu olsem ol wokman bilong haus sik bai skelim gut blut we ol i no laik hevi bai kamap insait long dispela wok.

Na long wankain taim tu em i bin askim ol pablik long stap isi dispela Ista holidie we long kain taim planti manmeri save bungim ol hevi.

Ms Samei tok Ista em taim bilong lotu na tingim dai bilong Jisas Kraist olsem pipel mas i noken kros o painim asua.



• Wara i stap na yumi i stap. Ol pikinini bilong Mutzing Distrik long Markham i amamas long waswas long tep wara. File piksa.

## Ista baibel tok mi laik i stap tempel - na i no matmat

ISTA em i no olsem ol arapela bikipela de insait long Kristen Kalenda. em i mekim klia ol tok tru na pasin bilong lotu wantaim ol gutpela pasin namel long ol manmeri baibel i gat olgeta tok wea pasin bilong politiks i wok long resis wantaim pasin bilong lotu, na pasin bilong i stap aninit long wangepela narapela i wok long resis wantaim hait birua pasin, na tok tru i wok long resis wantaim giaman pasin, Paul pasin i wok long resis wantaim klinpela pasin, gutpela tingting i wok long resis wantaim tingting nogut o belhat bel, na laip em i wok long resis wantaim i dai.

Dispela ol pasin insait long yumi yet i wok long resis wantaim arapela. Dispela kain resis em yumi wok long i go insait long en olsem tasol, Ista em olsem mun i gat tupela pes bilong en, narapla sait bilong en i stap tudak na narapela sait em i stap long laip.

Long dispela (wol) graun yumi stap long en em isi long stap long pasin sori, nogat pasin bilong hesi i kamap long dispela Sarere namel long gutpela Fraide na long Ista Sande em i kamap tam wea ol disaipel i kisim bikipela hevi, taim ol birua i holim pas Jisas na nilim em long diwai kros olsem man nogut.

Ol disaipel i wokabaut wanaim het bilong o i daun tru, na bel bilong ol i hevi tumas taim ol i kam aut long dispela anit bilong dispela Sarere, na i go insait olgea long bikipela senis-na gutpela Ista i makim matmat em i nogat man i stap insait.

Wanem tingting i stap long tingting bilong ol disaipel, em i abrusim na i kamap narapela kain olgeta bikipela samting kamap em ol disaipel i wokabaut i go lusim matmat na i go insait long nupela wok, bihain long ol i lukim matmat i nogat man i stap insait.

Ol disaipel i kisim gutpela tingting, nupela na strongpela pawa, bel bilong ol i kirap long mekim o kamapim nupela pasin bilong lotu wantaim stret-pela pasin, na wantaim pasin bilong givim bel long narapela.

Ol bai i no inap i stap wankain tasol nogat, ol i mas kamap tempel tru bilong God antap. Dispela strongpela laik bilong God papa i bin wasim olgeta giaman pasin bilong Pita and God i mekim Pita i kamap pren bilong en ken bel hevi na palnti tingting bilong tumas tu em i pinis taim olgeta taim bikipela i holim em.

Ol aposel husat i bin lusim bikipela na i rana we i go, nau Jisas i opim han bilong en na welkam long ol na bringim ol i kam long banis bilong en.

Ol i kamap senis tru na kamap "tempol bilong God". Ol i harim em i tok "sharom" bel isi i stap wantaim yupela! Long namba wan Ista, Jisas i givim em yet long yumi, tasol i no olgeta manmeri i redi long mekim kamap pren gen i gat sampela manmeri husat i stap, em i laik i stap matmat tasol na em i no laik i stap tempel bilong papa God.

I no inap long lukluk, i no inap long toktok, i no save wanem em i gutpela na wanem em nogut na tu em i no luksave wanem em i kristen pasin. Dispela kain apsin tasol yumi wok long putim Jisas i go bek gen long matmat.

Tude long dispela graun mipela manmeri i gat strongpela bilip olsem Jisas i kirap bek long matmat na em i stap laip. em i stap klostu na givim yumi helpim olgeta taim.

Long taim bilong ol Roman Gavman, ol i bin tambuim ol man long noken tokaut long irap bek bilong Jisas, saring i bin kamap 2000 krismas i go pinis.

Tasol Jisas em i ken kamap tru tru long dispela de na taim bilong yumi tude tu. Jisas em i no bikipela bilong aste tasol i no gat man i olsem Jisas - Jisas em i pe man bilong yumi, husat i bin kisim bek yumi - em i ken kisim bek yumi tude, tumora, na taim i kam bihain tu.



### Jisas i kirap bek

Orait ol i insait long matmat; na ol i lukim wangepela yangpela man i sindaun i stap long han sut. Em i gat longpela waitpela klos. Na ol i kirap nogut long lukim dispela man. Na em i tokim ol olsem, "Yupela i no ken kirap nogut. Mi save, yupela i kam bilong painim Jisas bilong Nasaret, em ol i bin hangamapim long diwai kros. Em i kirap pinis. Em i ino i stap hia. Lukim dispela ples ol i bin putim em long en. Tasol yupela i mas i go givim dispela tok long ol disaipel bilong en, na long Pita tu. "Jisas em i go pastaim long yupela long Galili. Yupela bai i lukim em long Galili, olsem bipo em i tokim yupela pinis."

Mak 16: 5-7

# Holi Ista nait lotu long Erima Katolik Sios i go

HOLI Ista Lotu long Mosbi long Sarere nait i bin go gut tasol long planti ol sios insait long siti, maski bikipela ren i pundaun.

Ol Sios sevis insait long siti i bin stat long siks na seven kilok na sampela long 10 kilok nait i go inap.

Na maski bikipela ren i bin pundaun long samting olsem hap siks nait, dispela i no stapim ol bilip manmeri insait long siti long go long ol

sios sevis pulapim gut ol haus lotu na stap insait long ol sios sevis olsem i save kamap long olgeta Ista taim.

Erima Katolik Sios long Nesenel Kapitel em i wangepela Sios we ol kongrikese i save wok bung gut wantaim long redim ol liteji, karimaut ol wok bilong helpim sios, ol wok metenens bilong stretim sios bilding na tu ol projek bilong mekim sios eria i luknais na ol sios

membra i ken go na wokim gut lotu bilong ol.

Wangepela samting tasol we kongrikese i no bin amamas long en em bonpaia o Ista paia we ol i save laitim ausait long sios na wokim lotu bilong em yet bipo Ista liteji i stat i no bin kamap ausait olsem ol i redim long detaim bikos long bikipela ren we i bin pundaun long taim bilong Holi Ista sevis. Tasol ol singsing long

Misa lotu i bin kamap gut tru bihainim gutpela wok redi we ol Niugini Ailan rijen grup i bin redim na go pas long en.

Gutpela nek bilong ol manmeri na pikinini wantaim i singsing i bin pulapim sios na spirit bilong Ista i bin kamap strong long dispela taim.

Pater Paul Liwun husat i Peris Pris bilong Erima i bin strongim ol bilip manmeri long sevis

long kisim strong long Lait bilong Ista we i makim Jisas i kirap bek gen long indai.

Sios i bin lait gut wantaim lait bilong kandel taim we olgeta sios memba i bin laitim na pawa lait em ol i autim long makim yet amamas bilong nupela lait bilong Jisas i kirap bek.

Bikos long sait bilong sekyuriti sampela long mipela i no save go long nait sevis long ol bikipela de olsem Krismas na Ista tasol long dispela Ista, mipela i bin strong na wokabaut i go long Erima Sios long stap insait long nait lotu.

Na mi bilip olsem Bikipela i bin stap wantaim mipela na lukautim wokabaut bilong mipela i go na i kam bek long haus we i stap olsem 20 minit longwe long Erima long 9.30 nait.

Bel bilong mipela i bin amamas na dispela gutpela piling i bin pulapim mipela taim mipela i wokabaut i go bek long haus.

Ren i bin pinis na ples i bin stap isi, nogat nois, meknais na trabel na ol spakman i bin stap nabaut taim ol lain i pinis lotu na wokabaut i go bek long haus bihain long nait lotu long Holi Ista Sarere nait long Erima Katolik Sios.



• Pater Paul Liwun (namel) wantaim Fr Francis na Fr Paul Tapabalar amamasim misa long Ista Sande long St Peter Erima sios.

## Ol sosel kastam bilong tude i salensim sios

"Long save long Jisas i min olsem yumi tanim i go long nupela laip", Jenerel Seketeri bilong Wol Council ol Sios (WCC), Reveren Dokta Conrad Raiser, i tok insait long bung i kamap long Cook Ailan Kristen (CICC) long Avarua, Rarontonga long Sunday, March 25.

Dokta Raiser i bin raun i go long Rarontonga long wokabauti go long Pasifik rijen we i bin stat long Samoa na American Samoa long 19 igo nap long 23 Mas na pinis wantaim tupela de wokabaut long Tahiti long Mas 28 na 29.

Dokta Raiser husat i go pas long WCC delegeesen i bin kisim toksave long ol salens we i bungim ol sios bikos long ol nupela senis i wok long kamap insait long komyuniti.

Long tokples bilong em i tokaut olsem "bilip bilong yumi mas oltaim senis o kamap strongpela olsem pasin kastam bilong yumi."

Dokta Raiser i tok wokabaut bilong em long WCC memba sios long olgeta hap bilong wol i olsem; "pastorel wokabaut we i wankain olsem ol visit ol pasta i save mekim long ol peris memba bilong em."

Long ol toktok i kamap long Mande Mas 26, wantaim Horebol Ngamau Muokoa, husat em gavman minista lukautim Rilijes Afeas, ol meri, yut, spot na pablik wok, na tu WCC delegeesen i bin kisim toktok olsem gavman na sios i serim ol wari long

hevi we ol nupela pasin, senis na ol samting i bringim long ol lokal komyuniti, wantaim pasin bilong trentosim ol nuklia pipia i save kam olsem long Pasifik rijen, na domestik vaiolens.

Tasol ol memba blong Relijes Edviseri kaunsil husat tu i bin kamap long miting i tok tu long ol kankain toktok i kamap namel long sios na gavman long nid bilong senisim Sande lo, ol tok tupela sait i no wanel long larim wok long Sunday.

Long toktok wantaim presiden bilong CICC, Rev Tangatatal, delegeesen i bin lainim ol singsing lotu i miks wantaim ol singsing long tokples bilong ol Kuk Ailan ya.

Rev Tangatatal, husat tu i ekting Prinsipal bilong Takaumua Thiolojikel Kolis i tokim WCC delegeesen olsem CICC nau inap long serim musik wantaim long ol arapela hap na ol i tok tenkyu long disitol recording studio WCC i bin givim na i putim insait long opis bilong-CICC.

Ol memba bilong CICC women's felosip i bin tokim delegeesen olsem ol arapela helpim i kam long WCC i givim "seed mon" ol kisim long projek long kamapim wangepela kain laplap material ol penim o daim na ol prodak samting we ol i wokim long lip kokonas Mani ol i kisim taim ol i salim ol samting em ol bai yusim long sapotim lokal kongrikese na tu ol arapela CICC kongresens insait long Australia na Nu Silan.

## Sabama SDA i groa moa yet

KONGRIGESEN bilong Seven De Adventis (SDA) long Sabama insait long Nesenel Kapitel distrik i groa moa yet bihain long wangepela ogenaisesen bilong Australia ol i kolim Fly Builders i bin pinisim haus lotu bilong ol long 1977.

Wangepela bilong nambawan grup long dispela kongrigesen em ol yut we ol i bin kamapim wangepela yut grup long ronim ol yut-program bilong lotu.

Wangepela lida o mausman bilong Sabama sios Gaksy Namoi i tok em i gat planti memba bilong lotu i groa moa yet na ol narapela lida long kamapim ples bilong pulim planti ol narapela lain i kam insait.

Planti ol narapela liklik haus lotu bilong SDA i kamap klostu long skelim ol pipel husat i save kam long dispela haus lotu.

Ol dispela liklik haus lotu i bin kamap em Horse camp, Gimäune Evedana, Urama 2 (2mile) na Kokeva. Ol dispela kongrigesen i kam aninit long Sabama sios.

Tasol ol narapela sios olsem Gaire, Amata long Hiritano haiwe, Kipo long Boroko, Daima (Faiv Mail) na Wail Laip i bruk long Sabama bikos ol i gat ol pasta bilong ol yet.

Mista Namoi i tok SDA sios i wok long traime long senisim laip bilong ol manmeri long tingting, wokabaut na tu long bel bilong ol.

"I gat senis i kamap long bel tasol i tumas long wokabaut bilong man bikos mi i no strong tumas long putim was long wokabaut bilong ol," Namoi i tok.

Em i tok wangepela we bilong developim tingting (mentel) na wokabaut (fisikal) bilong ol yut em i long mekim ol wok misin long senis ol laip bilong na bihain bai spirituel developmen bai kamap long ol.

Namoi i tok sios ya i bin kisim sampela kain helpim long Mosbi Saut memba, Ledi Carol Kidu na Gavana Jenerel bilong PNG, Sir Silas Atopare long kamapim wangepela klasrum bilong lainim ol pipel long developim spiritual said bilong ol.

# Stadi kamap long anis bilong hailens

PLANTI liklik anis we i save kaikaim lip bilong diwai na stap long graun bilong hailans tropikal bus insait long PNG i save pilaim wanpela bikpela pat long stretim olgeta samting insait long wanpela bus, wara, maunten na wanem samting i stap insait long stap gut.

Tasol nogat planti manmeri i save long wanem samting ol dispela liklik anis i save mekim insait long wanem hap ol i stap long en.

Wail Laip Konsevesen Sosaiti WCS)- PNG kantri Progrem i mekim wok hat long traim painim aut ol dispela kain samting na sapotim wok painim aut bilong ol saintis na traim luksave moa long ol kainkain samting i stap insait long bus, maunten na wara.

WCS nau i sapotim wanpela

sumaitn bilong UPNG husat i traim long mekim wok painim aut i go insait long ol anis we i stap long hailans na kaikai lip bilong diwai na stretim graun bilong ol narapela samting i ken gro.

Katayo Sagata, wanpela honos sumatin bilong UPNG husat long stadim Baioloji bai kamapim wanpela stadi long dispela ol anis olsem pat bilong wanpela stadi bilong em long kisim pepa bilong em.

Mani sapot na edvais bilong dispela wok painim aut bai kam long WCS - PNG Kantri Progrem.

Dokta Andy Mack, MCS - PNG Country Kodineta i tok olsem long kantri olsem PNG we i gat kainkain animel na plent laip, i gutpela long gat ol baiolojis husat gat dispela kain trening long mekim moa wok painim aut

i go insait long wail laip bilong yumi.

Mista Sagata bai karim aut dispela stadi long Kreta maunten Baiolojik Rises stesen namel long Kreta Maunte Waillaip Menesmen Eria wantim helpim na tok orait bilong ol pipel long komyuniti.

Wok painim aut bai mekim isi long ol manmeri i save wanem samting tru em ol anis i save mekim. I gat kainkain anis. Planti bilong ol em ol i no stadi yet tasol narapela kantri i bin kamapim stadi i go insait long anis bilong ol.

Dispela stadi bai painim aut hau na wanem samting dispela anis i save helpim ol bagarapim graun na bus.

Dispela kain stadi bai helpim yumi long save moa long ol bikpela bus na diwai bilong yumi.

# Saina man i kamap sif bilong Ndilou ailan

AMBESEDA bilong Saina i kam long PNG Zhao Zhenyu i kamap olsem wanpela hetman bilong Ndilou Ailan long Manus provins.

Ambaseda Zhao em ol pipel long ailan i mekim em kamap olsem wanpela sef o hetman bilong ailan long fran bilong 1,500 bilong Ndilou Ailan pipel husat i kamap long lukim dispela seremoni.

"Dispela bung bai mi no inap lus tingting hariap insait long laip bilong mi," em i tok olsem taim ol lain pipel bilong ailan i makim em olsem wanpela hetman bilong ol.

Ambaseda Zhao i bin stap long Ndilou Ailan long givim K20,000 long Ailan komyuniti bai ol i ken sanapim wanpela dabol klasrum.

Presiden bilong Lele madi Pupi

Chupoi lokel level gavman kaunsil John Semoa i tok olsem ailan ya em planti gavman i save lus tingting long longpela taim tru.

"Mipela laikim ol liklik gavman sevis tasol. Planti pipel bilong mipela save kisim bagarap bikos planti kainkain pipia politikis ol i pilai na ol pipel bilong mipela i save kisim bagarap, em i tok.

Mista Zhao i bin go lukluk raun long Manus provins las wik long gvim K100,000 i go long foapela skul insait long provins.

Bikpela bilong dispela mani i go long Baso-Solang Day Day Adventist komyuniti skul long Lou Ailan na Lombrum, Ndilou na Sori komyuniti skul i kisim K20,000 wanwan.

# Dineri 4 Katolik yut i sindaun long HIV/AIDS awenes woksop



• Ol Sista i soim ol Dineri 4 yut long wanem samting ol i ken wokim.

## VERONICA HATUTASI i raitim

KATOLIK Yut Ministri (CYM) insait long Port Moresby i bin oge-naisim woksop long HIV/AIDS helt awenes we i bin pinis long Fonde las wik.

Sista Ehme Nonlabi husat i oge-naisim CYM, i tok ol yut insait long Katolik Asdaiosis long Pot Mosbi i wok long kisim tok awenes long ol asua bilong sik HIV/AIDS we i kamap strongpela namel long ol yangpela krismas blong ol i stap namel long 15-30.

Long las Fonde Epril 15, 18 pela setelmen yut long Dineri 4 we i kamapim Holy Nem paris insait long Bomana, Saint Peter the Rock long Hiritano Highway, Kuriva, Sabusa, na Desiama setelmens i bin pinisim tripela-day woksop i bin kamap long Drug na Alcohol Awareness senta, long 5 mile Boroko.

Planti kainkain spika

long Helt Dipatmen, Asdaiosis na Katolik Helt Awenes grup i givim ol toktok long HIV/AIDS.

Ol arapela topik ol bin toktok long em long tripela day we i go wantaim toktok blong HIV/AIDS, Digniti, Rispek na Moral veliu, Human Dvelopmen, gutpela Kristen pasin na ol Tenpela Manadato i tok klia long ol samting i save bagarapim ol yut.

Tupela meri i bin stap insait long dispela woksop em Gwen Serege na Jacqueline Rame i bilong Saint Francis Paris long Bomana i tok stap bilong ol i bin karim kaikai bikos ol lainim planti nupela samting we ol ken kisim igo bek long peris blong ol na lainim ol arapela yut long en.

Ol toktok long marasin i bin pulim tru interes blong planti yut taim sesin i tok tok klia long yusim ol diwai, flawa na ol lokel herbs we ol ken yusim olsem marasin blong stoa taim ol i sik.

Sista Briget em kodineta bilong Asdaiosis Health Awenes divisin wantaim ol grup blong em i karim out awenes long health, HIV/AIDS, drug na Alkohol insait long Katolik ejensi na ol narapela skul insait long siti long laspela tripela yia.

Tasol Asdaiosis helt awenes program we i bin stat long 1990's i go het yet.

Sista Briget i tok em i save laik helpim ol yangpela bilong tude long bagarap we ol niupela sik nogut wok long kamapim hevi long ol na long komyuniti.

Em i tok, olsem ol pikinini blong tumora na ol lida bilong bihaini wok long kisim traipela bagarap tumas, na olsem ol i mas save long kik bek na tu long rot bilong stopim ol sik nogut.

Sista Briget i tok em amamas wantaim ol yuts long askim planti kwesten long HIV/AIDS na ol arapela helt isu.



• Ol Dineri 4 yut husat i bin sindaun long HIV/AIDS awenes woksop.

## Lo bilong lukautim kalsa i redi

OL i kamapim pinis wanpela lo bilong lukautim ol kastom na kalsa na hau ol dispela samting bai kamap ples kila i redi pinis.

Ol saveman bilong lo husat i stretim na redim dispela lo i pasim tok long traim stretim ol liklik asua na redim dispela ripot bilong lo na givim aut long taim ol Saut Pasifik Tred Minista na Ikonmik Minista kibung we bai kamap long mun Jun.

Dispela lo bai traim na lukautim ol kastom na kalsa bilong ol Saut Pasifik Ailan manmeri. Dispela ol lo em tingting bilong Saut Pasifik Komisin Forum Sekretariat na UNESCO.

Big man tisa bilong UPNG

Lawrence Kalinoo husat i wok strong long kamapim dispela lo i tok olsem dispela lo bai traim na karamapim olgeta allan kantri na i no inap wanpela tasol. Olgeta manmeri bai traim kisim sampela tingting tasol long dispela lo na traim putim insait long wanwan kastom bilong ol yet.

Dispela ol lo em bai ol i givim long wanwan gavman na ol yet bai mekim sampela senis na sapos ol i laikim em ol lo, gavman i ken kamapim olsem wanpela lo insait long wanwan kantri bilong ol.

Dokta Kalinoo i tok lo bai traim helpim ol manmeri long wanwan kantri long kastom na pasin bilong tumbuna ol i gat.

## Tupela kam bek long Hawaii wantaim Diploma

WANPELA nevi na wanpela ami opisa wantaim PNG Difens Fos i kam bek long kantri bihain long tupela i pinisim wanpela tri mun kos long Hawaii. Dispela tupela man em long nevi Kepten Reginald Renagi na Amy Liutenen Kenel Anthony Polum.

Ol luksave long dispela tupela man long Epril 12 taimtupela pinisim dispela tripela mun kos long Koles bilong Sekyuriti-stadi kos long Esia Pasifik Senta for Sekyuriti Stadi.

Wanpela bikman bilong ami bipo na nau bos bilong dispela koles, Marine Liutenan Jeneral H C Stackpile i givim tupela Polum na Renagi diploma bihain long tupela i pinisim stadi bilong tupela.

Eisa Pasifik Senta bilong Sekyuriti Stadi em wanpela rijinei senta bilong stadi, wok painim aut na bung. Dispela senta i save wok bung wantaim ol kantri insait long rijen long kamapim strongpela sekuriti. Dispela bai helpim long kamapim gutpela sindaun namel long Amerika na ol kantri insait long rijen. Tupela man i stap namel long 65 narapela manmeri husat i stap insait long dispela bung. Ol dispela manmeri i kam long moa long 30 kantri olgeta.

## Lida i les long stapim Lahir main redio na niusleta progrem


WANPELA lida bilong Lahir Ailan i no amamas long disisen bilong Lahir prosek long stopim progrem long redio "Lukluk Long Lahir" na nius leta bilong bilong Lahir Main, "The Lahir Gold Times".

Lida ya, Elias Salot i tok dispela tupela projek em i wanpela we long ol pipel long Nu Ailan i kisim toksave long wanem samting i save kamap insait long Lahir main.

Em i bin mekim dispela toktok bihain long Lahir Main i laikim pasim dispela tupela projek long sevim sampela mani bilong operesen bilong ol.

Mista Salot i tok olsem sapos Lahir Main bai stopim dispela projek bai ol pipel i kisim toksave we long ol samting i wok long kamap insait long main na tu long provins na em i tok i luk olsem kampani i no wari long ol pipel bilong Nu Ailan tasol em wari long rausim gol tasol insait long graun bilong ol pipel.

Mista Salot i tok sapos kampani i laik pasim dispela tupela projek i tok em i moabeta long Lahir Main bai toksave long ol pipel em i bai yusim dispella mani long narapela projek we i ken helpim ol pipel bilong Nu Ailan.



• Fuzo Paul i kisim ol liklik pikinini Manam tasol nau ol i stap long Budua risetelmen kem. Maski ol i bungim hevi long ol kaikai na klos, tasol ol i pilai amamas i stap.

## Skelim husat i as bilong laip

SAPOS yumi stap isi na lukluk gut na tingting gut, bai yumi lukim planti ol mak bilong laip i stap nabaut - ol plain i flai na singaut, ol palai i sut nabaut, ol kankain binatang i go i kam bilong mekim wok bilong ol, ol grinpela diwai na ol gras nabaut ol i putim ol nupela kru na taim ren na san i senis senis - ol dispela na planti ol narapela samting ol i gat dispela presen bilong laip, samting yumi no klia tumas long en. Wantaim ol dispela, yumi ol manmeri, long wanem yumi inap tingting long dispela, long laip yet, long mining bilong en, na bilong givim tok tenkyu long husat em i as bilong laip, husat i mekim kamap dispela gutpela presen tru.

Pestode bilong lsta em i samting bilong laip, em bilong amamasim laip. Husat em i as bilong laip bilong yumi olgeta, em i bin kam long yumi oslem wanpela bilong yumi yet. Planti ol i no bin luksave long dispela, planti ol i no bin bilip long en, na ol i bin mekim save long en. Olsem man tru, em bin dai wankain olsem yumi olgeta i save dai, tasol olsem God tru em i winim i dai na em i kirap long laip. Planti ol i bin lukim olsem em i kirap tru. Olsem na Santu Pol i bin tok, dispela em i as bilong bilip bilong yumi. Planti ol i bin soim tru bilip bilong ol long Krai wantaim i dai bilong ol, na Sios i no bin pinis nating na em i no wok long go liklik, nogat. em i stap na em i stap strong yet inap nau bihain long 2000 yia.

I dai na kirap bilong Jisas yumi tingim na amamasim gen long dispela de bilong lsta, em i save, givim mining long laip biong yumi. Jisas i tok em i bin kam, bai yumi kam kisim laip na laip i ken pulap tru long yumi (Jn. 10:10). Long yumi, i dai i min olsem laip i senis, em i no pinis, long wanem yumi bai holim yet dispela presen bilong en bilong laip.

Yumi wanwan yumi save bihainim rot bilong yumi yet long lai bilong yumi, tasol planti taim yumi save pilim wankain long wanem samting i save kamap long kantri bilong yumi. Yumi ol lain bilong komyuniti, na planti samting yumi save mekim bilong tingim komyuniti. Gavman i mas oltaim mekim ol samting bilong helpim sindaun bilong ol komyuniti.

Long dispela taim Gavman i bin asua taim ol i traim mekim ol senis long Difens Fos. Ol i mekim na dispela em i bin go kamap bikpeal samting nogat Ol senis dispela lain ol i kolim Commonwealth Eminent Persons Group (CEPG) i bin askim Gavman long mekim, em ol bikpela senis, na i klia oslem ol i mekim bilong sevim mani. Tasol Nesenel Eksekutyutiv Kaunsil i no mas bihainim. Na ol i no laik skelim gut, na mekim wanem kain senis isi isi, na toksave gut long ol lain Difens, long wanem ol kain senis olsem bai senisim tru laip na wok bilong ol.

Long Difens Fos, disiplin i wok long slek i go daun longpela taim, na taim ol soldia i bin kisim na holim i sap ol gan samting, ol i bin abrusim disiplin bilong ol, na ol i bikhet long ol bos bilong ol long Difens Fos na long Gavman wantaim. Dispela pasin bilong Difens Fos long mekim bai Gavman i senisim wanem samting ol i bin tok long mekim, bai kamapim sampela hevi long yumi bihain.

Na tok bilong Gavman, ol i tok olsem ol i no inap kotim ol lain soldia, em bilong karampim samting hia long hap taim, tasol wanpela kain hevi em iap kamap gen bihain. Na ol kain pasin olsem bai mekim hat long yumi long bilipim tok bilong Gavman. Sapos Gavman i laik bai yumi gat Difens fos, ol i mas givim ol mani inap long ronim.


# Enjoy Coca-Cola at the right price

The Coca-Cola company want you to purchase your Coca-Cola at the RIGHT PRICE.

You can pick up an icy cold Coca-Cola 355ml can for just K1.10 or 500ml bottle for K1.30. And you can also grab a 1litre Coca-Cola for K2.00.

Enjoy Coca-Cola and pay no more than the recommended retail price.

Prices apply to other refreshing flavours including Schweppes, Sprite, Fanta, & Diet Coke.



Coca-Cola Amatil (PNG) Ltd.

COCA-COLA, DIET COKE, FANTA, SPRITE, SCHWEPES AND enjoy AND THE CONTOUR BOTTLE DESIGN ARE REGISTERED TRADE MARKS OF THE COCA-COLA COMPANY

## PNG mas askim Saina long marasin

AMBESADO bilong Saina i kam long Papua Niugini Zhao Zhenju i tok olsem PNG was i go insait wantaim wanpela agri-men long helt program namel long tupela kantri.

Nista Zhao i tok Sir Mekere Morauta i mas sainim wanpela agri-men long dispela samting taim em mekim wokabaut bilong em i go long Saina bihain long dispela yia.

Em i mekim dispela

toktok bihain long wanpela lukluk raun bilong em i go long Lombrum Nevi Beis long Manus las wik.

Mista Zhao i bin lukluk raun insait long dispela nambawan haus sik insait long kantri we ol ami na nevi bilong Australia i bin sanapim planti yia i go pinis.

"Mi kirap nogut long lukim olsem haus sik i bagarap tru olsem na stap. I no gutpela long lukim wanpela gutpela sevis olsem i bagarap

tru na i stap," em i tok. Haus ya i bagarap bikos nogat mani na ol i no stretim a tu opereting tieta i no moa wok.

Dispela haus sik i stap long nevi beis na save givim sevis long ol manmeri long Los Negros Ailan na tu ol ami na narapela hap bilong Manus.

Mista Zhao bin mekim dispela lukluk raun taim em i go long Manus las wiken long givim wanpela sek

mani inap K100,000 long foapela skul ion-sait long provins.

K40,000 em bikipela mani i go long Baso-Solang seventh Day Adventist komyuniti skul long Lou ailan na Lombrum, Ndilou na Sori komyuniti skul i kisim K20,000 wanwan.

Mista Zhao i go wantaim Edukesen Minista Dokta John Waiko na sif of staf bilong praim minista Dokta Jacob Jumogot.

# Skul saplai i no inap

HELEN REI i raitim

SAMPELA belhevi toktok i kam olsem namba na gutpela bilong sampela skul saplai we wanpela kampani em Spring International Holdings husat winim kontrak bilong saplaim ol skul long Sauten Rijen wantaim skul saplai i givim aut long ol skul i no inap na i no gutpela tu.

Dispela belhevi i kam long Edukesen Edvaisa bilong Westen Provins Evare Kulau tok olsem kampani i stat pinis long givim aut ol saplai long wanwan distrik insait long provins.

Mista Kulau i tok ol saplai em i no gutpela tumas na ol i no bin tingting long kisim dispela kain saplai na tu namba bilong saplai ol i kisim i no inap long namba bilong pikinini. Em i tok ol toktok em i saplaim namba bilong skul na pikinini insait long provins i no inap long ol saplai we i kamap pinis long ol skul.

Em i tok dispela ol meteriel nau em kampani i wok long saplaim em i yusim olpela tok bilong namba na amas pikinini insait long provins na i no infomesen bilong nau. Dispela i mekim na planti skul i kisim hap liklik saplai long dispela yia.

"Namba bilong ol skul pikinini i go antap dispela yia na infomesen mipela givim long kampani i no bihainim wanem samting kampani i wok long saplaim long ol skul," Msta Kulau i tok.

SIH em wanpela bilong tupela kampani we Edukesen Dipatmen i givim wok kontrak bilong saplaim skul long Sauten Rijen na PNG Stationery na Officce Supplies bai

saplai Hailans, Niugini Ailans na Momase rijen.

Mista Kula i tok meteriel bilong elementri, komyuniti na praimeri skul i no i stap long mak bilong ol pikinini i ken yusim.

Em i tok tu olsem ol edukesen opisa long Balimo i bin tok em tu na em i lukim sampela bilong ol dispela meteriel na em i tok ol dispela i gutpela samting bilong ol sumatin.


Ol wokman bilong SHI i saplaim pinis ol meteriel long Balimo insait long Midel Flai, Kiunga na dispela wik ol i stap long Daru na i go olsem long saut Flai..

SIH Jenerel Menesa David Conn na Administresen menesa Pius Simbuoki bin tok olsem ol i saplaim pinis ol meteriel long Nesenel Kapital Distrik, Sentral, Oro, Kiunga, Lake Murray distrik na nau ol i wok long givim aut long Westen provins.

Long sait bilong ol meteriel i no gutpela, tupela i tok ol meteriel em ol opisal bilong edukesen dipatmen i bin lukluk long ol pinis na ol i bin tok orait bikos ol meteriel i luk wankain olsem ol saplaim em kamapni i save givim aut long ol skul.

Na long namba bilong samting ol i saplai, tupela i tok dispeal em i no wanpeal asua bilong kampani. kampani i bihainim tasol ol pepa na samting em we edukesen dipatmen i bin givim ol long bihainim aninit long kontrak bilong ol.

Em i tok sapos wanpela i laik komplek long namba bilong samting i go long wanwan skul, em mas askim ol lain long edukesen dipatmen.



• Ol bikman husat i kamap long witnessim seremoni long Kalo komyuniti skul bihain long ol wok kamap long skul.

KALO Komyuniti skul insait long Sentral Prvins i ken amamas olsem ol i gat nau wanpela gutpela skul bihain long wanpela wok kamap long skul we i lukim planti senis i kamap long skul we i bruk daun stret.

Gavman bilong Australia aninit long helpim program bilong em aninit long AUSAID Small Activities Scheme (SAS) i givim dispela helpim long Kalo Komyuniti Skul. SAS em wanpela liklik hap mani kam long AUSAID we i save helpim ol liklik komyuniti projek na non-gavman wok insait long wanwan komyunit we i gat nid i stap long en.

Man husat makim maus man bilong AUSAID long dispela opening long pinis bilong mun Mas, Mista Willie Mandui i tok

gavman bilong Australia aninit long AUSAID program bilong em i amamas tasol long helpim na stretim ol samting olsem skul bilong ol yangpela pikinini insait long ol liklik komyuniti.

"Gutpela ples biloOng sindaun na lanim ol samting rem gutpela long edukesen bilong ol yangpela lida bilong dispela kantri," e i tok.

Aninit long SAS program, ol i save givim helpim i go long ol komyuniti isnait long bus bilong kantri na husat save painim hat stret long ksim ol kainkain sevis. Aninit long dispela ol kain program, wanwan projek inap kisim mani inap long mak bilong K50,000. Mista Mandui i tok amamas i go long Bod bilong Kalo Komyuniti Skul na ol memba

bilong Kalo Developmen Komiti long stretim na menesim dispela program long stat i go insap long pinis. Wok kamap bilong skul em ol wok manmerbi bilong komyuniti yet i mekim bilong stretim skul bilong ol.

"Helpim bilong mipela i liklik taim mipela givim K20,000 long mun Februari dispela yia long baim ol bilding meteriel. Kalo komyuniti i soim gutpela wok na pinisim olgeta wok long dispela mani na tu kamap stret long taim," Mista Mandui i tok.

Em i tok olsem i gutpela long lukim ol komyunit we i mekim gupela wok wantaim liklik helpim ol i kisim. Ol sumatin bilong kalo komyunit skul nau bai i ken sindaun gut na lainim ol samting long gutpela klasrum.

## Ovasis saintis bagarapim nem bilong Marawaka Simbari pipel

JAMES KILA i raitim

WANPELA grup ol i kolim ol yet Simbari Eksen Grup (SAG) insait long Marawaka distrik bilong Isten Hailans provins i tingting long stapim ol ovasis saintis long kam insait long eria bilong ol na mekim stadi long kalsa bilong ol.

SAG i singaut long Nesenel Gavman long traime putim wanpela lo long stapim ol ovasis saintis o antropolojis long karim ol buk na pepa ol i raitim long PNG i go ovasis. Ol i mas larim ol opisal bilong Foren Afeas na tu opis bilong Kalsa na Turism opis long glasim pastaim na givim.

Grup ya i tingting long kamapim wanpela kot eksen long traime na kisim bek ol buk na muvi piksa em wanpela antropolojis bilong Amerika i bin kisim long pasin tumbuna bilong

ol.

Mausman bilong SAG Kaimi Warin i tokmol lain bilong em i save long nem builong dispeal antropolojis husat i bin kam stap long ples bilong ol longpela taim long raitim buk bilong kisim dokta digri bilong em. Tasol taim dispela man i go bek long Amerika, em i raitim planti samting we i no tru na bagarapim tru kastom bilong ol pipel long Marawaka Simbari.

Mista Warin i tok planti ol dispela antropolojis i gat tingting long mekim mani kisim ol bikipela pepa na kam yusim kalsa ba kastom bilong yumi nating.

Mista warin i tok i gat wanpela kopi bilong wanpela vidio na buk we i soim olsem dispela antropolojis i bagarapim tru nem bilong marawak na Simbari pipel. Insait long dispela buk na muvi piksa, antropolojis i tok olsem ol man i save silap wan-

taim ol yet. Long tok English dispela em ol i save kolim 'Homosexuality.'

"Dispela olgeta kain ripot antropolojis ya i mekim em i giaman tru. Olgeta samting em i raitim i no tru. Mipela i no save mekim dispela kain pasin. Ol tumbuna bilong bipo yet tu i no save mekim dispela kain pasin," Mista Warin i tok.

Em i tok ol i save long nembilong dispela antropolojis tasol ol bai wet tasol long toktok wantaim nesenel gavman long traime mekim wanpela kain lo long stapim ol ovasis saintis long kam na mekim ol kain kain stadi bilong ol ong PNG.

"Mipela i save amamas na larim ol i kam long kantri bilong yumi long karim aut stadi bilong ol. Tasol taim ol i save go bek long ples bilong ol, ol i save rabisim tru nem bilong yumi. Dispela kain pasin i no gutpela tru," Mista Warin i tok.

## Wok painimaut long pasim malaria

ROT bilong pasim malaria insait long kantri bai ol i traime painim aut klostu.

Bilong painim aut moa, wanpela Japan Internesenel Koporesen ejensi (JICA) wok mission i bin kamap long mun Epril 9 long traime stat

na painim aut moa long malaria.

As tingting bilong dispela wok em long kamapim wanpela stadi ti bilong wok wantaim narapela grup olsem NGO, gavman na narapela ol lain husat i save helpim wantaim mani na samt-

ing.

Dispela grup i stap nau insait long kantri.

Taim bilong ol i stap, ol bai traime toktok wantaim ol sampela gavman dipatmen na lain bilong givim helpim long wanem kain tingting ol i gat long dispela wok.

Ol lain i bung pinis wantaim UNG Skul bilong marasin, Wol Helt Ogenaisesen, Wewak Hospital Administresen na dipatmen bilong helt.

Bihain long ol dispela toktok, grup ya bai kamapim wanpela ripot long ol dispela toktok.

# Mak bilong ol trabel long dispela Ista i go daun

## ••• tasol foapela strongpela kriminel i ronawe long Bomana kalabus

• NOGAT bikpela birua o trabel i bin kamap long kantri long ista wiken, Deputi Plis Komisina Sam Inguba i tok.

Tasol sampela ol liklik meknais i bin kamap, wanpela long ol long Mosbi we foapela strongpela raskol kalabusman i bin ronawe long Bomana Haus kalabus.

Mista Inguba i tok ol plis i bin rekotim 141 trabel insait long kantri we i bin kamap long Ista wiken. Ol plis i bin holim pasim tu 43 trabel man long en.

Tasol Mista Inguba i tok mak bilong ol trabel i bin kamap nau i stap daun-bilo long mak we i save kamap long wankain taim long ol yia i go pinis. Na em i tok pablik long noken pret tumas bikos long nau ol plis i wok strong moa long traim daunim ol hevi we ol raskol i save kamapim long en.

Mista Inguba i tok long dispela 141 mak bilong ol trabel, 31 em ol stil pasin na nainpela long ol dispela lain we ol i holim pasim ol em ol bin wokim stil pasin long en. Em i tok long ol yia bipo mak bai i stap antap moa namel long 50 na 80 tasol nau mak i pundaun i kam daun. Em i tok dispela i kamap bikos i gat moa plis operesen na gutpela aweanes insait long komyuniti long kantri long ol dispela samting na ol i helpim plis long wok bilong daunim lo na oda.

Mista Inguba i tok sampela opisa bilong Kriminel Investigesen Divisen i bin wokim reid long Tete setelmen long Mosbi las Sarere na ol i bin holim pasim 13 saspek long bagarapim meri long en. Olgeta ol dispela lain em plis i bin sasim ol na holim ol i stap long

Boroko Plis sel.

Long dispela foapela strongpela ronawe kalabus lain long Bomana, ol Koreksenenel opisa bin holim pasim wanpela na kisim em bek i go long kalabus.

• Plen bilong salim Air Niugini bai i wet pastaim bikos ol kondisen long intenesenel balus kampani i no gutpela tumas long dispela taim, Praivetaisesen Komisina Siaman Ben Micah i tok.

Em i tok sevenpela kampani we i bin laik resis long baim 49 pesen sea bilong Air Niugini i no bihainim ol gaid-lain we gavman na Air Niugini i putim long ol long rot bilong salim na baim ol sea bilong Air Niugini long en.

Em i tok ol bin tromoim ol samting long Kabinet i lukluk long en na bihain ol Komisina membai bin i holim miting long toktok long dispela samting na glasim na skelim ol gen.

Mista Micah i tok ol etvaisea bilong ol bai go het na skruim ol wok negosiesen wantaim ol grup husat i gat laik long baim ol Air Niugini sea.

Em i tok long dispela taim Quantas wanpela long ol bikpela balus kampani bilong Australia husat i bin putim aplikesen long baim Air Niugini i wok long katim daun ol woklain long 5 pesen na tu ol sampela rot we em i save ron long em long sevim kos. Air Nu Silan em narapela kampani we i bin gat intres long baim Air Niugini sea i no bin wokim profit long las tripela mun na Ansett i bin wokim lusmani inap long \$120 milien.

"Dispela i no gutpela na olsem gav-

## OL HAP HAP nius

man bai holim bek plen bilong salim Air Niugini inap gutpela taim i kamap long en," Mista Micah i tok.

Em i tok planti ol balus kampani long rijen i wok long bungim hevi long mani long dispela taim.

Olsem na em i tok Komisina bai wetim ol tok stia bilong gavman long wanem samting ol bai wokim bikos praivetaisesen em i bikpela samting tru.

• Nesenel Fiseris bai karimaut ol wok painimaut long tupela sip bilong painim pis bilong Indonesia we ol i bin holim pasim ol insait long Wara bilong PNG long Ista wiken.

Tupela sip em long Mutiara Jaya 12 na Mutiara Jaya 18. Patrol bot bilong PNG Difens na Nevi em HMPNGS Seeadler i bin kisim tupela sip i kam long Mosbi long dispela wik Tunde.

Ol Fiseris atoriti i tok ol bai mekim ol wok painimaut na sasim ol aninit long Fiseris Ekt o lo.

Wanpela join operesen ol i kolim long Ave Mora 11 we PNG Difens Fos na Australia nevi i bin karimaut i kisim dispela tupela sip i brukim lo na painim pis long wara bilong PNG. Tupela sip i nogat laisesn long painim pis long PNG Ikonmik Eksklusen Zon o eria long en.

• Kwinslen bai helpim PNG i karimaut ol rifom o senis long ol kurikulum bilong praimer skul level.

Edukesen Kwinslen bai karimaut wanpela projek ol i kolim long PNG Kurikulum Rifom Implimentesen Projek patnasip na PNG bai i peim K4.1 milien long dispela projek ya.

Edukesen Minista Anna Blight i tok ol senis bai helpim ol skul insait long PNG bikos ol bai kamapim ol samting we i gutpela long ol PNG skul na tu bihainim ol pasin kalsa.

Em i tok dispela projek bai bidim strongpela wok patna namel long tupela tasol moa yet, bai helpim edukesen bilong ol PNG pikinini.

## WANTOK NIUSPEPA BILONG YUMI OL PAPA NIUGINI STRET

# Mani bilong yumi i go we?

GAVMAN i sot tru long mani. Dispela toktok em yumi wok long harim olgeta taim. Taim yu go long wanpela gavman opis, stat long distrik i go long nesenenel level bai yu harim wankain toktok.

Tude yumi stap na lukim planti niuspepa na redio toktok i wok long kamaut. Hat toktok i wok long tok olsem gavman i sot long mani.

Gavman i kamapim kainkain rot bilong kisim mani. Bipo i orait liklik. Nau wantaim VAT, kainkain mineral na ges projek i kamap, ating PNG bai gat inap mani bilong ronim olgeta samting na kamapim moa wok developmen.

Wanem samting i rong? Mani bilong yumi i go we? Hau na mani bilong mipela i wok long luslus nating?

Olgeta save man na bikman bilong gavman i save wanem samting i kamap. Mipela ol grasrut manmeri bilong dispela kantri i no klia tru long wanpela samting. Asua i stap long husat? Mipela i no mekim wanpela samting tasol sin bilong gavman bilong mipela, dispela hevi em mipela liklik manmeri bilong dispela kantri i karim.

Wanwan manmeri i kaikai, slip, raun long gutpela ka na yusim bikpela mani bilong dispela kantri. Bikpela namba bilong pipel husat mipela i save tuhat wanwan de. Skin long han bilong mipela i save raus nating. Olgeta de mipela i save wok olsem hos bilong wok. Mipela nogat gutpela pe, i slip long ol setemen, kaikaim ol pipia kaikai tasol olgeta de mipela save kam aut na wokhat tru.

Olgeta de mipela save driman. Wanem taim bai mipela malolo? Wanem taim bai mipela sindaun gut long wanpela naispela haus? Wanem taim bai mipela karim ka olsem sampela man i mekim?

Kantri bilong yumi ris tru tasol planti mani bilong yumi save paul nating tru. Mani i mas i go long pe bilong husat? Husat i haitim mani?

Olgeta taim gavman wok long dinauim mani long Wol Benk o IMF. Yumi kisim kainkain dinau long kainkain hap. I gutpela long yumi kisim dinau tasol taim bilong kisim bai yumi amamas i go na taim bilong bekim bai yumi les stret. Hamas dinau yumi wok long bekim na hama nupela dinau yumi wok long kisim yet.

Olgeta taim yumi dinau. Dispela dinau mani i go we? Bilong wanem na gavman i wok long sot long mani?

Lukluk long sait bilong ol sevis. Planti gavman sevis olsem rot, bris, Aidpos, skul na samting i bagarap. Ol haus sik i sot long marasin. Planti skul i nogat tisa. Ol dispela samting i kamap bikos nogat mani. Sampela taim bai yumi ting olsem gavman i giamanim yumi. Gavman kisim bikpela mani long sait bilong oil pam, kokoa, kopra, kopi, ti, gol, kopa, timba, pis, turism na planti kainkain hap. Em save kisim VAT takis long yu na mi olgeta de long wanem samting yumi baim. Dispela ol mani i go we na gavman wok long komplek olsem mani i sot. Mipela no lukim wanpela nupela senis i kamap long Mosbi na narpela senta. Insait long setelmen bai yu lukim rot i bagarap pinis na bikpela baret i kamap taim ren. Sampela hap bai yu ting rot bilong ka o wara?

Gavman i kisim bikpela mani tasol mani i save lus. Yumi manmeri i ken sutim toktok long yumi yet olsem yumi asua. Yumi no kamapim gutpela lida long gavman. Yumi ken tok olsem gavman sistem bilong yumi i gat planti wokmanmeri i save kisim i no save mekim wanpela samting tasol ol i hat yumi pe nating. Na tu yumi save putim ol man husat nogat save long ronim ol bikpela bisnis olsem het bilong sampela bikpela bisnis bilong gavman.

Ating asua i stap long husat? Yumi bai sutim toktok long husat? Ol memba bilong yumi long palamen i ken kisim toktok long dispela ol samting tasol yu save, yu yet bin givim wanpela vot na dispela i givim pawa long em. Sapos yu tingting yu makim rait man em gut.

Taim bilong 2002 i kam klostu. Kainkain manmeri i raun pinis toktok nabaut. Yu man i gat het mas skelim gut. Nogut yu salim rong man na olgeta taim bai mani bilong gavman i sot olsem nau yumi lukim.



**Bikpela grup stret!**

• Nordup Katolik Sios pasta, Alois Tade (waitgras sindaun long namel) wantaim ol arapela wokman bilong sios, Michael Paep, Fabian Kumaina na Peris Presiden Joachim Toku (raithan). Ol i sanap wantaim ol skul pikinini long kisim piksa long fran bilong nupela haus lotu we ol ino pinis yet long em.

# Wok bung long givim gutpela sevis

TUPELA grup i sainim pinis wanpela tok orait bilong helpim narapela arapela bilong mekim wok bisnis na givim gutpela sevis i go long olgeta manmeri husat i gat sea long dispela bisnis.

Dispela Memorandum ov Agrimen i kamap namel long Pan Asia Pacific Assurance (PAPA) na Federation bilong Savings na Lons Sosait insait long kantri.

Dispela bai lukim olgeta memba i painim isi long kisim sevis bilong Insurens na narapela helpim long sait bilong mani. Olgeta mausman bilong olgeta savings na lon sosait insait long kantri i kam na lukim dispela Agrimen.

**“Dispela agrimen i min olsem PAPA na federesen i kamap long wanpela tingting long givim sevis long ol memba bilong federesen long insurens na narapela mani sevis nabaut.”**

PAPA Eksekutiv Daireka Benias Sabumei i tok ol dairekta bilong PAPA na ol narapela kampani i kamap long dispela bung olsem wok bung namel long dispela tupela grup bai helpim tupela wantaim olsem na dispela bung i kamap.

Em i tok tu olsem dispela agrimen bai helpim tupela grup wantaim long kamap wantaim sampela gutpela bisnis.

Em i tok dispela tok orait i mekim na tupela grup


wantaim bai serim olgeta samting olsem opis na kompyuta na putim kamap ol nupela senta long wanwan provins bilong givim sevis stret i go long ol pipel.

Federesen Presiden na Siaman bilong Bod ov Dairektas Michael Koisen i tok: “Dispela agrimen i min olsem PAPA na federesen i kamap long wanpela tingting long givim sevis long ol memba bilong federesen long insurens na narapela mani sevis nabaut.”

Sampela sevis we PAPA insurens bai givim long ol memba bilong federesen em long grup iwip insurens kapa, pesenel bagarap yu kisim, medikel, lon, insurens bilong pikinini na meri tu.

PAPA em wanpeal insurens kampani ol lain bilong PNG yet i papa long en na save givim sevis long ol manmeri.

# Groim rais bilong yumi yet



• **Planti rais i ken gro insait long kantri olsem dispela piksa i soim. Sapos planti rais i kamap, ating yumi no inap baim rais bilong Australia moa. Planti wok painim aut wok long kamap insait long ol ples olsem Makam insait long Morobe, Laloki na Wapenamanda long traime na goim rais na wit bilong traime na saplaim kantri. Nau yet yumi save baim ol dispela kaikai we i ken gro isi insait long PNG. Dispela piksa em ol manki long Niu Laip Fam utsait long Pot Mosbi siti. Ol i bin stat groim rais las yia na nau i karim kaikai na redi olsem na ol i wok hat long katim na stretim bilong masin i ken lusim rais na rausim pipia.**

# Tingim bihain bilong yumi

WANEM plen na disisen ol papa graun, gavman na narapela manmeri i mekim nau insait long petrolium, oil na ges indastri insait long kantri bai stretim sindaun na wanem samting bai kamap long ol yangpela manmeri bilong tumoro.

Dispela toktok i kam long Peter Koim, Komyuniti Afeas Menesa bilong Chevron Niugini long namba faiv komyuniti afeas bung kama long Lae.

Em i toktok long wanem samting nau i wok long kamap insait long ol projek eria we i lukim ol papagraun na man husat i kisim mani long dispela opl projek i no tingting long putim mani i go insait bilong wokim bisnis ol traime na tingim ol pikinini bilong tumoro. Traime sanapim ol skul na kamapim sampela projek bilong kamapim wok bilong ol manmeri.

Olgeta papagraun na kampani i mas luksave husat em i papa graun tru na toktok wantaim tru lida bilong olgeta papa graun.

Stretim ol samting ol rot, bris, haus sik, skul na narapela samting long projek eria. Ol dispela samting husat bai givim mani na lukautim na stretim ol. Planti bilong ol dispela samting i wei sanap pinis i wok long bruk na bagarap nogut tru i stap nau.

Mista Koim i tok gavman i mas putim wanpela tim long sekim wanem samting iwok long kamap long olgeta preol, ges na oil projek long sekim hamas mani ol papa graun i kisim na painim sampela rot biong stretim na putim dispela ol mani bai i ken kamapim sampela projek i mani i stap long gutpela han.

Em i tok sampela ol yangpela bilong tumoro inap kamapim trabel taim oli luksave olsem i nogat wanpela samting i stap insait long ol dispela bikpela projek bilong oli ken kisim ol yusim.

Em i tok tu olsem semba bilong Mains na Petrolium i mas lukluk long sanapim wanpela grup we inap lukautim olgeta mani we i kam insait long petrol na oil.

Em i tok tu olsem olgeta maining, petrol na ges indastri i mas kamapim wanpela bodi bilong givim mani bai ol i ken developim nupela projek na komyuniti developmen insait long kantri.

# PNG mas wok hat long kisim turis bilong Japan

PNG mas yusim Pasifik Ailan Senta (PIC) long japan long kamap moa awaeanes long traime na bringim moa turis bilong Japan i kam insait long kantri.

Dispela toktok i kam long Emeseda bilong Japan i kam long PNG Tatsua Tanaka husat i bilipl olsem PNG i gat bikpela sana tru long mekim planti mani long ol turis.

Em i tok PNG mas wok hat tru long toksave na mekim ol awaeanes program inasit long Japan bai ol PNG mas mekim long PNG na kam yusim mani long hia bikos planti turis bilong Japan save go aut wanwan yia.

Mista Tanaka tok i gat olsem 18 milien manmeri bilong Japan i save go olsem turis wanwan yia long ol narapela kantri na long dispela namba, liklik hap tasol olsem 2,500 tasol i save kam long PNG.

Em i tok gavman bilong japan i sanapim PIC long kamapim wok namel long ol kantri bilong pasifik na narapela samting yus long dispela rot na traime mekim wok bilong mekim awaeanes bilong traime grisim ol turis bai ol i ken karim mani i kam insait long PNG.

Em i tok ol manmeri na gavman i mas traime na yusim dispela rot (PIC) long mekim ol yet klia long ol pipel bilong Japan.

Em i tok PIC i save mekim wok bilong kamapim wok bisnis, turism na helpim wok namel long Japan na ol narapela kantri bilong pasifik rijen.

Mista Tanaka i tok olsem sapos Air Niugini i flai darek long Japan stat long neks mun, ating dispeal bai gutpela long traime bringim moa turis i kam.

# Bikpela takis i rausim timba kampani

WANPELA timba kamapni husat i stap insait long PNG longpela taim tru i lusim wok bisnis bilong em insait long kantri na go bek long as ples bilong em.

SiefEksekutivOpisa bilong Stettin Bay Lumber company, Kyoshi Matsuyama i tok wanpela patna bilong kampani, Nissho Iwai i lusim olgeta wok bisnis insait long PNG bihain long 30 krismas olgeta em i mekim wok bisnis insait long kantri.

Em i tok dispela i kamap bihain long

kampani i wok long lusim bikpela mani long mekim wok bisnis bilong em na nogat wanpela gutpela profit.

Mista Matsuyama i tok bikpela mani tru i go insait long mekim wok insait long dispela kantri bilong wok bisnis long sait bilong ekspot takis, royolti, olewi fi na projek benefit ong ol komyuniti i bikpela tumas.

Em i tok dispela i mekim na kamapni no mekim wanpela profit olsem na i tingting olsem em i gutpela long lusim wok bisnis

bikos i nogat profit bilong em.

Em i tok olsem gavman mas traime na givim gutpela profit liklik i go long ol bisnis tu na larim ol i mekim wok insait long kantri. Sapos gavman i makim takis i go antap tumas, em bai hat tru long ol nupela bisnis long laik kam insia tlong kamapim wok na karim mani i kam.

Mista Matsuyama i tok long ol dispela as tingting, Nissho Iwai, wanpela kampani bilong Japan i lusim olgeta wok bisnis na

ronawe. Dispela i mak bilong soim ol narapela manmeri husat i gat laik long kam mekim wok bisnis insait long kantri olsem PNG i no wanpeal gutpela ples bilong ol manmeri i putim mani i kam bilong kamapim nupela bisnis.

Mista Matsuyama i tok: “Mi laik tok Nissho Iwai i no mekim wanpela rong long dispela 30 yia em i mekim wok insait long kantri.

“Kampani i save givim bikpela mani i kam insait long kantri taim kampani i kam

stat long emkim wok bisnis,” em i tok.

Em i askim gavman long wok klosut wantaim ol timba kamapni olsem na painim aut wanem kain hevi ol i gat na traime daunim takis na stretim ol narapela samting bilong kampani i ken mekim wok gut.

Em i tok tu olsem mama kampani bilong em i askim pinis wanpeal narapela timba kamapni long kam kisim ples bilong Nissho Iwai tasol em i no tok aut long nem bilong dispela nupela kampani yet.

# Ol tru tru ku lida i stap fri yet, Kenel Seruvakula i tok

**Suva, Fiji:**  
 Ol lain husat i bin go pas long hevi long Fiji las yia em ol i no holim ol yet, wanpela ami man bilong Fiji husat i go wok nau wantaim Nu Silan ami i tok.  
 Lettenen Kenel Viliame Seruvakula husat i bin komanda bilong Tet batalion wantaim Fiji

Infentri rejimen i bin tokim Fiji Sun niuspepa bipo em i lusim kantri na go long Nu Silan olsem sampela bisnisan, ol sief long ailan na ol feil politisen i bin gat bikpela sapot long Fiji ku we i bin kamap long mun Me las yia.  
 Kenel Seruvakula i bin tok i

no George Speight na lain bilong em husat i stap nau long Nukulau haus kalabus i go pas long ku, nogat.  
 "Em bai kamap long ples klia long ol wok painimaut husat tru i bin go pas long ku.  
 "I no ol lain long Nukulau i kamap wantaim tingtign long

holim ku, nogat. Ol dispela lain em ol namelman.  
 "Ol lain husat i bin go pas long ku em ol i wokabout fri, ol i wok na ol i kisim pe tude," Kenel Seruvakula i bin tok.  
 Kenel ya bai i kamap olsem wanpela instrakta o tisa wantaim Nu Silan ami.



# Foapela de operesen bilong seperetim Saimis twins

**Singapo:**  
 Wanpela grup bilong ol sejen dokta i bin karimaut wanpela bikpela opere-sen bilong seperetim tupela Saimis twins husat i pas wantaim long het na kru.  
 Saimis twins em ol twins we i pas long sampela hap bodi bilong ol taim mama i save karim ol.  
 Dispela tupela Saimis twins em ol i bilong Nepal. Long Mande ol i bin tanim 11-pela mun. Mama i

bin karim ol taim ol i pas wantaim long het na ol i serim wanpela rop bilong kru.  
 Ol ripot i tok ol spe-selis sejen dokta i bin wok hat stret na kari-maut operesen long foapela de stret long seperetim kru bilong tupela i bin pas wantaim.  
 Ripot i tok opere-sen i bin go gut tasol, na nau tupela twins i stap gut long Singapo Jenerel Haus sik.

# Hevi namel long Amerika na Saina

## ••• Saina i lusim 24 kru i go



**Amerika:**  
 Pailot bilong balus bilong Saina i bin dai na Saina i bin holim kalabus ol 24 kru memba bilong E-3 Aries long Hianan Ailan i stap inap long lsta wiken na larim ol i go bihain long ol strongpela negosiesen namel long ol lida bilong tupela kantri.  
 Bihain long ol toktok namel long Presiden George Bush bilong Amerika na lain bilong em wantaim ol Saina lida, Saina i bin larim i go fri 24 kru bilong

EP-3 Aries spai balus husat ol i bin holim pasim ol long Hainan Ailan.  
 Dispela em i stat yet long April 1 taim E-3 Aries i bin bam wantaim F-8 paita balus bilong Saina antap long Saut Saina solwara, 70 kilomita klostu long holido risot ailan bilong Saina em Hainan Ailan.  
 Pailot bilong F-8 paita balus bilong Saina Pailot Wang Wei i bin dai long dispela birua.  
 Saina i wok long singaut long

Amerika long tok sori long dispela birua tasol planit pipel long Amerika i no laik bikos ol i bilip olsem em i no rong bilong Amerika long dispela birua i kamap.  
 Ol ripot i tokem i namba tri taim paita jet bilong Saina i wok long plai klostu- long balus bilong Amerika we i wok long ron isi taim tupela i bam.  
 Balus bilong Amerika i bin bungim sampela bagarap na em i pundaun long Lingshui

• Lida bilong Saina Jiang antap (hankais) na Presiden George Bush (raithan) bilong Amerika i traim hat long stretim dispela hevi we i kamap taim supa spai balus bilong Amerika EP-3 Aries i bin bamim wanpela F-8 paita balus bilong Saina tupela wik i go pinis.  
 Long hankais, em Hainan Ailan we Saina i bin holim kalabus ol kru na ples klostu we birua i bin kamap long en. *Piksa i kam long Weekend Australian nius-pepa.*

ples balus long Hainan Ailan. Bihainim birua namel long tupela balus, em i bin kisim 26 minit long pailot bilong EP-3 Aries long kisim bek kontrol na karim balus isi isi i wokim imejensi pundaun long Hainan Ailan.  
 Birua i bin kamap long intenesenel ea spes Na Amerika i no brukim wanpela lo o go insait long ea spes bilong Saina, nogat. Saina na Ameriak i no ol birua kantri na ol lida i wok long stretim dispela samting long gutpela rot bilong toktok.

# Ol Dayak wanpis laikim ol mobail plis aut long Sampit

**Jakarta, Indonesia:**  
 Sampela long ol 200 mobail plis long Sampit insait long Borneo i bin lusim dispela ples bihain long ol Dayak wanpisin i wokim strongpela toktok long katim het bilong ol sapos ol i no lusim Sampit, ol ripot i tok.

Bosman bilong ol plis long Sampit Sief Sinia Komisina Petrus Hardono i tok ol bin salim 550 memba bilong raiot skwat i go long Sampit bihainin trabel namel long ol wanpisin.

Em i tok pablik long hap i bin singautim long helpim na ol i bin salim ol i go

Tasol wanpela bikman long Sampit siti em Zul Rahman i tok ol Dayak hauslain i stuim tok long ol Brimob plis raiot skwat long wokim nabaut long dispela operesen, long kisim bek ol samting bilong pait long ol Dayak. Nau ol Dayak i autim strongpela tok lukaut long katim het bilong ol raiot plis sapos ol i no lusim Sampit.

Ol ripot i tok Dayak komyuniti i givim strongpela tok lukaut long "noken raun long strit bikos ol bai katim het bilong ol".

Ol i stat long rausim ol Brimob long wiken taim wanpela plisman i dai bihainim wanpela trabel we ol wanpisin i bin laik kamapim trabel long Sampit plis hetkota las Mande.

Plis i bin paiarim tiages long planti handret Dayak hauslain husat i bin laik bagarapim wanpela bilding bilong ol Brimob hausng yunit.

Foapela raiot skwat memba bilong Brimob i dai pinis insait long ol trabel ya we ol Dayak i no laik bai plis i rausim ol samting bilong pait long ol.

Stat yet long dispela Februeri, ol Dayak wanpisin i bin statim strongpela kempin long rausim ol setla bilong Madura Ailan long Java husat i sindaun long graun bilong ol (Dayak).

Ol ripot i tok i kam inap nau, ol Dayak i katim het na kilim moa long 500 Madura setla long en.

Samting olsem 70,000 Madura setla i ronawe lusim Sampit bihainim dispela hevi na go bek long Java.



# Kantri Holan i tok oraitim yutenasia

••• na Dokta Nitschke bai supavaisim dispela wok ausait long Australia

**Melbon:** Yutenesia kempeina o dokta i laikim ol sikman i mas gat rait long tok orait sapos ol i laik dai i plen nau long wokim yutenasia ausati long Australia. Dokta Philip Nitschke i plen long yusim wanpela sip bilong Holan long supavaisim ol lain husat i gat tok orait long dai long en. Dokta ya i wok long karimaut ol wok painimaut long sait bilong lo long rot bilong larim ol man i gat rait long tok orait long dai bilong ol sapos ol i sik nogut tru. Ripot i tok long las wik tasol palamen long Holan i givim tok orait long gviim ol man i gat rait sapos ol i laikim ol dokta i helpim ol long dai.

# Moa Fut na maus sik i kamap yet

**Briten:** Sik Fut na maus bilong ol kau na pik long Ingran i go moa yet na ol ripot long dispela taim i tok moa long 1,100 fam i bagarap wantaim dispela sik. Ripot i tok dispela sik we i bagarapim ol animel na wok mani bilong Briten i kalap i go long narapela tripela kantri long Yuropien Yunien]. Nedalens o Holan i wanpela long ol. Ol plis i bin paia i go long planti handret fama husat i wok long egensim pasin we ol atoriti i kukim ol helti laipstok. Ol ripot i tok ol fama i bin blokim Kootwijerbroek we i stap long rilijes Baibel belt long sentri Holan i bin egensim pasin we ol atoriti i laik kilim dai ol helti animel long lukautim ol long dispela sik bilong fut na maus. I kam inap nau, Holan i gat 18 keis bilong fut na maus sik, Briten we sik i bikpela tru i gat 1,165 animel bilong ol i pundaun wantaim dispela sik na Frans i gat tupela taim Ailen i gat wanpela. Ol Agrikalsa ministra bilong ol Yuropien Yunien kantri i bin bung long Sweden long toktok long yusim vaksinesen o banis sut long ol animel bilong traime stapim dispela fut na maus sik long en. Planti lain long ol yunien kantri i lukim osem dispela i nupela polisi. Planti pipel tu i wok long egensim ol nupela rot bilong faming na ol ministra i wok long dibeit long futja senis bilong Ol EU Komon Agrikalsa polisi long en. Wanpela pepa i bin kamap long miting i tok dispela nupela rot bilong faming na bagarap long envoirnmen, pasin bilong kisim sik i go long ol arapela ples, lukautim ol animel na trenspot i samting we ol EU ministra i bin wari na toktok long en. Briten i wok long putim strongpela lo long ol fama long tambuim ol long wok-about bilong ol bihainim sik i kisim ol pupela eria we i no bin gat sik pastaim, Fut na maus sik bilong ol animel i no save kamapim hevi na bagarap long ol man, ol ripot i tok. Ol animel olsem pik, kau, goat na sipsip i disave go bung nating stret taim dispela sik i kisim ol. Rot we sik i ken go long ol arapela eria, ples na kantri em long sait bilong trenspot, ol klos na su bilong ol man na win.

# Ples i bagarap



• Wanpela man Aceh i ron long baisikel na lukluk sori long ol bagarap i kamap long Idi, ples we ol stoa i bin sanap long en tasol hevi namel long ol paitman husat i laik bruk lusim Indonesia i pait wantaim ol ami i kamap bikpela na ples na olgeta samrting i stap long dispela taun i paia. Piksa i kam long Weekend Australian niuspepa.

Long Aceh, wanpela long ol provins long Indonesia we hevi i stap long en, ol pipel i no save husat long pretim moa. Ol ami o ol paitman? Idi i gat 25,000 pipel long en tasol nau ples i nogat man i tumas i stap long en bikos ol i pret na ronawe na hait i stap long ol mosk o haus lotu na ol gavman na plis pos. Bikpela pait i stap namel long ol paitman bilong Fri Aceh Muvmen (FAM) na ol ami na plis bilong Indonesia. Muvmen na pait i stap long wes bilong Sumatra Ailan. Long Mas 3 taim ol pipel bilong Idi siti i redi long sindaun long kaikai bilong ol long nait, 200 paitman i bin wokim bikpela pait wantaim ol ami na plis. Eitin pipel i bin dai na planti pipel i bungim ol samting bilong ol na lusim taun. Nau yet, ol i pret long go bek long taun. Tasol planti samting na ol haus i paia na bagarap pinis insait long pait namel long ol Aceh paitman na ol ami. Ol pipel i kisim moa hevi long pait.

# Hevi long Midel Is



• Wanpela plis opisa i glasim ol bagarap long Palestain militeri pos long Beit Lahiya long Gaza Strip bihain long Israel ipairim ples ya. Piksa i kam long Weekend Australian niuspepa.


**Difens Minista bilong Israel** Binyamin Ben Eliezer i tok bihainim pasin we ol ami bilong Israel i bin go insait long eria we i stap aninit long lukaut bilong Palestain, Israel i laikim bai Palestain i sindaun gen wantaim ol long ol toktok bilong stretim ol hevi. Wanpela man Palestain i bin dai na narapela 24 i bin kisim bagarap taim ol Israel ami i bin tromoim ol tenk bom long Khan Yunis refuji kem long saut Gaza Strip. Ol ripot i tok dispela em i namab wan kain operesen we Israel ami i wokim insait long sikspela mun taim hevi namel long tupela sait i go nogut long las Septemba. "Mipela i laik kirapim bek ol toktok na as longdispela operesen bilong ami em long soim ol Palestain lain olsem ol i mas gat intres long go bek long negosietsen tebol. "Operesen i bin go gut tasol mipela i nogat tingting long go bek long Jon A. Jon A em eria we i stap aninit long ful Palestain emnistresen, sekyuriti na kontrol." Mista Eliezer i tok. Kenel Lior Shalev husat i bin go pas long operesen i tok ol Israel ami i bin go insait long 300 na 350 mita long Jon A. Dispela em otonomes eria. Em i tok bikpela na strongpela pait i bin kamap long eria. Em i tok ol Israel ami i bin sut bek tasol bihain long ol Palestain lain i sut long ol bilong lukautim ol yet. Em i tok ol i bin fos long sut wantaim katres, anti-tenk bom na ol mota. Em i tok planti handret Palestain paitman i ogenaisem ol gut na fesim sampela grup Israel ami memba wantaim ol tenk na buldosa. Em i tok Israel i bin karimaut dispela operesen bihain ol Palestain paitman i wok long sutim ol lain setelmen long Neve Dekalim long Gush Katif setelmen eantaim ol mota na tu ol ami pos long sauten Gaza Strip. Mista Ben Eliazer i tok Israel i laik holim ol nupela sekyuriti toktok wantaim ol lain Palestain. Amerika husat i no bin wanbel long dispela operesen i laikim sekyuriti toktok namel long tupela sait i mas kamap. "Ol ripot i tok pait ya i bin bruk bihain long wanpela Paelstain opisel i ripotim olsem ol sinia Israel na Palestain opisel i holim bung long stretim dispela hevi long Wes Beng we i go nogut insait long sikspela mun. Long Wasington, Presiden George Bush husat i wok long holim miting wantaim King Abdullah bilong Jordan long Tunde i bin tok em i laik wok wantaim tupela grup long painim rot bilong mekim tupela sait i lusim ol samting bilong pait na stretim hevi. Israel ami i tok em bin go insait long eria bilong Palestain bilong bagarapim ol haus na ol diwai oliv we ol paitman i save hait long en na sut i go long ol Israel setla long Wes Beng. Ami i tok operesen i gat as na em i bilong tagetim ol trabel lain. Palestain i tok Israel i nogat rait long go insait long eria bilong Paelstain. Bikpela bilong Gaza Strip eria em i 40 kilomita longpela na bikpela em sikspela kilomita waid. Samting olsem 2 milien Palestain pipel i stap long en. Ol ripot i tok ol Israel ami i wok long yusim tupela tenk bilong Israel ami we i wok long paiarim ol sel na masin gan na tupela buldosa long bagarapim ol haus bilong ol Palestain we i lukluk i go long ol setelmen bilong ol Jews.

# Karamap mani i no pilai tasol Esia i pret long karensi hevi gen



• Sekyuriti gad long wanpela beng long Seoul biktaun bilong Korea i kolektim ol bandel US Dola mani long wanpela beng long Seol. Gavman i wok long traime hat long stretim hevi we kantri i bungim wantaim won, mani bilong Korea yet bihainim ikonomi o mani hevi we nau i wok long bungim gen Esia. Piksa i kam long Weekend Australian niuspepa.

YUMI ken tok Dola mani bilong Australia i nogat poroman tumas tasol em i no stap em yet, nogat. Ol karensi o mani bilong ol kantri long Esia olsem won, baht, peso, dong na rupiah we i bin bungim bikpela hevi long 1997/98 i wok long pret gen long wankain hevi bai kamap. Sentrel beng bilong Tailen long las wik i bin tokaut olsem em i laik helpim baht mani bilong em na olsem gavman i helpim em long karensi maket taim em i putim moa helpim mani long em insait long tripela yia. Wanpela dola bilong Amerika inap long inap long Bt45 bilong Tailen. Ol fainens ministra husat i kam long ol kantri i memeba bilong Saut is Esien Nessen olsem Saina, Saut Korea, Japan na ol arapela moa bai askim Amerika na Yurop long helpim putim plua aninit long yen (mani bilong Japan) o givim hepim we i wok long kamapim hevi long mani na ikonomi bilong Esia. Ol ripot i tok karensi bilong Japan em yen nau i stap daun-bilo tru olsem dispela i bin kamap long Januari 1998. Na wankain tu long won em karensi bilong Korea, Singapo, Filipins na Vietnam. I kam inap nau, dispela ol karensi i stap long hevi kantri olsem Tailen, Indonesia, Saut Korea, Filipin na Malesia we ol i bin kisim US100 bilien helpim long 1997.98 taim hevi long ikonomi o wok mani i kamap long rijen, i no wari tumas yet wantaim hevi yet.



# WANTOK

## ASKIM

**1. Hamas yia nau yu save ritim Wantok?**

- 1 yia  3 yia  Moa long 5 yia

**2. Em isi o hatwok long painim na baim Wantok?**

Isi bikos .....  
Hatwok bikos .....

**3. Yu ting wanem long pe bilong Wantok?**

Dia tumas .....  
I orait .....

**4. Yu save baim Wantok long wanem hap?**

- Stua  
 Strit  
 Maket  
 Narapela man baim na mi ritim

**5. Taim yu ritim Wantok pinis, hamas moa manmeri save ritim?**

Namba .....

**6. Yu save baim Wantok long wanem de?**

- Fonde  
 Fraide  
 Sarere  
 Sande  
 Mande

**7. Taim yu baim Wantok, yu save ritim wanem stori pastaim?**

Bekim .....

**8. Yu amamas long ritim wanem ol stori long Wantok? Makim 5-pela tasol.**

- |  |  |
|--|--|
| <input type="checkbox"/> Pes 1 Nius        | <input type="checkbox"/> Plis Ripot    |
| <input type="checkbox"/> Bogenvil Nius     | <input type="checkbox"/> Biabia        |
| <input type="checkbox"/> Tu Minit Tingting | <input type="checkbox"/> Provins Nius  |
| <input type="checkbox"/> Sios Nius         | <input type="checkbox"/> Wol Nius      |
| <input type="checkbox"/> Laipstail         | <input type="checkbox"/> Kanage        |
| <input type="checkbox"/> Musik Stori       | <input type="checkbox"/> Top 20        |
| <input type="checkbox"/> Penpren           | <input type="checkbox"/> Stori Tumbuna |
| <input type="checkbox"/> Ol Pas            | <input type="checkbox"/> Laiplain      |
| <input type="checkbox"/> Tambu Toro        | <input type="checkbox"/> Spot Poto     |
| <input type="checkbox"/> Spot Dro          | <input type="checkbox"/> Spot Nius     |

**9. Putim nem bilong tripela stori yu save les long ritim?**

a) .....  
b) .....  
c) .....

**10. Yu laik lukim wanem kain ol resis long Wantok?**

- Kaunim mani  yes  nogat  
Painim Bal  yes  nogat  
Kanage/Mutrus  yes  nogat  
Makim pes  yes  nogat

Ol narapela resis .....

**11. Yu save go insait long ol arapela resis olsem bilong Maggie Noodles, Coca Cola, Milo na Trukai o nogat?**

- Yes  Nogat

**12. Yu laik lukim ol kain resis olsem long Wantok?**

- Yes  Nogat

**13. Yu save laikim ol Wantok Spesel Saplimen tu o nogat?**

- Yes  No

**14. Yu laik lukim wanem kain ol edvetismen o toksave long Wantok?**

- Ol kaikai, sop, marasin  
 Ol nupela ka, bot, masin  
 Spesel bilong hadwea stua masin  
 Betde gritings na painim wantok timba bilong wokim haus  
 Ol tenk wara, kapa, nil  
 Painim wok  
 Ol nupela prodak  
 Masin bilong katim diwai  
 Toksave bilong gavman  
 Ol spesel bilong bakstua  
 Ol spesel bilong supamakot  
 Ol seken hen ka, klos, masin

**15. Yu bin baim sampela samting long ol edvetismen yu lukim long Wantok?**

- Yes  Nogat

Yu baim wanem samting: .....

**16. Yu laik lukim wanem ol arapela nupela samting long Wantok?**

Bekim: .....

**17. Yu laik lukim moa poto o stori o edvetismen long Wantok?**

- Moa poto  Moa stori  Moa edvetismen

**18. Yu laikim mipela prinim Wantok hamas de long wik?**

- Olgeta de  Tupela de  Wanpela de tasol

**19. Yu ting wanem long Tok Pisin bilong Wantok?**

- I orait  I kranki liklik

**20. Yu save yusim Wantok long skul bilong rit na rail?**

- Yes  Nogat

Sapos yes, tokaut: .....

**21. Yu save kisim nius olsem wanem?**

- Long Wantok  
 Long ol Inglis niuspepa  
 Long redio  
 Long televisen  
 Long komputa

**22. Yu save baim ol dispela niuspepa tu o nogat?**

- The Independent  
 Post Courier  
 The National  
 Southern Post  
 New Guinea Island Post  
 Highlands Post  
 Mamose Post  
 Ol ovasis pepa

**23. Yu save harim redio o nogat?**

- Yes  Nogat

**24. Yu save harim wanem redio stesin?**

- Provinsal redio stesin  Karai  
 FM 100  Yumi FM  
 Nau FM  FM Central  
 FM Morobe

**25. Yu save lukim TV o nogat?**

- Yes  Nogat

**26. TV bilong yu inap long kisim wanem ol stesin?**

- EM TV  ABC  
 7 Central  HBO

- SBS  CNN  
 Discovery  Video Channel  
 FM Central  ESPN  
 BBC  AUSTV  
 DW  NHK  Indonesian Channel

**27. Yu save yusim komputa o nogat?**

- Yes  Nogat

**28. Yu save yusim komputa long haus o long opis?**

- Haus  Opis  Tupela wantaim

**29. Yu laik ritim Wantok long komputa bilong yu?**

- Yes  Nogat

**30. Yu wokman o wokmeri?**

- Yes  Nogat

**31. Yu mekim wanem kain wok nau?**

Bekim .....

**32. Yu pinisim skul long wanem gret?**

Bekim .....

**33. Krismas bilong yu .....**

**34. Yu man o meri?**

- Man  Meri

**35. Yu gat ka o nogat?**

- Yes  Nogat

**36. Yu stap long ples o long taun?**

- Ples  Taun

**37. Long 12-pela mun i go pinis, yu baim ol dispela samting? Makim tasol long bokis.**

- Ka  Sia na tebol  Komputa  
 Televisen  Samting bilong sanapim haus  
 Haus  Vidio  Tenk wara  
 Ol samting bilong haus kuk  Aut bod moto  
 Sen so  Redio

**38. Yu plen long baim ol dispela samting long dispela yia? Makim tasol long bokis.**

- Ka  Sia na tebol  
 Televisen  Komyuta  
 Haus  Samting bilong sanapim haus  
 Haus kuk samting  Vidio  
 Ol tenk wara  Aut bod moto  
 Jen so  Vidio

**39. Yu stap long ples o taun?**

- Ples  Taun

**40. Nem bilong yu (sapos yu laik) : .....**

**41. Pos opis dres bilong yu : .....**

Telipon namba .....  
Fax namba .....  
Komyuta adres .....

Postim long dispela adres: Wantok Askim  
PO Box 1982, BOROKO, National Capital District

Yu ken salim bekim bilong yu i ken yu long fax namba:  
(675) 3252500 o long komyuta adres : word@global.net.pg

# LAIIPSTAIL

## Laipstail na sindaun long ailan

**JAMES NAI KIM i raitim**

LAIIPSTAIL na kalsa o pasin bilong planti ples insait long kantri bilong yumi Papua Niugini i no save wankain. Pasin bilong wokim haus, gaden na wok bilong painim abus na wok liklik long painim liklik mani tu i narapela kain olgeta. Wanwan ples o sosaiti i save gat ol kalsa na bilip long wokim ol kain samting em ol i ting em i stret long tingting na save bilong ol. Dispela kainkain ol pasin bilong wanwan ples o sosaiti i mekim yumi save painim hat tu sapos yumi go sindaun wantaim ol manmeri bilong dispela hap. Long sait bilong painim kaikai, abus, wokim haus na long kisim ol narapela gutpela samting bilong lukautim laip i no save stret tumas long laik na tingting bilong yumi wanwan. Tasol taim yumi i stap longpela taim liklik ating wanpela o tupela mun bai yumi save moa long i stap long dispela kain laipstail na pasin bilong dispela ples o sosaiti.

Mi bin lusim ples bilong mi long Novemba las yia 2000 na mi bin go stap inap long pinis bilong yia wantaim susa bilong mi na famili bilong em long wanpela ailan ples ol i save kolim Kranget. Dispela ailan i stap hapsait tasol long basis bilong haba long not-ist sait bilong Madang we ol sip i save i go i kam long Madang long wokim bisnis. Sapos yu bin i stap pinis long Madang em ating bai yu ken klia long dispela ailan mi stori long em.

Mi bin stap inap yia 2000 i pinis na i kam inap long dispela nupela yia em nau yumi stap long em. Long Februari 11 long dispela yia, susa wantaim famili na mi bin lusim ailan na kam bek long bikples long nupela haus long hap we man bilong susa nau yet i wok long em. Dispela em long Divain Wod Yunivesiti.

Klostu olsem foapela mun olgeta mi bin stap long Kranget na dispela em longpela taim liklik inap we mi bin lainim na save long planti kain lo na pasin o

laipstail bilong ailan i kirapim tingting bilong mi long kisim pen na pepa long raitim dispela liklik stori na ekspirians. Mi bin luk save tu olsem Kranget i narapela kain liklik long ol narapela ples we mi bin raun na i stap long em.

Nupela taim yet taim mi go i stap long Kranget planti manmeri i no save long mi tasol i gat wanwan ol manmeri mi save long ol em wanwan taim mi sae go lukim ol na sindaun stori wantaim. Taim mi raun long apinun bihainim rot o nambis na sindaun malolo aninit long ol diwai, mi save skelim tingting long kain ol we, pasin na ol laipstail bilong ol manmeri long dispela ailan.

Haus bilong ol i save gat kain mak we i luk stail na smat. Dispela stail em mi no bin lukim long ol narapela ailan ples na bikples tu long Madang. Ol i save wokim haus long ol bus diwai ol i save go kisim long bikples na bringim long bot i go long ailan. Tasol nau yet planti bilong ol save gat wok o ol husat i gat mani i save baim ol timba long taun na kisim i go wokim haus. Bihain ol i save pentim, putim flai waiya na mekim i luk olsem wanpela moden stail waitman haus. Tasol taim yu lukluk gut bai yu painim olsem em wanpela lokol stail haus i gat lip saksak na bun bilong lip saksak ol i yusim long banisim haus long em. Narapela samting tu i olsem olgeta haus i save i gat ol wanwan blok bilong ol yet ol i makim na planim ol kain bilas piawa na i mekim ples i luk nais tru. I gat tu ol hap ol i makim bilong wokabaut long em. Ol i kapsaitim wesana long bik rot na i gutpela moa long wokabaut.

Narapela samting em long sait bilong wokim gaden. I gat ol wanwan liklik gaden banana, tapiok na yam ol wanwan lain famili i save wokim klostu klostu long narapela. Taim ol i stap nating na nogat narapela samting long wokim, ol i save go mekim ol sampela liklik wok long gaden. Tasol planti taim tu mi save lukim ol manmeri i save

gaden long bikples.

Planti bilong ol i gat wok mani long taun tasol planti tu i save stap long ples. Ol lain i stap nating i save mekim ol narapela liklik wok bisnis olsem salim karasin, kukim ban na ronim tred stua long kisim liklik mani bilong helpim ol yet.


Long nait na de taim ol mama na tu ol man i save tromoi umben na huk long kisim pis em ol bai drain na salim long maket. Dispela kain ol liklik wok i save helpim ol gut tru long kisim mani na lukautim famili long kaikai, skul fi, klos na ol narapela samting ol laikim long kisim.

Lo na oda sistem insait long Kranget em wanpela samting i save mekim mi laikim tru long stap long ailan. Ol kain pasin bilong mekim nois nabaut, spak na kamapim bagarap olsem mi save lukim long ol narapela ples i no bin kamap long taim mi bin stap long hap. Olgeta apinun na nait ples i save stap isi na kwait

about long rot bilong ka long go i kam long skul.

Krangket ailan em i wanpela ples i bing at nem long wokim musik taim bipo taim Papua Niugini i no bin kisim indipendens yet. Insait long histori bilong Madang long sait bilong musik em Kranget i bin holim lid o biknem long wanpela lokol stail string ben ol i bin kolim, "Jomba Drifters". Planti ol man i bin lainim long mekim musik long dispela taim bilong Jomba Drifters. Tasol dispela ben i bruk daun long taim yet na ol memba bilong ben i lusim na stap nabaut. Ol dispela gut taim musik man nau i lapun pinis na i stap tasol long ples nau.

Mi yet tu mi save long wanpela man nau i lapun n em i wanpela ki man long bipo long kamapim dispela kain mambu ben musik. Nem bilong dispela man em Aksim Siming. Em i stap nau long Kranget ailan. Em i bin go daun long Fiji long bipo na i bin lainim na kisim



• Dispela man bilong Kranget ailan em i wanpela bilong ol lain i save putim haus long rent i go long ol manmeri husat i nogat haus na tu em i save kisim pis long umben na salim long maket. Nem bilong em Mitibok na em wanpela asples man bilong Kranget ailan. Foto: JAMES NAI KIM.

hairim bot long kisim ol i go long bikples long wok gaden na kam bek long apinun. Mi bin askim wanpela pren bilong mi long save moa long dispela na em i tok dispela em i no nupela samting ol i save wokim long go long bikples na wokim gaden. Taim bipo yet i gat dispela kain pasin olsem i stap i kam inap nau. Bipo ol i save yusim kanu tasol nau i gat ol planti liklik bot sevis em ol save yusim long go wok gaden, kisim ol samting bilong haus na tu long kisim ol drai diwai bilong paiawut. Dispela i luk olsem planti hat wok tumas long tingting bilong mi tasol long ol em i olsem hap pat long sistem bilong laip na sindaun bilong ol. Tasol mi harim tu olsem kaikai taim i redi long gaden, i save gat planti stil pasin i save kamap. Dispela i no mekim ol i les o surik long go wok gaden long bikples. Nogat, trangu ol i save ol i nogat narapela rot moa olsem na ol i stil i save go het yet long wokim

tru. Ol i no save opim radio strong na kamapim nois na tu ol liklik pikinini i save harim gut tok na i no save mekim nois tumas long haus na ples.

Long de na nait taim, i save gat pasin bilong rispek i save stap insait long ples. Ol wantok tu i no save raun nating nating long kainkain haus na kaikai nabaut wokabaut. Tasol pasin bilong wok bung long ples na helpim long wokim haus, klinim ples o sapim kanu em wanpela pasin we i gutpela tru mi lukim long Kranget.

Long Kranget tu i gat wanpela komyuniti skul i stap we ol liklik pikinini i save go skul long em. Ol papamama i no wari logn wokabaut bilong ol pikinini long wanem i nogat ka long rot na bai ol i pret na tingting planti long sefti bilong ol pikinini. Dispela skul i gutpela moa na i winim long taun bikos long taun bai gat pret long nogut ka bai bamim pikinini taim em i wok-

dispela stail bilong mambu na string ben musik i kam long Madang na Papua Niugini.

Planti ol manmeri i save laikim dispela gutpela stail bilong musik bilong bipo. Mi yet tu mi bin harim dispela musik taim mi stap mangi yet. Tasol nau planti ol pawa ben i kamap strong na ol olupela gut taim string ben i nogat nem moa na i pinis. Tasol planti man ol save yet long mekim kain musik olsem wantaim mambu na gita.

Dispela ol kainkain samting i save mekim wanwan ples i save gat nem na mak o namba insait long sosaiti. I gutpela long raun na lainim ol kain samting we i ken helpim yumi long save moa long dispela ples o pipel.

Mi save tingting sapos i gutpela moa long rekodim ol kain stori, laipstail na histori bilong ol kain wanwan ples bai ol pikinini bilong bihain i ken lukim na kisim save long em.

# Papagraun kisim mani long graun bilong pilai kas

.....papa bilong kas tu kisim sampela mani

YAMES KAY i raitim

PILAI laki wantaim kas nau yet i kamap olsem wanpela bikpela samting tru long laip bilong planti manmeri insait long Papua Niugini.

Pilai kas i save kisim taim bilong planti manmeri tru. Sampela i ken sindaun long pilai kas stat long moning i go apinun. Dispela em sapos ol i winim mani. Tasol taim ol i lus wantu tru ol i save lus lain na daunim het tasol na wokabaut i go long haus.

Em i tru olsem pilai laki wantaim kea em i tambu long pablik ples. Gavman i putim lo bipo yet olsem em i tambu long pilai kas. Tasol tru tumas planti manmeri i no save bihainim dispela lo. Ol i save hait na strong het na pilai yet.

Long planti hap kona bilong taun na ol setelmen, bai yu lukim kainkain ol pasin tu i go wantaim dispela rot bilong pilai kas na kisim mani.

Pilai kas i save bringim amamas taim ol manmeri i winim mani. Tasol sori na belhat na kros i save kamap taim ol i save lus. Trangu planti i save pes drai na wokabaut sori i go long haus.

Planti taim kros na pait i save kamap namel long famili taim papa o mama bilong haus i holim olgeta mani long kas na famili i nogat mani long baim kaikai.

## Pe bilong graun bilong pilai kas

Mi laik stori hia long wanpela pasin mi bin lukim long ai bilong mi we i bin kamap long Goroka. Samting ya em i nupela tru long ai bilong mi na samting mi bin guria tru long lukim na save.

Mi wantaim sampela poroman i bin go sanap raun raun arere long narapela liklik



• Pilai Lotto em wanpela rot bilong pilai laki tasol i kam aninit long lo. Wanpela kastoma i baim Skrats Loto kat long K1. Sapos em i laki em bai winim mani.

## Tawil i matir long Wes Beng

RITIM stori bilong wanpela midel klas yangpela bilong Ramallah i groap na kamap wanpela humen bom, olsem Virginia Quirke i ripotim.

Ramallah i stap long Wes Beng em hap eria we ol Israel na Palestain i pait long em long Midel is.

Ol i putim posta piksa bilong wanpela yunivesiti sumatin long olgeta hap bilong Ramallah taun long Wes Beng. Piksa em i bilong wanpela yangpela maus gras i putim leta jeket na blupela polo kol siot. Tupela M-16 rafel i stap long saitr saitr bilong yangpela man long piksa.

Piksa i karim strongpela mesej olsem man ya i wanpela matir o man i dai long bilip olsem samting em i wokim i rait na bai helpim ol pipel bilong em. Tasol long wankain taim tu, em i wanpela suesait boma we 25 israel lain i bin bagarap long en las wik.

Dia Tawil em nem bilong dispela yangpela man i stap long piksa. Em i gat 20 kris-mas na i wok long skul long enjiniaring long Bir-Zeit Yunivesiti long Wes Beng.

Em i kam long wanpela midel klas famili. Papa bilong em i wanpela jenelis o nius ripota na mama em i tisa. Tupela susa na wan-

pela brata i save na toktok gut long Tok Inglis.

Ol papamama na haus lain bilong em i wok long laik save stret watpo na em i wokim dispela samting em i wokim long en.

"Em i bin wanpela belhat man tru," susa bilong em Nida i tok.

"Em i save komplek olsem ol Israel i save lukluk gut moa long ol animel bilong ol tasol i nogat long ol Palestain pipel," Neda i tok.

Taim em i lukim piksa we ol Israel ami i sutim dai o kamapim bagarap long ol Palestain, em bin save singaut na krai wantaim.

Haus bilong Tawil famili i stap klostu long ples City Inn jansen na dispela em eria we pait namel long ol Israel na Palestain i kamap strong long en.

Dispela i stat yet long las yia Septemba taim ol Palestain lain i strongim pait egens long ol Israel long Wes beng na Gaza Strip bihainim wokabaut bilong nau Paim Minista bilong Israel Ariel Sharon i go long santu ples long Al Aqsa mosk o haus lotu.

Long famili hausTawil i save was long ol Palestain i tromoim ol ston samting i go long ol Israel ami tasol em i

tok dispela i no gutpela rot.

Long famili bilong em, Tawil tasol em i wanpela strongpela Muslim i save givim moa taim long go pre long mosk na i no long skul bilong em long yunivesiti.

Famili bilong em tu i no bin save olsem em i wok long go insait long dispela samting.

Long de bipo em i kari-maut bom atek, em bin tokim mama bilong em olsem em i wok long go lukim ol poroman bilong em.

Neks taim famili bilong em i lukim em, em long telivisen taim em i wokim las fjtubai preia bilong em. Em bin ritim Koran Baibel ves na tok olsem em bai kamap olsem neks matir. Em bin tok strong olsem em bai brukim ol bun bilong ol Israel na ol bai lukim dai. Long pinis bilong sotpela toktok em i singim wanpela Baibel ves em i putim rop katres raun long bodi bilong em na go sanap long wanpela bas stop long Jerusalem na bloim em yet. Militeri grup bilong Palkestain em Hamas i bin kisim tok long wokim dispela birua. Tasol famili bilong em i no bin save olsem Tawil i bin memba bilong Hamas inap em i dai.

maket i stap long graun bilong ol lain asples. Long arere tasol long dispela maket grup manmeri na ol yangpela i wok long mekim save pilai kas i stap.

Mipela i sanap lukluk i stap na mi lukim wanpela yangpela meri i wokabaut tasol i go long ol dispela grup husat i pilai kas na stat long koletim o kisim mani long bet ol manmeri i putim. Mi guria tru long lukim dispela bikos pestaim tru mi ting meri ya i kros na laik kisim bek mani bilong em. Tasol bihain mi lukim em i wokabaut i go long ol wanwan grup i sindaun pilai kas na stat kisim mani long het bilong ol.

Narapela poro i kirap na tokim mi olsem wanem samting meri ya i makim em pasin bilong kisim mani bilong graun.

Poro ya i tok klia olsem yangpela meri ya em pikinini bilong wanpela papagraun na em i kisim mani long ol dispela manmeri husat i yusim graun bilong em long pilai kas.

Dispela em wanpela nupela kain pasin tru mi bin lukim. Mi ting em kompensasin tasol, poro ya i tok klia gut olsem dispel pasin i save kamap olgeta taim bikos papagraun ya i save klinim dispela ples na ol lain ya i save kam na yusim tasol long pilai kas na winim mani.

Taim mipela sanap yet narapela man i wokabaut i go na stat long askim long pe bilong kas em ol Jain long kandis i wok long yusim long pilai. Dispela man i bin givim ol kas long ol bai yusim na pilai. Tasol em tu i mas gat hap sea bilong em long kas bilong em. Ol mas peim em sampela mani bikos ol i yusim kas bilong em.

## Planti kandis na kainkain stail bilong pilai

Insait long Hailans rijon dispela pasin bilong pilai kas i save strong tru insait long ol hauslain na yu bai kirap nogut sapos yu wanpela trupela man long go long wanpela viles na lukim ol manmeri i sindaun long bikpela grup i stap. Ol i save kolim dispela grup bilong pilai kain em "kandis."

Long Isten Hailans tu dispela pasin bilong pilai kas em i pas strong tru long blut bilong planti lain huat i stap long hauslain na ol setelmen arere long Goroka taun. Sapos yu raun long Genauka. Pis-wara o Banana blok bai yu lukim ol manmeri bilong kain kain ples i sindaun na mekim save long pilai kas i stap.

I no long Isten Hailans tasol. Sapos yu raun long Simbu, Sauten Hailans, Enga na Westen Hailans bai yu lukim tu dispela kain pasin bilong pilai kas tu i stap.

Long sampela hap bilong nambis tu i gat dispela pasin bilong pilai kas na winim mani.

Ol i save bet long laik bilong ol bet. I gat bet i stat long 10 toea, 20 toea na 50 toea i stap long saitr. Na long narapela salt bai yu lukim ol lain i swim bikpela mani.

## Kainkain ol kas gem


I gat planti ol kainkain we bilong pilai kas na winim mani. Wanpela isi rot long pilai hari-ap na win em ol i kolim S-Ep. Long dispela gem planti lain i ken pilai. Wina bilong dispela gem em man o meri husat i gat gutpela skoa o namba bilong em i antap moa. Sapos em i holim olgeta piksa em tu i ken win.

I gat narapela pilai tu i stap em ol i save kolim S-konn. Na dispela gem em 5-pela man i ken pilai. Dispela kain gem em ol i save joinim kas. Na sapos yu gat 7-pela kas i join yu bai win. I gat kainkain nem bilong dispela gem. Sampela i save kolim "7-Lip" na sampela i save kolim "Kwin-King."

I gat narapela ol gem bilong pilai laki tu wantaim kas i stap. Wanpela gem ya em "Haia". dispela gem i save kamap long planti ol setelmen long Lae na Goroka na tu long sampela hap bilong kantri.

Long taim bilong kopi sisen o sampela long Hailans i save kolim "Siks-Mun" bai yu lukim planti manmeri i sindaun long kas. Yu save pinis olsem dispela ol lain i kisim mani taim ol i salim kopi bilong olsem na ol i laik pilai kas na winim gem moa mani.

# Man soim pleslain long we bilong karim pikinini



BIPO bipo tru, i bin i gat wanpela

ples i stap na, long dispela ples i bin i gat planti man i stap. Ol dispela taim man i bin lukauttim wanpela liklik boi na nem bilong em Panagah. Dispela boi i no bin i gat papamama, olsem na taim em i stap em i kamap bikpela man.

Em nau long dispela taim, em i bin marit long dispela ples. Long dispela taim, ol man i save katim bel bilong ol meri long taim ol i laik karim pikinini i stap. Taim ol i katim bel bilong ol meri ol i save dai.

Long wanpela taim nau, meri bilong Panagah i laik karim

pikinini, olsem na Panagah i go na sindaun long dua bilong haus. Long taim em i lukluk i go, em i lukim ol man bilong katim bel bilong meri bilong em i kam. Wantu Panagah i singaut, yupela i no ken katim bel bilong meri bilong mi.

Tasol ol man ya i bekim, mipela i mas katim bel bilong meri bilong yu bai olgeta pen bilong em i pinis. Panagah i no laik bekim tok, olsem na em i pasim dua bilong haus na sindaun i stap.

Liklik taim bihain nau, Panagah i singaut long ol man bilong

katim bel na tok, em nau meri i karim pikinini pinis. Bihain em i kam ausait na i tok, yupela i mas mekim olsem. Yupela ol man i mas go long bus na kisim sampela marasin bilong tumbuna, na givim long meri bai em i karim pikinini kwik.

Long dispela taim, ol i stat long bihainim dispela tok Panagah i bin autim long en bipo i kam inap ol waitman i kam bungim yumi.

Na nau yumi i gat haus sik long mama i ken karim pikinini.

Korikunu, NSP.



Nem: Rex Herot

Krismas: 16 (man)

Adres: T.F.I, Omati, PO Box 184, Port Moresby, NCD

Save laikim: Wok, go waswan long nambis, pilai basketball, volibal na lukim TV.

Nem: Junniour James

Krismas: 14 (man)

Adres: T.F.I, Omati, PO Box 184, Port Moresby, NCD

Save laikim: Draivim ka, go lotu na harim lokol musik.

Nem: Issac Kema

Krismas: 18 (man)

Adres: T.F.I, Omati, PO Box 184, Port Moresby, NCD

Save laikim: Raitim pas, pilai basketball na volibal.

Nem: Jeffrey Kears

Krismas: 18 (man)

Adres: T.F.I, Omati, PO Box 184, Port Moresby, NCD

Save laikim: Harim gospel musik na go lotu.

Nem: Nike Nale

Krismas: 17 (man)

Adres: T.F.I, Omati, PO Box 184, Port Moresby, NCD

Save laikim: Go huk, pilai basketball na volleyball.

Nem: James Yayale

Krismas: 17 (man)

Adres: T.F.I, Omati, PO Box 184, Port Moresby, NCD

Save laikim: Harim gospel musik, go lotu na serim tok bilong God wantaim ol lapun.

Nem: James Sepake

Krismas: 17 (man)

Adres: T.F.I, Omati, PO Box 184, Port Moresby, NCD

Save laikim: Harim gospel musik, go lotu, serim tok bilong God wantaim ol pren.

Nem: James Bolotale

Krismas: 19 (man)

Adres: T.F.I, Omati, PO Box 184, Port Moresby, NCD

Save laikim: Pilai soka na waswas.

Nem: James Momako

Krismas: 15 (man)

Adres: Mt Tawa Community School, PO Box 220, Mendi, SHP

Nem: Gemmy Sao

Krismas: 14 (man)

Adres: Mt Tawa Community School, PO Box 220, Mendi, SHP

Save laikim: Pilai volleyball na go long gaden wantaim mama.

Nem: Nason Wolu

Krismas: 16 (man)

Adres: Mt Tawa Community School, PO Box 220, Mendi, SHP

Nem: Mark Yinkin

Krismas: 16 (man)

Adres: C/- Poro Community School, PO Box 25, Aitape District, Sandaun Province

Save laikim: Pilai soka, volleyball, basketball, softball, tokgris wantaim ol poroman na tokpilai.



## Man smok 10-pela yia, na painim hat long stap

Em bai gutpela sapos yu painim wanpela pren husat i gat wankain hevi na tingting olsem yu. Painim wanpela pren husat i save smok tu. Gutpela long painim wanpela wanwok, em yu save lukim olgeta de. Na yupela i ken sapotim yu tupela yet long stap smok.

Sampela pipel painim olsem em i gutpela long noken karim mani raun wantaim ol bikos wantaim mani, ol ken go go insait long stua na baim smok.

Pasin bilong kaikai PK o suga i ken mekim maus i wok oltaim. Sapos man i dring blak kopi o ti, em bai pilim wankain tes bilong smok.

Taim yu laik stap smok traim long mekim wok we yu bai nogat malolo taim. Long dispela we, yu bai no inap malolo na tingting long smok.

Long ol apinun na wiken em ol hat taim stret bilong stap smok. Olsem na lukim sampela pren na pilai spot o mekim esesais. Sapos yu marit yu ken kisim femili na wokabout raun long apinun.

Yu ken baim wanpela spesel samting long mani yu sevim taim yu stap smok. Na yusim dispela samting long amamasim yu yet long ol fri taim, we yu bai lus tingting long smok.

Taim wanpela man o meri laik stap smok, em bai bungim tupela hevi. namba wan hevi em manmeri bai laik kaikai moa na kisim moa hevi (weight). Olsem na noen kaikai planti kaikai olsem bred, rais, kaukau na saksak.

Namba tu hevi em taim yu stap smok, bai yu laik dringim moa bia o ol arapela strongpela dring. Sepik pasin bel bringim moa hevi winim bilong smok. Olsem na tingting gut long dispela na redim tingting bilong yu.

Em bai het taim ol pren husat i smok i stap klostu long ol bung o pati we ol manmeri bai smok. Bikos ol bai kirapim tingting bilong yu long smok.

Wanpela samting yu mas save long stap yu laik stap smok o rausim ol arapela kain pasin em yu no laikim. Long namba 1 em bai isi liklik moa. bihain long wanpela o tupela wok, bai yu pilim olsem em i no het long sap smok.

Olsem na noken wari long ol mekim save yu bai kisim long ol namba wan de.

Sapos yu wanpela Kristen, em i gutpela long yu pre wantaim sapot bilong ol arapela pren.

LAIPLAIN



LAIPLAIN

### Dia Laiplain,

Long 10-pela yia i go pinis, mi save smok planti tru. Mi save smokim tripela paket sigaret long wanpela de tasol.

Mi bin traim long stap smok. Tasol mi painim olsem em i gat tru.

Inap yu tokim long we bilong stapim smok?

### Non-Stap Smoker

#### Dia Pren,

Mipela i save olsem dispela i wanpela bikpela hevi. Na amamas long ol hatwok na interes bilong yu long stap smok.

# KANAGE



Wanpela taim paps Kanage i go long Steamships long Vanimo na em i lukim tupela meri i wok long City Pharmacy. Na em i tok tupela i no meri ya i mas City Pharmacy. Liklik taim tasol na noken lusim long manki sindaun.

### Naki Ano Vanimo

Kanage bilong ples insait long Mendi taun stret. Em i gat wanpela bes badi bilong em wanpela man Buka. Wanpela Fraide, pren bilong Kanage kisimem na tupela baim tupela katen SP na tekov long ples bilong Kanage. Kanage ya yu save, em lukim SP tasol na het bilong em spin na ai bilong em raun pinis. Tupela go insait long haus bilong Kanage na stat mekim save long tupela katen bia. Wan katen 12 peks i pinis na, het bilong Kanage paul na ai bilong em raun na em spak pinis. Nogat lait na haus i dak pinis. Pek pek kilim paps Kanage na isi tasol em krol i go ausait. Em pekkep pinis na painim ples long klinim as. Nogat na em holim trausis long han na kam insait long haus. Insait long haus em pundaun na painim ples long klinim nogat tru. Buka lukim Kanage na em i dai stret long lap na lek bilong em wait nogut tru na em sindaun long kona stap. Paps Kanage lukim olsem wanpela waitpela samting sain long kona so isi tasol em i go sindaun antap long Buka na olgeta pekkep pas long em. Buka guria nogut tru na putim tit antap long Kanage stret. Olgeta spak bilong Kanage pinis na tupela kamap birua for laip.

### Pem Semix 2 Mendi

Paps Kanage bilong Tente viles insait long Mendi. Em marit long Appa Karinj insait long Mendi yet. Wanpela Fraide Kanage go raun long Mendi Buwai maket. Paps sanap long bris arere long maket na putim ai long olpela pren meri bilong em. Pren meri lukim paps Kanage na em kam wantaim: ful smail stret. Kanage kisim filings stret na tromoi tok Inglis bilong em isi tru em iau bilong meri na tok, we meet at the battle field tonight, we kill some sipsip in your room. Meri paul olgeta long Inglis bilong Kanage so em smail tasol na tekov. Paps Kanage ting em wokim wanpela pait Inglis na em gat planti save. Em kisim Junia Kanage na tupela tekov long haus na tokim Misis long kuk hariap. Paps kaikai pinis na isi tasol em tekov

### Pem Semix 2 Mendi

Kanage i bilong Nondgul. Wanpela taim paps wantaim Poro bilong em long nait tupela i go painim ol 4 kopi meri long Wagis bris i go inap nait na tupela i no painim sampela olsem na tupela traim bes long go hek long Nondgul. Long rot tupela i dai tru long hang olsem na paps tokim Poro bilong em long go insait long wanpela gaden na stilim sampela suga. Paps tokim Poro olsem, "bai mi sindaun long rot na yu go kisim sampela suga na mi tupela dring na go." Long taim Poro bilong em i go, Kanage katim long narapela rot na go sindaun pinis long as bilong suga. Poro kamap long gaden na laik katim suga. Na Kanage kirap na mekim save long Poro bilong em na Poro giaman dai i stap. Kanage ronawe pinis long rot na slip i stap. Bihain Poro kamap na Kanage kirap na krosim em na tok, "Longtaim yu go na yu painim wanem stap na yu kam nau?" Poro i no toktok. Bihain Poro tokim

Kanage olsem papa bilong suga i kaikai mi na mi no kam. "Tasol samting tru Kanage i kaikai suga ken bilong eem." Na tu Kanage kilim skin long lap na tupela kamap long haus. Poro hangere na kisim taim stret.

### Kombuk Wine Mt Hagen

Kanage em wanpela mariwana man stret. Mekim i go na em i longlong olgeta. Wanpela taim em i kam raun long Minj maket na tupela marit i pait long maket. Man i ronim meri bilong em i go na meri i raun i go kamap long Kanage. Kanage i given gutwan long dispela meri na meri i hap i dai stret na kaikai buai i stap. Man bilong dispela meri kamap na Kanage tokim man ya na tok, "Yes, brata yu laik paitim em tasol meri i ronawe olsem na mi helpim yu na mi paitim em." Man bilong meri i sori tru long meri bilong em long wanem Kanage i kilim em stret. Man i tingting planti long Kanage tasol i no inap long kotim em. Tupela marit i go pinis long haus na stretim tupela yet.

### Kombuk Wine Mt Hagen

Kanage em bilong ples Wulap long hap bilong Nuku, Sandaun provins. Yu save Kanage em meri pes. Maski em lapun tasol em save laik slip nabaut. Wanpela taim em lukim wanpela meri na man em i daunim spet stret long em. Olgeta taim em bai trai lak long em, maski meri les tasol em bai strongim sait bilong em. Olgeta taim em save mekim olsem na tarangu meri les pinis long em. Wanpela taim nau meri ya i tokim ol brata bilong em na ol i go kirapim pait wantaim ol lain bilong Kanage. Kanage i no man bilong pait. Ol i pait wantaim ol lain bilong em. Mama bilong pait stret na ol i yusim spia na skin pik, wantaim banara. Ol plis i kam na kisim olgeta yet i go kot long Nuku

Plis Stesin. Em nau ol i askim husat i as bilong trabel na ol i tok, "Em Kanage tasol." Em nau ol plis tokim Kanage long stori long pait. Na Kanage statim stori bilong em, "Sori tumas kapul, ol i pait long long bikos ov mi."

### Wanis Nalabi Nuku

Kanage bilong ples Sehan long Trans Gogol, Madang. Wanpela taim ol bikman bilong ples miting long wokim nupela Elementri klasrum. Taim ol i sanapim pinis dispela klasrum ol mamapa-pa go enrolim ol pikinini na ankol Kanage tu enrolim nem bilong em. Taim skul i stat ol sumatin go insait long klasrum, na yu save ankol ya sindaun long fran sit stret. Tisa bilong ol lainim ol long spelim A, B, C, D, E i go na long Z. Na tisa askim ol, "Whats the word start with letter 'E'," Olgeta sumatin i paul tasol ankol Kanage putim han bilong em na bikmaus na tok, "Iwakisu." Taim em tok olsem olgeta sumatin wantaim tisa meri lap nogut tru bikos, em i kolim nem bilong banana long tokples. Tasol tisa meri mekim save long lap yet, kirap nogut ya, tisa wokim traipela kapupuk. Ol sumatin i no harim gut tasol ol i ting tisa tokim ol long stap isi, tasol ankol Kanage save olsem tisa kapupu. Na em tokim em plis, "Plis yu rong ya," Na tisa meri tokim Kanage olsem, "You make me funny and I fekkep win."

### Junia Mesak Madang

Kanage bilong liklik ples Tabale long Lumi long Sandaun provins. Tasol em i go stap long Madang. Em wanpela man bilong pilai snuka stret. Olgeta taim em save sutim bol em bai olgeta taim yusim wanpela hap tok olsem, "Oh Tabale White Sandy Beach." Wanpela apinun em pilai i stap na wanpela nes meri bilong Madang haus sik i kam sanap i stap

na harim em i yusim dispela hap tok bilong em yet. "Oh Tabale White Sandy Beach." Taim nes meri harm dispela hap tok em paul olgeta na lukiuk strong long Kanage. Kanage ai sait tasol long nes meri ya na yusim sem tok taim em i sutim snuka bol. Kanage paul long nes pinis bikos nes ya i bin i gat save long tok ples Tabale long nambis na i no long bus bilong Lumi. Wanpela taim nau nes ya askim Kanage olsem ples bilong yu ya i mas i gat waitpela nesan long nambis ya olsem na yu save tok. "Tabale White Sandy Beach." Nau Kanage tokim em. Em nau yu yet save pinis na sapos yu laik lukim, "Yu yet kam na lukim." Kanage kisim bikpela filings stret bikos long tokpisin bilong em na em kisim nes meri ya.

### Avai Bele Vanimo

Kanage em mangi kolples Goroka. Wanpela taim Kanage na Misis bilong em (Albino) hapkas meri i go waswas long wara. Taim tupela kamap long wara Kanage i go daun long sait bilong ol man long waswas na hapkas meri bilong em i go antap long sait bilong ol meri long waswas. Kanage em i go waswas hariap tasol na i go antap gen long meri bilong em. Taim em i go kamap long hap em lukim hapkas meri bilong em waswas i stap. Man em Kanage singaut i go long en na tok aiyo mi no ting yu ya, "Mi ting tru tru yu wanpela wait meri i kam waswas i stap ya. Hapkas meri bilong Kanage bekim na tok. Kanage em pes taim bilong yu o ai bilong yu giaman yu. Kanage kirap tok sori Misis, laki tru na mi maritim yu klostu ol waitman maritim yu bikos yu wait skin. Sapos yu waitmeri tru tru, mi bai amamas long tok Inglis olgeta taim wantaim yu. Tasol em orait mitupela i ken tok pisin na i stap long wanem skin tasol. Yu save Kanage ya.

### Jay Luana Goroka



## Mt Hagen taun i bagarap

**Dia Edita,**  
Mi wari long taun bilong mi Mt Hagen i luk narakain olgeta. Mt Hagen taun em i namba tri bikpela siti bilong Papua Niugini.

Tasol nau em i no moa siti. Mt Hagen siti i kamap olsem setelmen. Sampela taim mi save ting olsem mi kam sanap o sindaun arere long Wara Komon o Wara Tuman.

Mi i no moa ting olsem mi kam stap long taun. Mi tok olsem bikos sampela longlong lain o ol mani pes save bagarapim Mt Hagen taun. Olgeta gavman opis, ai bilong ol stua, haus kaikai, main soping senta na planti moa save bagarap long strit selas, buai spet, plastik, hap bilong simok save bagarapim Mt Hagen siti.

Mi save lukim ol asples save bagarapim taun. Yupela bagarapim taun bilong yupela yet na husat bai kam, na lukautim taun bilong yupela.

Mi yet bilong Nebilyer KBD na mi karim mani i kam bilong givim sevis long yupela bikos as graun bilong yupela em develop pinis. Mi i no develop yet so mi wok long karim mani i kam na givim sevis long yupela yet na mani i go we?

Yupela karim mani i kam na givim mani o givim sevis long mi Nebilyer? Tru tumas mi tokim yupela pinis, KBD Nebilyer inap long respektem taun na tu lukautim taun bilong mi gut.

Mi komplek planti na toktok planti bikos Mt Hagen siti i bagarap olgeta long strit selas, buai spet, plastik, hap simok na planti moa.

Mt Hagen siti i luk nogut olgeta na kamap olsem setelmen. Mi laikim wanpela Hagen sentrel brata o susa i ken bekim pas bilong mi.

**Tano Wati**  
**Nebilyer, Mt Hagen**

## Telepon blakaut

**Dia Edita,**

Mi laik bringim wanpela wari na konsen, em long telepon blakaut. Mi ting olsem wanpela man o meri tasol em pon blakaut tasol nogat, i luk olsem planti manmeri long Mosbi na ating ol narapela provins tu.

Long las wik tasol Br Leo Scollen i bringim wari bilong em long Hohola Youth Development Centre i kam long niuspepa.

Sampela pon i blakaut klostu 1 o 2 o moa long 6-pela mun olgeta na Telikom i no stretim liklik. Dispela nau i mekim mi long askim dispela askim. Mipela ol client bilong ol pon i baim pon bilong ol telepon i nogat sevis o mipela i baim long telepon we i givim mipela sevis.

Inap ol menesmen i tokim mipela long dispela samting? I go long yupela nau ol Telikom.

**Mangi Sepik**  
**Wewak**

## Westim taim long palamen

**Dia Edita,**

Mi i laik sapatim pas bilong brata, Negil Isa'a i bin kamap long Wantok niuspepa long mun Januari 25, 2001.

Brata yu tok tru olgeta i no gat wanpela han mak bilong George Wan i stap insait long distrik na provins. Mi ting em i no inap long mekim wanpela samting. Bilong wanem distrik em liklik na inap long em bai bringim wanpela developmen i go long ol pipel long ilektoret bilong em tasol em i no mekim wanpela samting.

Ol pipel bilong Usino Bundi i mas harim gut, mi wanpela man bilong ples yet insait long Usino Bundi ilektoret mi putim dispela tok long niuspepa. Yupela ol manmeri lukluk gut na makim nupela man long 2002 nesenele ileksen.

Nau dispela ileksen bai yumi makim wanpela man long ples yet bai i go long palamen na lukluk long hevi na wari bilong yumi.

Olgeta memba insait long palamen ol i save bringim developmen i go long distrik bilong ol tasol memba bilong yumi, i no mekim wanpela wok yet.

**Wanamo Mavu**  
**Usino, Bundi**

## Sapotim toktok bilong kopi prais

**Dia Edita,**

Mi i ken sapatim pas bilong brata ya John Topo M bilong Banz distrik i kamap long Wantok Niuspepa long Februari 22, 2001.

John Topo i bin askim gavman long sapatim kopi prais. John Topo olsem toktok bilong yu long kopi prais em i tru na tru olgeta. Mi save kisim strong long mani i kam long kopi.

Kopi em bun tru bilong mipela ol Hailans. Mi save prunim kopi diwai na kilim gras na hatwok tru. Tasol taim kopi prais i go daun mi save les tru long lukautim kopi diwai.

Sampela mipela i gat meri na pikinini mipela save pasim bel na isi isi mipela save lukautim kopi i stap long ples. Tasol sampela ol man we man o singel man i bel hat long kopi prais na ol i givap long kopi

diwai bilong ol na bus karamapim ol pinis.

Ol ronawe i kam long taun na hevi bilong lo na oda i go bikpela. So mi givim ful sapat long pas bilong John Topo na askim gavman long sapatim kopi prais i go antap.

Sapos gavman i apim kopi prais bai ol yangpela i lusim taun na i go bek long ples na stat long kilim gras long kopi gaden bilong ol. Hevi bilong lo na oda i go bikpela bikos gavman i pasim ai long sampela rot.

Gavman mas kirap na opim ai na kikim as bilong kopi na kopra prais. Na moat yet mas givim mani long ol yut long strongim projek bilong ol. Dispela em ol rot tru bilong daunim hevi bilong lo na oda.

Prais bilong kopi na kopra i go daun tru na ol prais bilong kaikai long stua i go antap tru. Em wanem kain pasin tru.

Prais bilong kopi na, kopra na stua mas wankain long olgeta manmeri.

Maski long givim sevis long sampela na daunim sampela. Em wanpela sem pasin ya.

Gavman em namel man so em mas lukluk long tupela wantaim. Nau kopi sisen i kam klostu so mi askim gavman long kikim as bilong kopi prais plis.

Sapos gavman i no harim singaut bilong mipela long kopi prais, ating ol marit man bai i no mao tingim kopi diwai. Ol bai bihainim lek mak bilong ol yangpela ol singel man na kam long taun na painim mani.

Hevi bilong lo na oda bai i go bikpela. Em tasol na mi askim ol Hailans long givim ful sapat long kopi prais.

**Tano Wati**  
**Nebilyer, Mt Hagen**

## NGTUC i noken putim hevi bilong NPF antap long PDM?

**Dia Edita,**

Plis givim mi hap spes long Wantok niuspepa na mi i ken autim bel hevi long publik i lukim. Mi yet bilong Nebilyer ausait tasol long Mt Hagen taun WHP.

Mi bel hevi tru long wanpela nius long Wantok niuspepa we bikman bilong Papua Niugini Tred Yunien Kongres Jenerol Seketeri John Paska i bin mekim.

Husat i putim het tok long nius pepa olsem PDM mas lukaut long 2002 Nesenele ileksen. Na John Paska i tok moa moa PDM mas stretim ol hevi bilong NPF. Praivetaisesen, Minimam Weges na hevi boda.

Sapos nogat bikman ya kirap na tok PDM i mas lus tingting long sanapim ol kendidet long 2002 Nesenele ileksen.

Bikman na Jenerol Seketeri bilong PNGTUC John Paska mi olsem man nating i nogat save liklik na stap insait long bikbus Nebilyer ausait long Mt Hagen taun WHP. Mi i gat bikpela kros long yu taim yu putim ol giaman pas long publik media, yu i gat wanem kain tingting long PDM na yu putim moa hevi i go antap long PDM? PDM wokim wanem asua? Wai na yu bagarapim PDM long publik media? I tru NPF hevi.

PDM i kamapim taim PDM i stap long

opis long mun Julai 1999? Noken wokim wan sait politiks na daunim PDM? Olsem man long ples nogat save mi laik tok ken olsem no ken wokim ol giaman nius ripot long publik media? Noken putim NPF hevi bilong olpela gavman antap long nupela gavman we Prais Minista Sir Mekere Morauta i go pas long em?

NPF hevi i stap pinis long olpela Gavman wantaim olpela siaman Jimmy Maladina we PDM Pati bilong Prais Minista Sir Mekere Morauta i no save gut long em.

Na nau Prais Minista Sir Mekere Morauta i kamapim Praivetaisesen bikos em laik daunim hevi bilong NPF na tu bekim ol dinaw we gavman bilong bipo i kamapim.

Sir Mekere wokim gutpela pasin na givim pinis K60,000.00 long hevi bilong NPF. Mi rabisim nius bilong yu John Paska long tupela NPF hevi na Praivetaisesen bikos asua i stap long olpela gavman we i gat bikpela dinaw. Bai yumi kisim mani we na bekim dispela traipela dinaw na tu stretim NPF hevi.

Em Praivetaisesen tasol ya PDM kamapim na painim rot long bekim dinaw ya. Plis noken wokim ol giaman nius na bagarapim gutpela plen na rot na PDM i laik serim laip bilong Papua Niugini we

bipo i go long maus bilong ol wel dok? na tu i noken bagarapim o blokim rot bilong ol gutpela kendidet husat laik sanap long 2002 Nesenele ileksen long tiket bilong PDM Pati? Mi kros tru na belhat tru taim mi lukim dispela nius bilong bikman ya bilong Papua Niugini Tred Yunien Kongres Jenerol Seketeri John Paska. Mi rabisim ol giaman nius ya bikos sampela hevi i no PDM i kamapim.

Na het tok long pas bilong em i mekim mi wari na mi rait i kam long Wantok niuspepa. het tok bilong bikman ya is anap olsem. PDM mas lukaut long 2002 Nesenele ileksen noken dabolim olpela na nupela hevi antap long PDM Pati? Plis yumi olgeta manmeri mas save olsem media em bilong publik ken ritim olsem na yumi mas askim tingting bilong yumi pas-taim na bihain yumi raitim nius o ripot i kam long Wantok Niuspepa. Noken mekim nating nating na bagarapim sampela nating. Save i stap long yu. Tenkyu tru long ritim pas. Bekim o sapat em laik tasol. Mi welkam yupela long sindaun na bai mi amamas tasol long ritim pas bilong yupela ol brata na susa.

**Tano Wati**  
**Mt Hagen**

# Painim wok stret ya!

**Dia Edita,**

Wari o bel hevi bilong mi i go olsem.

Mi wanpela yangpela man bilong lower Nebilyer ausait tasol long Mt Hagen taun WHP. Mi laik autim komplek bilong mi long Kalakai maket.

Komplek bilong mi i sut long ol sampela mani pes i wok long bagarapim K5 pepa mani. Dispela em narapela kain pasin we mi i no save lukim long ai bilong mi long laip bilong mi.

Sapos yu wanpela nupela man yu go long Kalakai maket bai yu kirap nogut long lukim ol man bai putim K5 pepa mani antap long dat bot. Husat man baim 20t long wanpela spia na tromoi

long dat bot na spia i go insait long waia bai yu winim dispela K5 pepa mani.

Wankain yumi save tromoi spia long kisim wanpela botol coke o pepsi. Ol man ya save subim K5 pepa mani anjnit logn waia na sapos yu tromoi spia, bai spia i go na sutim dispela K5 pepa mani olgeta taim. Maski spia i go insait o abrus em bai i bagarapim pepa mani yet. Ol save putim 6-pela long K5 pepa mani antap long dat bot em olsem K30 long K5 pepa mani i stap antap pinis.

Sapos 20 o 30 dat bot em bai K100 o K150 olgeta long K5 pepa mani save bagarap. Bipo ol i wokim long K2 pepa mani na mi rait i kam long Wantok niuspepa. Na

nau mi rait gen bikos ol i bagarapim K5 pepa mani bilong yumi PNG manmeri stret. Sapos yumi i no egensim o wokim wanpela eksen long ol, ating ol man ya bai wokim wankain pasin long K10 pepa mani na K20 pepa mani bai i bagarapim olgeta.

Dispela pasin ol i wokim em mi i no klia gut na nau mi rait i kam long Wantok Niuspepa long kisim tingting bilong ol brata na susa. Mi laik askim ol man ya olsem. Yupela i gat 10t, 20t, 50t, K1, K2, K5, K10, K20 na K50 olgeta yupela i gat pinis long poket bilong yupela. Na nau yupela painim wanem kain pepa mani gen?

Yupela painim gol na silva? Orait pekup olgeta

na go long Pogera na kamautim gol long hap na stap long hap. Kalakai maket em ples bilong salim kaikai. Yupela wokim samting olsem man i nogat tingting? Yupela mas sem bikos em pasin bilong sem ya.

Yupela i gat olgeta kain mani na yupela bagarapim gen pepa mani? Yupela hatwok long painim wanem kain mani gen? Plis lusim dispela rabis pasin na painim narapela we o gutpela rot long wokim mani na ol manmeri i ken amamas. Dispela em pasin man i nogat gutpela tingting na tu em pasin bilong ol liklik pikinini i nogat tingting.

**Tano Wati**  
**Mt Hagen**

Toksawe i go long ol manmeri husat i save salim pas i kam long Wantok Niuspepa. Sapos yu no putim nem tru bilong yu long pas, bai mipela i no inap prinim pas bilong yu.

## Song i sut stret long laipstail

**Dia Edita,**

Mi laik bringim wanpela konsen long dispela pepa. Mi bin ritim long Post Courier wanpela meri Sepik i bin raitim na toktok long singsing bilong Lista Serum em 50 tausen.

Em i tok singsing ya i no gutpela, na em i diskrimenetim ol meri.

Em i tru long sampela hap.

Ating dispela singsing tu i kamapim astingting bilong sampela we na pasin tu long dispela graun sapos meri Sepik i lukluk gut long dispela. Mi lukim olsem planti pasin olsem i kamap pinis long hap bilong yumi long PNG.

Planti yangpela meri long PNG i mekim pasin olsem, marit long ol bisnis man long 50 tausen na moa, na man nating, moa yet ol yut 25-30 yia i no inap long gat

inap mani long baim dispela, so dispela singsing em i soim em kain laipstail olsem bai i kamap.

Dispela singsing tu i mekim mi askim dispela askim. Olsem wanem ol meri bilong yumi long PNG em olsem ol samting bilong salim na kisim mani, olsem balus, sip na ka.

Em i mas olsem wanpela bisnis bilong ol meri bilong PNG na em olsem wanpela kain wok bilong ol meri bilong nau na bihain.

Mi sapat long ol husat man bilong yumi long kamap planti moa kain singsing olsem. Kamapim tu sampela singsing bilong dring na HIV/AIDS awenes tu bai moa rait olgeta.

**Mangi Sepik**  
**Wewak**

# Lida tru bilong Sandaun Salensim Napo Nogat senis long Biami

**Dia Edita,**

Mi wanpela bilong ol lain Aitape husat i kam bilong witesim dispela protes mas bilong rausim Mista Maran Nataleo.

Mi laik tok tenkyu tru i go long ol lida we i stap insait long dispela protes nem bilong ol em; Eko Mason, Mayor Mathew Sangu, David Wambo, Mathew Tuwai, Felix Ramram, Pius Maiyo, Willie Watai, Jalman Nataleo na ol narapela husat i tek pat tu.

Yes John Williebet tu i stap long mas ya.

Narapela samting ol lida ya taim ol i wokim protes mas long Sarere 13 Januari 2001 maus bilong dispela ol lida i op bikpela tru we ol lain bilong boda Telefomin, Nuku, Aitape na Lumi i harim. Tasol long Trinde 17 bilong mun Januari 2001 dispela trupela lida bilong mipela long Sandaun na memba bilong Nuku Andrew Kumbakor i sanap fran long provinsel gavman opis na taim em i toktok wanem samting em i tok em i tru na pipel bilong Sandaun i harim na ol i tok mipela i westim taim long dispela protes mas.

Yes, maus bilong Eko Mason i pas na em i nogat askim bilong tromoi i go long dispela trupela lida bilong Sandaun na memba bilong Nuku Mista Andrew Kumbakor.

Mathew Sangu, David Wambo, Felix Ramram, Pius Maiyo na Willie Watai bilong wanem yupela i no laik askim Mista Kumbakor long Trinde moning 17 Januari. Mi lukim na harim olsem wanem toktok dispela trupela Sandaun lida na memba bilong Nuku Mista Kumbakor i toktok i katim tru dispela ol askim yupela i laik askim em.

Mathew Sangu (mayor) na David Wambo tu, Eko Mason, Felix

Ramram taim minista i toktok het bilong yupela ya i go daun na yupela i no lukluk long mipela ol pipel na yupela i no hait tu long minista long toktok em i mekim. Taim minista Kumbakor i pinisim ol tok na i go yu lukim ol i go na wok long toktok long ol liklik grup we sapos ol i man tru ol i ken askim Mista Kumbakor. Tasol mi lukim olsem dispela ol man ya olsem ol meri eksen bilong yupela i wankain tru olsem ol meri save mekim.

Pius Maiyo, Mista Kumbakor i sanap toktok i stap bilong wanem na yu i no laik opim maus bilong yu taim Mista Kumbakor i sanap na wok long toktok. Pius Maiyo yu tokim Mista Kumbakor long lus tingting na stretim ol rot long Nuku pastaim bipo em i ken tingting long Mai Tadjai haiwe.

Okei, Mista Pius Maiyo developmen long Nuku i ken kamap tasol, i gat politiks insait long dispela edministrasion bilong Sandaun provins olsem na yu tokim Mista Kumbakor we em i no harim na yu opim maus.

Mista Andrew Kumbakor em i trupela na klinpela lida bilong mipela ol Sandaun na memba bilong Nuku. Yu husat laik putim ap kendidet egensim Mista Kumbakor mi sori olsem Mista Kumbakor bai win yet.

Ol pipel bilong Nuku sevis i go long ples ya Sandaun edministresen i blokim nau i gat nupela edministrata sevis bai i go bikos memba bilong yupela Mista Kumbakor em man tru bilong bringim sevis.

Na Sandaun provins i luksave pinis long dispela man Mista Andrew Kumbakor.

Trupela Sandaun lida aut long dispela narapela foa yia.

**Jimmy Demo Pami Vanimo, Sandaun Provins**

**Dia Edita,**

Mi wanpela hetman long Buang na mi stap long Bulolo. Mi laik tok salens i go long Memba Napo olsem wanem taim bai em tok tru na bihainim tok promis long helpim ol grasrut.

Memba Napo i no inap win long 2002 ileksen sapos ol Lagis tasol givim sapos, na olgeta Buang no givim em.

Em i promis long Mumeng hai skul, F28 balus pundaun long Bulolo, stretim han rot na planti moa.

Em stap 10 yia pinis. Plis inap bai askim Dokta Simba long senisim tingting na salensim em long Bulolo, bikos mipela planti bai sapatim Simba long autim tiket bilong Napo.

**Hetman Bulolo**

Salim pas i kam long:  
The Editor  
Wantok Niuspepa  
P.O. Box 1982,  
Boroko, NCD.

**Dia Edita,**

Mi laik autim wari bilong mi i go long ol nupela kendidet husat i laik resis long yia 2002 ileksen.

Sapos yu laik kempen plis yu noken i go long Biami eria long mak bilong Nomad Riva na strikkan Riva.

Husat man o meri yu bilong Biami plis yu noken karim wanpela vot bilong yu i go givim narapela man. Yu mas painim wanpela bilong yumi yet long Biami na vot long sait long Open.

Ol man o meri long Biami no ken painim ol save-man tasol. Ol i no save lukluk o givim sevis long yumi bus lain.

Long rijinel yumi stap long maket. Long 1975 i kam long 2001 i nogat wanpela han mak o developmen i kam long memba insait long Biami eria.

Mipela save votim ol memba tasol, ol save givim baksait long mipela. Mipela save stap tasol na kaikai gaden kaikai tasol na luk olsem mipela bai stap olsem tasol na go na graun bai pinis.

**Gogolo Musu Klunga, Westen Provins**

## Pimaga stesen nidim developmen

**Dia Edita,**

Mi wanpela gras rut bilong asples Pimaga long Kutubu. Mi no save lukim wanpela gavman fan bilong Pimaga stesen. Dispela mani o sevis save i go we?

Mipela i no save lukim fan o mani bilong KDA na sahpela kain mani we olsem infrastraksa na SSG grent bilong Pimaga stesen ol dispela fans save i go we em save i go insati long hol bilong stone o maus bilong sampela man o maus bilong wanpela man. Pimaga stesen i no misin stesen em i gavman stesen so

mi grasrut mi no save we dispela mani go long en.

Bipo bipo yet Pimaga stesen i bin bus karamapim i stap na nau i go wes. Na nau elefen gras kamap pinis long stesen na estrip olsem na ol manmeri bilong asples i no wanbel tumas long dispela.

Stesen i bus karamap long gen na mipela i no save lukim memba bilong Nipa, Kutubu. Bilong wanem memba bilong mipela Mista Philemon Embel em i no tingim ol pipel bilong Kutubu.

Traipela 20 yia i stap

memba o gavman mipela i no lukim sain bilong em yet. Olsem na mipela ting olsem em memba bilong Nipa tasol i no memba bilong Kutubu.

Developmen bilong gavman mipela i no kism yet i kam inap nau bai klostu ileksen i laik kamap. Olsem wanem nau? Mipela i no lukim mani o fans bilong Kutubu Developmen Atoritii dispela mani bilong KDA.

Tu sampela mausman bilong Kutubu yet pilaim politiks long mani bilong ol asples manmeri bilong Kutubu. Mipela save olsem

sampela biksots i misyusim dispela mani olsem na manesmen bilong ol bagarap. Kutubu Developmen Atoritii i no bilong Mendi taun. Opis bilong KDA i mas tap long Pimaga stesen. Het opis i stap long asples na ol i ken givim sevis i go long ol asples. Mipela ol grasrut na asples yet i no laik ol outsait man i kam mekim wok bilong manesmen.

I no longtaim bai dispela gavman i senis.

**Daga wan Pimaga Sauten Hailans**

## Sios i bruk tuhap

**Dia Edita,**

Mi wanpela kristen memba long Lutheran Sios insait long Mt Hagen. Mi lukim olsem Lutheran Sios em wanpela kristen sios we em bihainim wanpela bilip doctrine olsem ol arapela sios insait long kantri.

Tasol insait long Hagen i gat wanpela nem Lutheran na tupela grup i stap. Ol man i save tok Hagen na Melpa tasol dispela tupela nem i no bihainim narapela narapela bilip pasin bilong lotu, nogat tru, wanpela bilip tasol.

Tasol bilong wanem na ol man i bihainaim dispela rot? Mi gat bikpela tok long dispela pasin we baibel i tok nogat long en, mipela Hagen i kirapim gen. Kamapim birua na pasin bruk.

Taim Jisas i kamapim sios long dispela graun em no tokim ol disaipel o wanpela arapela man long kamapim dispela pasin olsem, nogat tru. Em i tok yupela olgeta i mas i stap wantaim gutpela bel wantaim amamas.

Pasin bilong brukim lain na kamapim birua em i noken i stap insait long sios bilong mi. Tasol mi gat bikpela wari stret long dispela pasin yumi ol Hagen i kamapim nau.

Ating dispela pasin bilong brukim sios em bilong Kraist em i pasin bilong Kraist a? Nogat tru. Mipela ol Hagen i bihainim rong rot na i luk olsem pasin bilong lukautim sipsip insait long kristen sios mipela i no bihainim stret.

Ol man i save tok olsem mi lain bilong Hagen (ZAU) na arapela ol i tok mi bilong Sanage). Husat bilong dispela tupela man i dai long diwai kros bilong kamapim dispela sois Lutheran, ating i nogat wanpela man. Tasol bilong wanem yumi ol Hagen i holim dispela pasin yet na sar i go daun.

Ol kristen manmeri insait long Lutheran Sios long Hagen na Melpa wantaim yupela i mas harim na save olsem. Jisas i tok long pasin bilong laikim ol brata, wankot, birua, na i stap wantaim amamas insait long sios bilong God.

Wanbel wantaim na karim diwai kros bilong Kraist, wokabaut wantaim long wanpela rot i go long Papa God. Yes ol kristen brata, susa na papamama yumi olgeta i mas lukaut long dispela wokabaut yumi mekim bilong i go long Papa God.

Nogat pasir. bilong birua i stap namel long yumi na yumi bai popaia long dispela rot i go long God.

**Concern Christian Lutheran Church College, Banz**

## Gedix Atege mas i go bek long Tumbuna Trek Studio

**Dia Edita,**

Mi laik serim liklik tingting bilong mi long Singa ya! em Gedix Atege; Plis inap yu i go bek na rekodim ol singsing yu rekodim long Rising Star Studio, inap yu go bek na rekodim ken long Tumbuna Trek Studio, mi wanpela mangi Okapa long Goroka harim ol singsing bilong yu i gutpela na mingiful singsing tasol.

Sapos yu rekodim long Tumbuna Trek studio em bai rait olgeta. Mi no kros long yu tasol ol planti man tok olsem yu bagarapim ol gutpela singsing long Rising Star Studio.

Bara yu traim harim tok bilong mi na go

rekod long Tumbuna Trek. Mi no bilong Madang, mi bilong narapela hap mi harim na skelim singsing em orait tasol.

Ol musik i no kamap gut. Em olsem na mi autim liklik wari bilong mi i go long pablik.

Sapos yu poroman bilong Gedix laikim traim toksave long em o soim dispela pepa long em.

Yu husat laik sapatim o egensim mi welkam long Wantok niuspepa.

**Belden Kisave Goroka, EHP.**

## Simbu Salt Kilau Kaunsil i bagarap

**Dia Edita,**

Komplen bilong mi go olsem mi wanpela viles mangi tasol lukluk bilong mi long kaunsil presiden bilong Kilau Salt Kaunsil wok bilong em long stilim mani bilong distrik wantaim kuskus bilong em.

Gavman baset tu i kam long distrik. Dispela kaunsil presiden em i no mekim wanpela wok liklik. Dispela kaunsil presiden kism mani bungim olgeta paia rais meri na haiarim ka na go long Goroka na i go olsem long Madang na i kam long Lae siti.

Plis dispela presiden wanpela gutpela lida tasol em save bungim mani givim long olgeta paia rais meri na haiarim ka bilong ol. Mi wanpela lida bilong Vii Aii Bana Kere haus lain. Nem bilong mi em Habi Baninol.

Mi laik autim dispela wari bilong em bikos em presiden bilong mi. Sampela hap long Simbu kaunsil presiden em wok orait tasol long Kilau distrik plis em bagarap olgeta. Plis presiden yu mas senisim pasim bilong yu dispela taim.

Yu no presiden bilong Goroka o Lae nogat yu bilong Kilau distrik. Dispela kaunsil em i no bilong paia rais pipel. Mipela makim yu long mekim wok. Yu smat long mekim wok tasol.

**Habi Baninol Kundiawa**

## Traim nupela man long palamen

**Dia Edita,**

Mi laik sapatim brata Tano Wati long Mt Hagen olsem, ikononomik bilong kantri i pundaun olgeta.

Long stretim dispela yu na mi i no ken westim taim moa long autim bel hevi bilong mitupela long niuspepa.

Bikos 2002 nesenel ileksen i kam klostu pinis, yumi mfas traim long rausim olgeta 109 bikman long haus palamen na traim nupela man.

**Giongga Wongi Lae**

## Karim kago isi isi

**Dia Edita,**

Mi wanpela man husat i save ritim dispela niuspepa olgeta taim. Nau mi raitim dispela pas long telimautim liklik bel sori bilong mi. Mi laik tokaut tasol long wanpela pasin o toktok, honourable Memba bilong Finschhafen i bin mekim.

Pigi (son) yu bin tok o kolim ol nenogoc (mama) bilong yu donkey, na yu bin tok bai yu rausim dispela hevi long ol na larim ol i go fri o bai ol i kism gutpela sindaun. Mi sori tru. Dispela hevi i stap yet na i kam 2002 ileksen taim nau.

Mipela i no holim asua bilong yu i stap, tasol yu mas save Jisas Kraus wanpela tasol inap pinisim hevi na givim yumi malolo.

Tumbuna bilong mi i bin kirap long Finschhafen kalap long sip na kamap long Lae. Orait, em i wokabaut long lek kirap long Lae, na inap em i kamap long las ples we Lutheran Sios i sanap long em long Hailans long bringim gutnius bilong Kraus Jisas.

Olsem na mi amamas long dispela na bai mi stap isi tasol olsem na karim kago bilong mi long baksait bilong mi na wokabaut isi isi tasol i go i kam olsem na lotuim God bilong mi i stap.

Nogat yu hariampim mi na bai mi pundaun na kism bagarap.

**Gembung Circuit Youth Seketeri**






• Ol Oro danis grup i putim stail bilas wantaim tapa klos na givim i stap. Long raithan: Ol Baha'i Sios yut i bung long stap insait long selebresen bilong amasim sios nu yia bilong ol.



• Gavana bilong Westen Hallens Fr Robert Lak na Minista bilong Edukesen Prof John Waiko go raun long ol Hagen Park hai skul.




• Sampela lain husat i bin stap insait long ista lotu long Bomana SVD Kolis. Aninit: Ol bod memba bilong Montfort Komyniti skul long Daru i amamas long kisim helpim long Gavman bilong Japan.



**NOW AVAILABLE IN 1 LITRE**

Enjoy **new** **new** **new** **new**

**Share the Fun** **Fanta**



PNG

# BUSINESS

New micro-finance scheme planned for Bougainville

page 5

Comment on proposed free trade zone

Page 15

Foreigners sponsor PNG at Italy diveshow

- page 23

## BCL plans to get rid of mine assets

by ROSALYN ALBANIEL

BOUGAINVILLE Copper Limited (BCL) is looking to get rid of its assets on Bougainville worth approximately K200 million.

These assets include buildings, plant, machinery and equipment which, since the withdrawal of company personnel, have either deteriorated, been damaged or pilfered.

BCL's Chairman, Barry Cusack, in his report carried in BCL's Annual Report-2000 said it would not be a simple matter for the company to dispose of its assets on the island.

He reported that last year the Board had stated that it was unlikely that operations at Panguna could be resumed in the short to medium term.

Mr Cusack said coupled with dialogue held with the government on the matter, added that he would move at the annual general meeting (AGM), scheduled for the end of April, that the Board be authorised to dispose off the Bougainville assets on such terms as it saw fit.

The chairman told PNG Business newspaper that a slow approach, but one consistent with ongoing peace efforts had been taken as it didn't wish to interfere.

However, he added that BCL was confident that these efforts had advanced sufficiently, hence the decision.

Mr Cusack said he expected that shareholders would be disappointed.

"...The shareholders will naturally be disappointed.

"But the reality is it will not open in the short term. We have waited almost 12 years, we must now address this issue," he said.

In other develop-

ments, Mr Cusack reported that BCL had taken advice from a number of experts on both liquidating the company and making investments in interest bearing deposits.

"The board has decided to recommend to its members that it be authorised to seek alternative investment opportunities such as investment in equities including companies with projects in PNG.

"The aim is to grow the value of the company rather than maximise available cash.

"This new strategy is not contingent on BCL disposing of its Bougainville assets, however having made a decision to do so, it no longer has the requirement to preserve cash to allow it to undertake a mine restart feasibility study," Mr Cusack said.

He added that the timing also coincided with a period of falling interest rates in PNG.

"Investment in listed companies particularly those selling commodities in US dollars, is a hedge against any further decline in the value of the Kina," he said.

BCL's managing director, Peter Taylor, in his remarks reported that BCL's main source of income remained on cash investments in PNG.

Mr Taylor said interest rates remained high for most of the year despite the Kina remaining relatively stable and a generally better economic outlook under the current government initiative.

"Interest rates are falling considerably and can be expected to stay at much lower levels this year if current fiscal policy is maintained," Mr Taylor said.

With regards to the moves to dispose BCL's assets and diversify its investment portfolio, the managing director said:

"This is likely to have the effect in the short to medium term of reducing cash flow in favour of capital growth.

"Considerable work has already been undertaken investigating potential new investments," he said.

He further commented that should the AGM adopt all recommendations put before it, the coming year should see a considerable increase in activity as the company moves to activate its new strategy.

"...the provisions for landowner compensation and contingencies is being maintained.

"A move into a portfolio of shares will see the company begin to follow a strategy of growth outside Bougainville," he said.

## Chinese visit to enhance trade relations

A CHINESE business delegation will be in the country on April 19-22.

Their trip to Papua New Guinea comes as an initiative of the PNG/China Business Council.

The delegation will be led by the Vice Chairwoman of the China Council for the Promotion of International Trade (CCPIT) and the China Chamber of International Commerce, Zhon Min.

While in the country it is anticipated that the delegation will meet with various organisations and representatives in both the government and private sector.

These include the Port Moresby Stock Exchange (POMSoX), Commercial Bankers Association (CBA), fisheries, Investment Promotion Authority (IPA) and the shipping industry.

CCPIT and PNG/China Business Council have over the years enjoyed very good relations and operates under and pursuant to a Memorandum Of Understanding (MOU) executed in Beijing and in Port Moresby in 1998.

Mipela salim nau!

## Junia atletik winim tupela gol medal

### ATLETIK RIPOT

JUNIA atletik tim bilong Papua Niugini i kambek long kantri wantaim tupela gol medal long 100 mita resis long pinis bilong Melanesian Kap resis long Fiji.

Dispela tupela gol ya i kamap long 100 mita resis bilong man we Joseph Kembu i winim na long meri em Mae Koime i winim.

Ol silva medal i kam long Simon Benari long javelin, tripel jamp na 4x100 mita relay resis. Ol bronze medal em Nessie Ogisi (100m) na Henry

Ben (200m).

Skwat bilong PNG i gat 5-pela rana man na tripela rana meri i pinis namba tu long Fiji.

Tim menesa Sophie Marai i tokaut olsem dispela win bilong ol junia pilaia i mekim guria stret ol pilaia. Bikos ol i no ting olsem ol bai winim medal ya.

"Dispela em developmen skwat tasol ol i resis wantaim ol arapela sinia pilaia bilong arapela kantri.


"Ol i pilai gut na mi amamas tru long gutpela pilai na ran ol i mekim long Fiji.

"Mipela i redi long dispela gem

longpela taim tru long Januari. Dispela i no gutpela tim tumas tasol mipela redi long dispela Melanesian Kap resis."

Dispela em i namba tu bikpela resis ol i stap long em. Namba wan em Osenia sempionsip long Adelaide, Australia, las yia.

Misis Marai i tokaut olsem nau dispela tim bai redi long Osenia sempionsip long June na mini Saut Pasifik Gems long Norfolk Ailan. Ol arapela kantri i stap long dispela sempionsip em Norfolk Ailan, Solomon na Vanuatu.



• Tania Lesa husat igat 8-pela krismas em i wanpela bilong ol swima husat i bin kamap tu long swim insait long nesenel sempionsips long Pot Mosbi las wiken.

## Mosa Trensport na Bebere i sempion bilong NBPOL

### SOKA RIPOT

MOSA Trensport na Mosa Oil Mil i kamap olsem nupela pri-sisen soka king na kwin bilong Nu Briten Palm Oil Limited Soka Asosiesen long dispela sisen.

Ol boi long Trensport i bagarapim tru sindaun bilong ol lain Bebere Plentesin Soka tim wantaim 4-pela gol olgeta. Dispela gol i kamap long penalti taim tupela tim wantaim i no gat skorim gol long taim bilong pilai.

Na long gem bilong ol meri, ol susa long Mosa Oil Mil i putim planti wel stret olsem na ol i no pilai gut na ol meri Bebere i rausim sket bilong ol.

Mosa em wanpela sempion tim we i winim taitel bilong NBPOL tripela taim pinis na tu i makim asosiesen long 2000 nesenel klab sempionsip i kamap long Lae.

Ol meri long Bebere Plentesin i no wari. Wantaim gutpela kosa olsem Francis Namongo husat i wanpela biknem aussie rul pilaia i helpim ol meri long plentesin i skulim ol meri Oil Mil long soka.

Bebere husat i fom insait long las tu yia i kisim planti ol gutpela pilaia long opisen na dispela i kirapim tru skin bilong ol long winim taitel bilong dispela yia.

Sapos Bebere i wokim yet dispela kain pilai, ating ol bai lukluk yet long winim tai-

tel bilong NBPOL.

Mosa Oil Mil i traim olgeta strong long winim dispela gem tasol sori tumas, ol meri Bebere i tokaut olsem ol i mas wet pastaim na inap neks yia.

Ol lain susa i tromoi gut lek long fainel em Mary Louise, Cecilia Beno, Maios Beno na long sait bilong Mosa Oil Mil em Theresa Palingis, Nellie Ambi na Bernadette Saina.

Presiden bilong NBPOL John Raka i tokim Wantok olsem asosiesen bai malolo inap wanpela wik long larim ol wokman i stretim na makim soka fil bilong sisen propa.

Ol arapela ples pilai we NBPOL bai yusim em Dami OPRS fil na Kumbango Oil Mil Plentesin fil.

Raka i tokaut olsem olgeta gem bai kamap long asples na tu ol bai go pilai long narapela ples. Ol i laik yusim gut fil long strongim na tu developim soka insait long olgeta ogenaisesen bilong NBPOL na long ol skul.

Long strongim dispela toktok, skul gem namel long Gret 7 na Gret 8 bilong Mosa Praimeri Skul i opim gren fainel wantaim gutpela kik resis bilong ol.

Wanpela bikpela program nau NBPOL Soka Asosiesen i laik kamapim skul soka insait long NBPOL eria. Planti ol skul mangi em ol pikinini bilong ol wokman bilong NBPOL.

## Papua Dart bai holim eksekutyutiv miting

### DATS RIPOT

PAPUA Rijon Dats Federesen (PRDF) bai holim eksekutyutiv miting bilong em long Jun 2 long Alotau, Milen Be provins.

Sekretari Jenerel Mojeh Selsel i tokaut long dispela olsem miting ya em wanpela bikpela miting na em i askim olgeta eksekutyutiv mamba long kamap long dispela.

Dispela miting em long stretim wok redi bilong bikpela bi-annual dats sempionsip we bai kamap long Septemba long Alotau. Sempionsip ya bai stat long

Septemba 12 na pinis long Septemba 17.

Em i askim ol eksekutyutiv mamba long salim wanem ol agenda long em sapos ol i laik toktok long en. Wanem ol toktok ol i laik kamap i mas kamap long em long pinis bilong mun Epril.

Sampela ol agenda i redi pinis em:

- i) Konstitusen
- ii) Tonamen baset
- iii) Sekretarial sevis
- iv) Printing Sevis
- v) Bi-Anuel Ripot
- vi) Sponsasip
- vii) Haus slip na Trensport - Eksekutyutiv

viii) Opening na Closing seremoni

- ix) Prais na Awots
- x) Minit bilong las miting
- xi) Neks tonamen
- xii) Fi bilong 1999 tonamen

Sekretari Selsel i tokaut olsem wanem ol asosiesen o klab insait long Papua Rijon i laik stap i mas givim nem kwik.

Ol fi bilong dispela tonamen bai sanap olsem; afiliesen em K250, tim rejistresen em K100 na wanwan pilaia rejistresen em K30.

Nau yet Pot Mosbi, NCD, Popondeta, Cameron,

Musa, Kokoda, Alotau, Misima, Kiunga, Daudau (POM) na Veifa i givim nem pinis long stap insait long 2001 Bi-Anuel tonamen.

Selsel i tokaut olsem ol i mas salim mani long dispela akaun namba ya bilong PNGBC long Alotau 317-006117019. Olgeta mani ol i mas baim long pinis bilong Julai.

Sekretari i bilip olsem samting olsem 27 man tim na 12-pela meri tim bai kamap long dispela Papua Rijon Dats sempionsip long Septemba long dispela yia.

## Patron Kap i kamap gut tru

### VOLIBAL RIPOT

SAMTING olsem 32 tim bilong man na meri i bin stap insait long namba tri Patron Kap volibal sempionsip long Madang long Ista wiken.

Dispela sempionsip i save kamap olgeta yia, na mamba bilong Madang Open Jacob Wama i sponsarim.

Samting olsem 20 tim bilong man na 12-pela bilong meri i bin soim pes na resis long tupela pul. Ol tim ya i kam long Madang Distrik na Madang Open Iletoret.

Presiden bilong Madang Volibal Asosiesen Willie Bagore na siaman bilong tonamen, Steven Kadam i tok olsem namba bilong resis long dispela yia i bikpela tru na winim namba bilong ol tim long yia i go pinis.

Tupela bikman ya i amamas long lukim planti ol nupela tim i kamap.

Mista Kadam i tokaut olsem planti man na meri na tu pikinini i bin kamap long Laiwaden Oval long lukim ol pilaia.

Bihain long dispela 4-pela de, ol top foa tim tasol i bin go pilai insait long fainel.

Ol tim i bin stap long fainel em (man) Panu Sharks na Apiabs. Na long meri em Normads na Tsunami. Ol tim ya i bin pilai fainel na painim aut husat tru bai go long fainel.

Insait long semi fainels, MTC i strong tru na ruasim ol sempion bilong las yia, Wantoks 3-2. Na primia bilong 1999, Normads i autim sket bilong ol Bilbil 3-2.

Semi fainel na gren fainel bai kamap long dispela wiken.

Insait long resis bilong ol man em Riwo vs Apiabs na Mungkas wantaim Malabor

Na long resis bilong ol meri, MTC bai

salensim Normads na Wantoks bungim Bilbil.

Presiden Bagore i tokaut olsem semi fainel na gren fainel i no kamap bikos taim em i sot. Olsem nau ol i surikim dispela fainel i go long bihain taim.

Mista Bagore i laik mekim bikpela toktok i go long sponsa Jacob Wama na ol lain opisal bilong em na ol bilong em.

Em i salim bikpela tok tenk yu i go long ol sapota, pilaia, na ol opisel long gutpela sapot ol i givim long las tripela de. Na em i askim long wankain sapot gen i mas kamap long dispela wiken.

Presiden i tokaut long smapela ol lain olsem United Church, PNGCC na Boroko Motors.

Em i tok amamas tu i go long ol lain komiti bilong em long mekim gutpela wok bilong ol. Em i bilip olsem wankain sapot bai kamap long dispela wiken.

**Lukluk  
bek  
long  
spot  
eksen  
bilong  
skul  
soka**



# Ol Spot Dro

## PORT MORESBY SOCCER ASSOCIATION

Saturday, April 21, 2001

### BISINI ONE (1)

08:00 D2	Nomads vs Dolos
09:20 W1	ANZ University vs LBC Defence
10:30 Y2	Sogeri Nat Sch vs Gordon Sec.
11:45 W1	Orogen vs Telikom
13:00 D1	Dobo vs Kurti Andra
14:20 W2	BFW PS United vs Falcon
15:45 D1	Cyclone vs Naniu
16:20 Prem	Rapatona vs LBC Defence

### BISINI TWO (2)

08:00 D2	Haku (Mungkas) vs Datec Duau
09:20 Y1	Cosmos vs ANZ University
10:30 W2	Arnottes Ela Utd vs Madgauns
11:30 D2	WMI vs Bavaroko
12:55 W2	Kula vs Cyclone
14:00 D1	Tarangau vs Blue Kumuls
15:10 W1	Cosmos vs Sobou
16:20 Prem	Guria vs Babaka

### UNI OVAL

08:00 D4	Rapatona vs LBC Defence
09:10 D4	BFW PS Utd vs YM2
10:30 Y1	BFW PS Utd vs YM2
11:45 D4	Telikom SPB vs Kula
13:00 D3	Murray Barracks vs Muma
14:10 D3	Jaha (Bipi) vs Sunset
15:20 D3	Eda Ranu vs Manabu

Sunday, April 22, 2001

### BISINI ONE (1)

08:00 D2	Aigob vs Wanzesi
09:20 Y1	Kula vs Telikom SPB
10:30 W2	Tawala vs SP Brewery
11:45 W1	Guria vs WMI
13:00 Y2	Pom Int. High Sch vs Murat
14:20 D1	Murat vs Tawala
15:45 Prem	BFW PS Utd vs YM2

### BISINI TWO (2)

08:00 D2	Buresong vs Pangtel (Nisco)
09:20 W2	Murat vs Rapatona
10:30 D1	HLB Pom Utd vs Sobou
11:45 W1	Bavaroko vs Tarangau
13:00 Y1	Rapatona vs LBC Defence
14:20 Prem	Telikom SPB vs Kula
15:45 Prem	Cosmos vs ANZ University

### UNI OVAL

08:00 D4	Guria vs Babaka
09:10 Y1	Guria vs Babaka
10:30 D4	Cosmos vs ANZ University
11:45 Y2	HLB Pom Utd vs Ela United
13:00 Y2	Bavaroko vs Blue Kumuls
14:10 D3	Arnottes Ela Utd vs Jr. Ke Club
15:20 D3	Kutu vs Momase

## PORT MORESBY NCD TOUCH

NCD Cup Final  
Sunday, April 22, 2001

Sir John Guise Stadium - Oval 2

12:00 MX	Oil Search 3 vs 1 Water Board	F1
12:00 MX	EMTV 2 vs 4 Maba West	F2
12:30 MX	Avis 6 vs 5 City Pharmacy	F2
12:00 MX	Lakowalai vs Wantoks	F1
13:00 M	Oil Search 1 vs 3 EMTV	F1
13:00 W	Maba West 1 vs 3 Water Board	F2

13:30 W	Avis 6 vs 5 City Pharmacy	F1
13:30 M	Lakowalai vs Wantok	F2
14:00 W	Oil Search 2 vs 4 EMTV	F1
14:00 M	Avis 2 vs 4 Water Board	F2
14:30 MX	Winner 3/1 vs Winner 2/4	F1
14:30 M	City Pharmacy vs Maba West	F2
15:00 W	Winner 3/1 vs Winner 2/4	F1
15:30 M	Winner 3/1 vs Winner 2/4	F1

Losers 3 vs 1 and 2 vs 4 MX out  
Losers 3 vs 1 and 2 vs 4 W out  
Losers 3 vs 1 and 2 vs 4 M out

### POINTS LADDER

#### Women's Division

CLUB	P	W	L	D	F	A	T	PS
Oil Search	5	4	1		9	4	13	2
Water Board	5	3	2		6	15	11	3
EMTV	5	2	3		21	5	9	4
Maba West	5	5			30	6	15	1
Avis	5		5		2	28	5	6
City Pharm	5	1	4		4	12	7	5

#### Men's Division

Oil Search	5	5			24	14	15	1
Water Board	5	2	2	1	20	19	10	4
EMTV	5	2	2	1	28	25	10	3
Maba West	5	1	4		10	20	7	6
Avis	5	3	2		19	10	11	2
City Pharm	5	1	4		11	25	7	5

#### Mix Division

Oil Search	5	3	2		14	14	11	3
Water Board	5	5			22	18	15	1
EMTV	5	4	1		29	24	13	2
Maba West	5	2	3		20	27	9	4
Avis	5	5			9	23	5	6
City Pharm	5	1	4		15	22	7	5

#### Club Total

Oil Search	15	12	3		47	32	39	1
Water Board	15	10	4	1	48	52	36	2
EMTV	15	8	6	1	78	64	32	3
Avis	15	3	12		30	42	21	5
Maba West	15	8	7		60	53	31	4
City Pharm	15	3	12		30	59		
	21	6						

## DOWNER CONSTRUCTION CUP 2001

### WOMENS SOCCER DRAW

Week 3 - Sunday, April 22, 2001.

Teams	Referees
Sharks vs Wallabies	Mapi Mokamo
Wolves vs Raiders	Vincent Suwit
Saraga One vs SK Stones	Nigel Nue
Roosters vs Bodiam	Mirra Wami
Mare Wena vs Okapians	Nick Bernard
K/Morobe vs Starlets	Nick Toi
Storms vs Kosipers	Festus Kasari
Eels vs N/Block Girls	Mogen Nundai
Stars vs City Tambas	Mapi Mokamo
Bullets vs Spiders	Vincent Suwit
Raiders vs Original S.S.	Nigel Nue
Colombia Girls vs Tigers	Mirra nami
5 Mile Aimbos vs Phytons	Nick Bernard
Buggies vs D.Y.D'S.	Nick Toi

### MENS TOUCH FOOTBALL DRAW

Tigers vs Bulldogs	Nick Kiage
Dragons vs Wallabies	Noel Sting
Wolves vs Storms	Dennis Obura
Roosters vs Starlets	Nicko Wai

Tigers vs LK Nanes	Max Koiari
Eels vs D.Y.D'S.	Barnabas Miki
M/Brothers vs K/Brothers	Joe Sina
Knights vs City Tabus	Isacc Wai
Spiders vs Pukpuks	Dennis Obura
K.K. Lamago vs Mogi West	Max Koiari
Raiders vs Dragons	Barnabas Miki
G/Rige vs Storms	Joe Sina
5 Mile Ambos vs STC	Issac Wai
Sharks vs Bullets	Nick Kiage

• Note: the games will start at 10 o'clock sharp on Sunday. All club official, players, supporter, referees and game official are asked to be in the playing fields before 10 o'clock

### MENS TOUCH FOOTBALL RESULTS

Week 2 - Sunday, April 15, 2001.

City Tabus	12 def Mare Brothers	0
Bodiam Spiders	0 vs Monier Pukpuks	0
Dark Street Knights	12 def Mogi West	4
MKN Dragons	4 def KK Lamago	0
Trial storms	12 def Kuima Raiders	8
Gordons Ridge	12 def STC Last	4
Five Mile Ambos	4 def 6 Mile Bullets	0
Siane Sharks	12 def Silava B/Dogs	0
Backyard Tigers	4 vs Hairo Wallabies	4
Dirty Dragons	4 def Hebou storms	0
Protect Wolf	0 vs Star-Lets	0
China Town Roosters	8 def LK Nanes	0
Ivani Tigers	12 vs DYD	12
Oro Eels	8 def Kuwati Bros	4

### WOMENS SOCCER RESULTS

Week 2 - Sunday, April 15, 2001.

Suba Stars	0 vs City Tambus	0
Six Mile Bullets	1 def Hebou Spiders	0
Bodiam Raiders	0 vs Original SS	0
Ivani Tigers	1 def Colombia Girls	0
5 Mile Ambos	1 def Gumini Phantoms	0
Leftover Buggies	2 def DYD	0
Siane Sharks	0 vs Hairo Wallabies	0
Protect 0	vs Hebou Raiders	0
SK Stones	1 def Saraga One	0
China Town Roosters	1 def Okapians	0
Mare Wena	4 def Starlets	0
Kombeon Morobe	2 def Kosipers	0



**Weekly 8 Ball Competition**  
- every Thursday at 8.00pm.  
**Register Fee K20!!**



Contact Mr. Chin on 323 5386 or 693 1422 for more information.

## Toksave

Salim ol dro. risalts na poin lada i kam long Wantok Niuspepa long Tunde olgeta wik. Salim long Spots Edita: Fax: 325 2579 o ringim em long telepon no: 325 2500

# Lae winim Nesenel Pennants

## BOWLING IPOT

LAE Blues i winim nesenel pennants bowls taitel taim ol i autim Lae Maroons long wiken.

Ol Blues i winim K2,400 na Maroons kisim K1,600. Goroka husat i pinis namba tri i kisim K800 na Bulolo i kisim K200 long kamap long namba foa ples.

Kepten bilong Blues Martin Seeto i mekim bikipela tok amamas i go long tim bilong em long winim taitel namba tu tim. Em i kisim dispela taim long tok tenk yu long ol laun pilaia olsem Albert Barakeina, Pelik Sapul, Peter Boucher na long seksen B em Peter Pomaleu, Joe Bonen, David Harry na John Sau.


Na long Maroon em Bim Ave, Peter Takolu, Gabriel Aise na Nadu Namun, na long B seksen em Bruce Chedrick, Karol Kisokau, Joe Taso na Lazarus Bai.

Presiden bilong PNG Mens Bowling Asosiesen Joe Chapok i tok tenk yu long spons R&R klab bilong Pot Mosbi long sponsarim dispela sempionsip.

"Dispela sempionsip i kamap gut na R&R bai sponsarim long narapela 6-pela yia. Arapela 4-pela yia i go pinis we R&R klap i givim olsem 10-yia sponsasip."

Bulolo Bowling klab bai holim 2002 sempionsip. Ol Bulolo i mas mekim bikipela wok tru long traime stretim ples bilong pilai na sempionsip i ken go long ol.

Sapos Bulolo i no mekim gut wok, Mt Hagen bai sambai tasol long kisim ples.



• Ol bowla bilong Lae, Peter Pomelau, Karol Kisokau na Nadu Namun

Mista Drapok tu i tokaut long tupela skwat long makim kantri long Asia Pasifik taitel long Meiboun na mini Saut Pasifik Gems long Disemba.

Tim bilong Asia Pasifik em: Nadu Namun (Lae), Kundi Miki (Mt Hagen), Robert Kapo (Goroka), Charles Rasehei na Iamo Ila (Boroko). Tim menesa em Joe Chapok

Na tim bilong mini SP Gems long Norfolk Ailan em: Martin Seeto, Albert Barakeina (Lae), John Taylor, Paul Akis (Mt Hagen), Peter Hoyato (Goroka), Peter Boucher (Defence). Tim menesa em Kilwi Nabo.

Tim bilong Pot Mosbi we husat i tingting bai pilai gut i no strong tumas na i no kisim wanpela spes long tim.

# PNGFA Kap bai kamap bihain long tripela yia

## SOKA RIPOT

PAPUA Niugini Futbol Asosiesen (PNGFA) nau i tingting long givim moa pawa i go long ol rijonel soka bodi insait long kantri long strongim developmen bilong soka.

Dispela em wanpela astingting we PNGFA aninit long Five-Yia Developmen Plen i laik kirapim.

Sekretari bilong PNGFA Ivan Ngahan i tokaut olsem bikipela hevi i stap soka long kantri i go het em soka i no inap painim mani. Kantri bilong PNG i no gat gutpela rot sistem na tu pe bilong balus i dia tumas long go raun na pilai.

Mista Ngahan i tokaut long mekim olgeta senta i gat sans long resis, PNGFA Kap nau bai kamap long bihain long tripela yia. Insait long namba wan yia, bai i gat provinsal soka tonamen.

Na long namba tu yia, i gat rijonel soka tonamen, na long namba tri yia, ol sempion long wanwan rijen bai traime resis long PNGFA Kap long namba tri yia.

Sekretari Ngahan i tokaut olsem sapos ol i bihain dispela kain sistem, em bai givim ol senta moa taim long redi. Em i min olsem ol senta i ken painim mani long kamap long ol soka sempionsip.

"PNGFA i kamapim dispela sisen long sevim mani. PNGFA i mas gat opis, na aninit long FIFA long Gol Projek, em bai kisim sampela helpim long mekim wok."

Namba wan toktok long Gol Projek i stat long Zurich we Glen Turner na em yet i mekim sampela toktok.

"PNGFA i mas painim opis spes na haus bilong ol wokman long mekim soka i develop moa yet. PNGFA i mas nidim dispela ol samting long sevim kos."

Vais presiden bilong PNGFA Seth Daniel i toktok nau wantim Glen Turner long traime lukim dispela toktok bilong wokim soka koles na opis long Lae i mas karim kaikai.

Plen bilong dispela opis na stedi-um i kamap pinis bikos long gutpela helpim i kam long Vukisch na Borich Engineering kampani long Auckland, Nu Silan na Fiji.

# Kiunga i wetim rejistresen

## RAGBI LIG RIPOT

KIUNGA Ragbi Lig insait long Westen provins bai i no inap statim sisen bilong ol inap olgeta pilaia na opisel i rejista.

Presiden bilong Kiunga Lig Dick Katafa i tokaut olsem asosiesen bilong em i save gat 34 pilaia husat i rejista bipo long sinia kompetisen i ken stat.

Nau yet Rusa Cowboys tasol i gat 19 pilaia i rejista na ol arapela klab olsem Airport Norths, Niwaf Raiders, Waliya na Fly Storms i no rejista yet.

Katafa i tokaut olsem nogat wanpela klap i tingting long rejistarim kosa, trena na ol mene-

sa. Na tu nogat wanpela referi i rejista yet long Kiunga lig.

Vais president Nanu Sekele, sekretari Peter Tatanu na em yet i strong olsem Kiunga Ragbi Lig bai i no inap statim sisen bilong em inap olgeta pilaia i rejista.

Katafa i tokaut olsem em i no laik Kiunga Lig i kisim hevi long larim ol pilaia i no rejista na pilai na kisim bagarap. Long ol yia i go pinis, kompetisen i save stat we planti ol pilaia i no rejista i save pilai na kisim bagarap na Kiunga Lig i save kisim bikipela hevi tru ya.

Arapela samting, ol opisel i larim ol pilaia i no rejista i pilai long traime long kisim nem.

Katafa i tokaut olsem ragbi lig i no wanpela tim gem tasol em i nidim helpim bilong ol opisel tu. Dispela tim wok em i mas go long olgeta opisel bilong klab na lig eksekjutiv long strongim ragbi lig insait long Kiunga.

Bipo, Kiunga i save kamap wan man disisen na dispela i save bagarapim tru kompetisen. Presiden i tok olsem Kiunga i gat sapot bilong PNGRFL na nau em i askim olgeta klab long mekim wok.

Katafa i tokaut olsem kompetisen i ken stat long dispela wiken sapos olgeta rejistresen i stret. Kiunga Tigers bai i no inap stap insait long resis bilong dispela yia.

# PMSA singaut long moa referi

## SOKA RIPOT

POT MOSBI Soka Asosiesen (PMSA) i singaut long moa man na meri i mas joinim referi asosiesen bilong en.

Nupela media opisa bilong PMSA Geoffrey Simpson i tokaut olsem wanem ol lain i gat laik long kamap referi i mas lukim ol referi long soka fil o ringim PMSA opis.

Mista Simpson i tok olsem PMSA i tingting long holim wanpela setifiket kos na trening bilong ol referi. Em i tokaut olsem sapos i gat planti man, ol bai tingting long holim woksap.

Long sem taim tu, PMSA i askim olgeta pilaia long kamap gut long trening wantaim wanwan tim bilong ol. Sapos ol pilaia i tren gut, ol bai kamapim gutpela gem ya.

Semtaim tu, ol i mas kamap wantaim gutpela yunifom bilong ol. Planti ol tim i kamap wantaim yunifom we i gat gutpela mak long ol. Tasol sampela tim nogat.

Em i askim olgeta tim long kamapim gutpela yunifom bilong

wanwan pilaia. PMSA i laik ol spona bilong ol soka tim i mas kisim gutpela sapot o bekim long wanem mani em ol i tro-moi long wanwan tim insait long kompetisen.

Sapos i gat gutpela yunifom, ol pilaia bai pilai strong na amamas we i ken pulim moa sapota i kam long soka fil.

Mista Simpson i tokaut olsem yunifom bilong Boroko Foodworld PS United i gutpela tru. Sapos wanem ol klab i gat spona, ol i mas mekim wankain tu.

Nupela presiden bilong PMSA Fabian Chow na komiti bilong em i wok long traime long stretim ol samting long soka fil.

Nau ol sapota i ken painim gutpela ples bilong pilai na ol tim i ken pilaia kamapim gutpela gem ya. PMSA i amamas tru long gutpela tim spirit i wok long kamap insait long soka fil.

Long ol wik antap, PMSA bai painim o makim ol gutpela referi, klab, kosa, kepten na ol pilaia na givim ol presen olsem luksave long gutpela wok bilong ol.

**JAKPOT**  
**K300**  
**NAU!**

## PAINIM BAL RESIS

### NAMBA 3



**RUL BILONG PILAI:**

1. Makim X long boks long potu yu ting bal i stap
2. Makim X long pen tasol
3. Katim potu long sisos na salim long: **PAINIM BAL RESIS NAMBA 3, Wantok Niuspepa,**

P.O. Box  
1982, Boroko, NCD.

4. Nambawan entri i makim stretpela hap bal i stap, em bai win.
5. Las de bilong kisim ol entri em Fraide Mas 30, 2001. Nem bilong wina long mun Epril  
bai kamaut long Wantok bilong May 3, 2001.
6. Long Wantok bilong May 3, 2001 bai gat nupela K100 prais mani resis bilong Mun Epril. Bai gat resis bilong olgeta mun i go inap mun Desemba, 2001.
7. Disisen bilong komiti i makim wanpela wina em i fainel.
8. Wina bai kisim sek mani, na i no long kes.

9. Raitim nem na adres bilong yu: **Nem**.....**Address**.....

.....**Krismas**.....

10. Yu ken salim moa long wanpela entri, tasol no ken yusim potu kopi.

11. Ol famili o pikinini bilong ol wokman meri bilong Wantok i no inap stap insait long dispela resis.



## **Praivetaisesen Komisen ov Papua Niugini**

### ***Askim ol manmeri long proposal***

#### **OI Bisnis na Lo Edvaisa bilong Praivetaisim Telikom PNG Ltd na Post PNG Ltd**

Gavman bilong Papua Niugini i stat kamapim program bilong salim ol bisnis bilong gavman long ol pablik i ken papa long en. Gavman i putim Praivetaisesen Komisin long lukautim dispela program.

Praivetaisesen Komisin nau tingting long kisim wanpela saveman o kampani bilong givim edvais long helpim na stretim tupela Telikom PNG Ltd na Post PNG Ltd long gutpeal rot. Komisin i tingting long kisim saveman bilong Bisnisna sait bilong lo long stretim ol samting, menesim na redim tupela kampani wantaim bilong salim. Man bilong givim edvais long sait bilong lo bai wok narapela long arapela givim edvais long bisnis. Dispela ol edvaisa bai wok insait long PNG aninit long lukaut bilong komisin na olgeta projek menesa bilong em.

OI edvaisa bai ol i makim wanpela bilong planti aplikesen. Ol dispela edvaisa husat i gat laik long mekim dispela wok i mas gat gutpela ekspiriens long sait bilong givim dispela kain sevis long praivetaisesen. Em bai gutpela sapos dispela ekspiriens i kam long komyunikesen sait. Ol i tingting long kisim ol kampani o man husat inap salim tim wantaim ekspiriens long wok long kain kantri olsem PNG o wankain kondisen. Husat laik salim proposal mas traime inapim ol tems na mak i stap aninit long seleksen pepa. Husat kampani i luk orait long mekim dispela wok bai mipela bungim nem bilong ol na ol i ken kam toktok gut wantaim Praivetaisesen opisal long Pot Mosbi bipo long pinis bilong mun Me long wanem samting ol bai mekim.

OI tems na seleksen pepa i stap nau wantaim Sekreteri, Praivetaisesen Komisin  
P O Box 45, Konedobu, Papua Niugini.

Telepon: (675) 321 2977; Fax: (675)321 3134.

OI dispela wankain pepa em yu ken kisim long website bilong Projek Menesa bilong Praivetaisesen Komisin long [www.elvet.com.au](http://www.elvet.com.au).

Olgeta proposal i mas kamap bipo long 16 May, 2001 insait long Papua Niugini.

# **The Independent**

KEEP UP WITH THE

# **NEWS**

VISIT THE INDEPENDENTS WEBSITE

[www.tiare.net.pg/independent](http://www.tiare.net.pg/independent)

**The Independent WANTOK PNG BUSINESS**

**WORD PUBLISHING, P.O. BOX 1982, BOROKO,  
PHONE: 325 2500 - FAX: 325 2579**

# WANTOK SPOTS

## PNG bai bungim strongpela salens long ICC tonamen

PAPUA Niugini bai bungim strongpela salens tru long Intanesenl Criket Council tropi resis we bai kamap long Toronto, Canada, long mun Julai.

PNG i pinis namba 11 long 24 kantri we bai bungim bikpela salens tru long ol gem.

Namba wan samting, PNG i mas bungim ol tim long priliminari gems na sapos em i win, em bai salensim ol arapela strongpela tim.

Em i namba wan taim, 24 kantri i stap long tupela grup. Nampa wan 12 kantri i stap ol yet, na narapela 12 kantri i stap long ol yet. Ol wanwan kantri bai pilai 5-pela gem long prilimeri raun na bihain ol bai go insait long namba tu raun.

Ol wina long dispela pul bai go insait long 2003 Wol Kap resis long Saut Afrika.

PNG i stap long Pul B egensim Ireland (2), Denmark (3), Hong Kong (6), Bermuda (7) na USA (10).

Na long Grup A em: Scotland (1), Holland (4), Canada (5), United Arab Emrites (8), Fiji (9) na Singapore (12)

PNG bai spendim wan wik long Canada long traime ples bilong ol na bihain pilaim namba wan gem egensim USA long Jun 30.

Dispela gem bai wankain olsem long 1990 we US i autim PNG long pilai insait long semi fainels. Wampela taim tasol PNG i pinis namba tri em long 1982.

Bihain PNG bai bungim Bermuda na Denmark (Julai 3), Hong Kong (Julai 4), na las gem long Julai 6 egensim Ireland.

Dispela tonamen stat long June 25 na pinis long Julai 17.

Sekretari bilong PNG Cricket Bot Wayne Satchell i tokaut olsem ol i salim pinis 25 nem i go long ol ogenaia bilong dispela tonamen pinis ya.

## Goroka bai holim

# Cambridge Kap fainel

### RAGBI LIG RIPOT

MOA long tausen man bai kapsait long Sir Danny Leahy Oval long lukim bikpela fainel bilong Nesanel Cambridge Kap jon sempionsip long dispela wiken.

Dispela jon sempionsip bai stap namel long 4-pela tim bilong Hailens, Sauten, Niugini Ailan na Noten jon.

I no olsem arapela ragbi lig resis we be gat fainel nogat, wanem tim i winim planti gem i winim dispela taitel.

Nau yet, Hailens Jon i winim tupela gem na i gat gutpela sans tru long winim taitel. Na dispela wiken, em i mas pilai strong long traime winim Sauten Jon.

Noten na Sauten Jon i stap namba tu wampela tu poin. Niugini Ailan i nogat poin yet bikos ol i no winim wampela gem.

Na long dispela wiken, Noten Jon bai bungim Niugini Ailan (NGI) na Sauten bai salensim ol wantok long Hailens.

Noten Jon i gat planti ol pilaia i kam long asples Goroka. Olsem na ol bai kisim gutpela sapot tru. Sampela ol biknem pilaia husat i karim nem bilong Goroka Nokondis olsem Mack Siwi na Keles Tawi bai go pas long beklain bilong Noten Jon.

Na long fowat, Tarzan Malaguna, Limu Willie, Wasara Iya bai go pas long brukim difens bilong birua tim.

Ol boi long NGI bai strong long spit bilong ol. Ol i gat gutpela kain stail long tromoi bal i go i kam long paulim ol hevi fowat bilong arapela o birua tim.

NGI bai kisim gutpela sapot i kam long pilaia bilong Buka Graham Billy, Daniel Rowa, Brian Waluka na olpela intanesenel sevens pilaia, Max Meia bilong Hoskins.

Sauten Jon i mas tingting gut taim ol bungim Hailens Jon. Ol boi Hailens i gat bikpela laik tru long winim dispela taitel aninit long nupela stail Cambridge Kap resis.

Planti ol pilaia bilong Sauten Jon em ol bilong Pot Mosbi. Planti bilong ol i save pilai wantaim longpela taim na ol bai salensim biknem tim long Hailens.


Hailens Jon i gat ol pilaia olsem Benny Pamda, Leon Cletus, Peter Poiya na Peter Wai husat i save givim hat taim long ol birua tim long las wiken.

Skoa bilong las wiken i sanap olsem Noten Zon autim Sauten Jon 33-14, Hailens nekim Niugini Ailan 18-16. Na long Mande, Hailens Jon autim Noten Jone 33-14 na Sauten Jon rausim ol boi NGI 36-34.

Ripot i kisim Wantok Nius i tokaut olsem sapos Sauten Jon i winim Hailens na Islands winim Noten, ol ogenaia bai skelim long namba bilong ol gol.

Wanem tim i skorim planti gol long dispela sempionsip bai winim tropi. Nau yet, Hailens i redi tasol long winim dispela Cambridge Kap resis ya.

## Tabubil bai holim pri-sisen fainel



• Ol lain Bultem Rock Brothers husat bai bungim Royals long gren fainel insait long Tabubil ragbi lig resis.

**BIKPELA pri-sisen grenfainel bilong Tabubil Ragbi Lig bai stap namel long Bultem Rock Brothers na Royals long dispela wiken insait long Tabubil Spots oval.**

Tupela tim wantaim i gat wankain strong tasol Brothers bai kamap olsem feveret long wanem ol i winim olgeta gem bilong long pri-sisen resis ya.

Ol Brothers i winim olgeta gem na dro wampela taim egensim Tarangau. Dispela dro i kamap tupela wik i go pinis.

"Mipela i no daunim Royals.

Mipela i no amamas tumas bikos mipela i win im olgeta gem. Mipela bai pilai nomel gem tasol ya," kosa bilong Brothers John Lingham i tok.

Em i tok olgeta pilaia bilong em i trening gut na bai redi long gren fainel ya.

Lingham i tokaut olsem Brothers bai strong long Stanley Douglas na William Mait. Ol bai kisim helpim na sapot i kam long Dummy Robin Ignatius, kepten George Sikai na seken rowa Michael James.

Kosa bilong Royals Sipak Siwi

I tok tim bilong em i stat long dispela yia tasol na em i amamas long ol i pilai na go insait long pri-sisen grenfainel.

Em i tok em i nogat gem plen long dispela wiken tasol ol bai pilai wankain gem yet. Bikpela senis tasol em long nem bilong ol pilaia long tim lista long wanem planti bilong ol pilaia i kembek gen long holden bilong ol.

Royals i kisim gutpela sponsa i kam long Kala Kumgit. Tim bilong ol pilsman ya bai strong long Steve Mathew, Mathew Tipa

na Eric Guma, Geroge Tingi na Dickson Alopa.

Royals bai kisim sampela sapot taim ol i kisim nupela jeji bilong ol. Ol i save yusim jeji bilong arapela tim na nau yet ol klab bai baim bilong ol yet.

Wampela wik bihain long pri-sisen gren fainel, Tabubil Ragbi Lig Asosiesen bai statim sisen propa bilong em we A gret, A riserv, Anda 21 na Anda 17 divisen bai resis.

Sampela ol klab i tokaut pinis long resis em Country, Tigers, Min Raiders na Tarangau.



# Wantok

Digitized version made available by



**Copyright:** Under copyright

**Rights Holder:** Word Publishing Company Limited

**Use:** This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

**Constraints:** This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

**Note on digitized version:** Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.